

गुलबिया

गुलबिया

डॉ. आभा पूर्वे



ISBN : ९७८.८१.६६१४४६.४.७

प्रथम संस्करण
२००८

द्वितीय संस्करण
२०२३

सर्वाधिकार ©
लेखिकाधीन

प्रकाशक
अंगिका संसद
सराय, भागलपुर
(बिहार)-८१२ ००२
E-mail : angikasansad@gmail.com

हरियाणा कार्यालय
वार्ड-३३, सेक्टर-२८
सरस्वती विहार, गुरुग्राम-१२२००२

आवरण-चित्र
www.wallpaperflare.com से साभार

मुद्रक
Das Printer
गोविंदपुरी, दिल्ली।

मूल्य
एक सौ पचास रुपये मात्र

Gulabiya (Angika Novel)

By Dr.Abha Purbey

Rs.150/-

गुरुवर
डॉ. शरतचंद
के
सादर आरौ श्रद्धा साथे
समर्पित

—आभा

पहलों संस्करण से

दू बात

‘गुलबिया’ से धारावाहिक प्रकाशन भागलपुर से प्रकाशित नई बात में होलै छेलै। अभी एकरे अंतिम दू-तीन खंड छपवो बाकिये छेलै कि हमरो व्यस्तता के कारणे, ऊ खंड नहिये छपे पारलै।

दुर्भाग्य कि जीवन में पी-एच.डी., नौकरी लैके हेनो भाग-दौड़ ऐलै कि छपवाय दिश फेनू ध्याने नै गेलै।

हो, एतना होलै कि भागलपुर आकाशवाणी से एकरे रेडियो नाटक ‘गुलबिया’ नामो से जरूर प्रसारित होलै। ई प्रसारण ने एक दाफी फेनू हमरा ‘गुलबिया’ के प्रति सतर्क करलकै।

ओकरे परिणाम छेकै कि प्रकाशन लेली पड़लै ‘गुलबिया’ प्रकाशित होय रहलै छै। केन्हो बनलै छै ई उपन्यास—आपने सिनी के प्रतिक्रिया के प्रतीक्षा रहतै।

—आभा पूर्वे

शरतचंद पथ
मशाकचक, भागलपुर
८१२००१ बिहार

मकर संक्रान्ति
१५ जनवरी २००८

दोसरोँ संस्करण लेली

‘गुलबिया’ के दोसरोँ संस्करण लेली विशेष की लिखना छै। जखनी हम्में गुलबिया के कथा उपन्यास में बांधी रहलौ छेलियै, तखनी हमरा की मालूम छेलै कि एक दिन यही आकाशवाणी भागलपुर से भी नाटक रूपों में प्रसारित होतै। ओकरोँ बाद तें गुलबिया के लोकप्रियता आरो बढी गेलै। ई उपन्यास स्त्री-विमर्ष के केन्द्रों में रहलै, ई सब बात हमरा बार-बार एकरो लें उत्साहित करतें रहलै कि एकरोँ दोसरोँ संस्करण आना चाही, होन्हौ केँ आबें हमरो लुग ई उपन्यास के एकाध प्रति ही बचलौ होलौ छै। कोय आपनोँ आदमी माँगै छै, तें नै दिए पारै छी। आबें ई संकट नै रहतै। सच कहै छियौँ, गुलबिया के दोसरोँ संस्करण सेँ हमरोँ कम खुशी नै होय रहलौ छै। हुएँ सकै छै कि एकरोँ हिन्दियो संस्करण आवें।

—आभा पूर्वे

१ मई २०२३

गुलबिया

गर्मी आवी गेलो छै, ऐन्हो-तैन्हो नै। तभियो हेनो नै छै कि धूपो में बैठला सें चमड़ी उधड़ी के रही जाय। मजदूर सिनी खेतों पर काम करै छै, ई बात अलग छै कि ओकरो सिनी के देह घाम सें घमजोर होय जाय छै। वहीं मजदूर सिनी सें थोड़ो हटी के गुलबियो हाथों में खुरपी लै के माटी कोड़ी रहलो छै। माटी कोड़ाय रहलो छै कि नै कोड़ाय रहलो छै, गुलबिया के ई बातों के तनियो होश नै छै।

गुलबिया खेतों में काम ते करी रहलो छै, मतरकि मन में एकटा अजीब चिन्ता भी होय रहलो छै, कैन्हें कि अभी तक बलेसर नै ऐलो छै। बलेसर ई बात के अच्छा सें जानै छै कि हममें ओकरो ई खेतों में इंतजार करी रहलो छी। आरो बलेसर के ते आने छै। कैन्हें कि कल्हे बलेसर बोली के गेलो छै कि ऊ हमरा सें मिलै वास्तें यहाँ जरुरे ऐतै। मतरकि जेना-जेना सुरुज के किरिण आपना आप के समेटी रहलो छै, गुलबिया के मनो में एगो आशंका उठी रहलो छै। रही-रही गुलबिया केरो हाथ कली जाय छै, जेना कि ओकरो हाथों में कोय दम नै रहे। कभी-कभी ते ओकरो देहो सिहरी जाय छै।

गुलबिया रो मोंन आबे कामो में नै लगी रहलो छै, रही-रही ओकरो मनो में एक्केटा भाव आवै छै कि आखिर बलेसर आभी तांय कैन्हें नी ऐलो छै। बलेसर के मालिक जानी-बुझी के कहीं ओकरा कोय दूसरो काम में ते नै भिड़ाय देले छै। हुवे सकै छै कि मालिक हमरो आरो बलेसर के बीच के परेम के जानी गेलो रहै। कैन्हें

कि ऊ दिन मालिक पटेल सिंह हमरा बड़ी ध्यान सें देखी रहलौ छेलै । ओकरो ई रड देखै के मतलब ऊ समय हमरा समझ में नै ऐलौ छेलै । हुवै सकै छै कि ई खेत के मजदूर सिनी मालिक सें कुच्छु बोली देलै रहै, कैन्हें कि आदमी आरो साँप के पलटतें देर थोड़े लगै छै । अभी मुँहों पर मीट्ठों-मीट्ठों बोलतै आरो पीछू सें शिकायत करतै ।

मन में उठी रहलौ शंका के कोय मतलब नै निकली रहलौ छेलै । जब तांय बलेसर आपने आवी केँ कोय बात नै बोलै छै, तब तक कुच्छु नै सोचलौ जावै सकै छै । बलेसर एल्लेँ देरी कभियो नै करै छै । जबेँ बोली केँ जाय छेलै, समय रहतें आवी जाय छेलै । आय तें ऐन्हों देर करी रहलौ छै कि मनोँ में अजबे रड के निराशा भरी जाय छै । तभियो गुलबिया बलेसर केँ याद करी-करी केँ आपनोँ समय बिताय रहलौ छै । समय कि बिताय रहलौ छै, खून जराय रहलौ छै । आपनोँ मन के विश्वास केँ आरो बढ़ाय रहलौ छै कि जब तक बलेसर नै आवी जाय छै, ऊ ई खेतोँ में काम करथें रहतै । चाहे रातो कैन्हें नी होय जाय । आय ऊ घोर जैतै तें बलेसर साथें जैतै । एकरोँ वास्तें जत्तेँ देर ठहरै लेँ पड़तै, ऊ ठहरतै ।

धीरें-धीरें कुछ मजदूर सिनी आपनोँ समान समेटी केँ जाय लेँ तैयार होय जाय छै । मतरकि गुलबिया आपने चिन्ता में एल्लेँ डूबलौ होलौ छै कि ओकरा आपनोँ अगल-बगल होय वाला कोनो बात के खयाल नै छै कि के ओकरा देखी रहलौ छै आरो के की ओकरोँ बारे में की बोली रहलौ छै । ई बात के ध्यान गुलबिया केँ रहै, चाहेँ नै रहें, मतरकि ओकरोँ सुख-दुख के सखी पारो केँ ई बात के खूब खयाल छै । पारो जेन्हें मजदूर सिनी के आँखी में अचरज के चढ़ते-उतरतें भाव केँ देखलकै, तैन्हें बात केँ उड़ाय वास्तें मजदूर केँ टोकी देलकै ।

“की देखी रहलौ छोँ तों सिनी गुलबिया केँ । रोजे तें आवै छै ई खेतोँ पर काम करै लेली । रोजे तें देखवे-सुनवे करै छोँ, आय कोय नया बात होय गेलोँ छै, जे तोरा सिनी गुलबिया केँ ऐन्हों करी केँ देखी रहलौ छोँ । जा, जा आपनोँ घर । बाजार दिस” ई बात

कहते-कहते पारो के चेहरा पर एक गुस्सा के भाव उठी गेलो छेलै ।

आबै है बात कि कोय जर-जनानी मर-मरदाना पर गोस्साय के बोलै आरो मर-मरदाना सुनी के चुप रही जाय । ई पर वही मरदाना सुनी के रही जैतै, जे जर-जनानी से डरै हुवै या जर-जनानी के बातों के कोय माने नै लगाते हुवै । दू-एक मजदूर जेकरा ई सब से कोय मतलब नै छेलै, ऊ ते आपनो समान उठाय के चललो गेलै, मतरकि एगो मजदूर जेकरो नाम सोमन छेलै आरो गुलबिया के खूब बढ़िया से जानै छेलै, हट्ठा-कट्ठा बदनवाला, समता रंग पर गोल-गोल बड़ो-बड़ो आंख से गुराय के पारो के देखते हुवे आपनो अंगुली मूँछ पर ताव देते थोड़ा जोर से बोललै,

“कैन्हें, हमरा सिनी के भगवानो रो देलो आंख से देखै के हक नै बनै छै ? आरो फिरु हममें सिनी कोय गंदा बात ते नै बोलले छियै । खाली आँखो से तनी टा गुलबिया के ताकले छेलियै । हेकरा में तोरा एत्ते गोस्सा कथी ले लगी गेलौ । मर-मरदाना के ते कामे छै जर-जनानी के देखना । साथे काम करतै ते देखना-सुनना ते होवे करतै । कहिया तक आँख मुनी के रहतै । तोरो सखी पानी एत्ते कैन्हें पैले छौ । केकरो भी नजर पड़ी जैतै । फेनु गुलबिया कहिया केरो ठकुराइन, कि आम आदमी आँखो उठाय के नै देखे पारे ।” एतना कही के सोमन चुपचाप उठी के चल्लो नै जैतियै, जे आय पारो से सब सुनी लेतियै, जे सोमन आपनो जिनगी में आपनो मालिको से नै सुनले होतियै ।

पारो के सोमन से जे जवाब मिललो छेलै, वै से ओकरो मन झनझनाय उठलै । मतरकि पारो सोचै छै—करलो की जाय । आखिर ई मजदूर सिनी से लड़ी के की मिलतै । फिरु ते यहे खेतो में काम करना छै ओकरा आरो गुलबिया के ।

पारो के आबै गुलबिया पर बहुत गुस्सा आवी रहलो छेलै । है गुलबिया के की होय गेलो छै । ऊ गोस्सा से गुलबिया दिश ताकलकै । गुलबिया आभियो खुरपी हाथ में ले के वैन्हें बैठली होली छै ।

ओकरा आपनों देहो के ख्याल नै छै कि साड़ी के अँचरा गिरी गेलों छै । काम करतें-करतें समूचा बाल हिन्नं-हुन्नं बिखरी गेलों छै । ओकरो ई हालत देखी पारो के सब गोस्सा ठंडाय गेलै ।

अनचोके पारो के फेनू सोमन के बात के ख्याल आवी जाय छै, 'तोरो सखी हेनो पानी कैन्हें पैले छौ । केकरो नजर पड़ी जैतै' आरो पारो के अनचोके नजर आपनों सखी गुलबिया पर पड़ी जाय छै । एकदम चकोर चनरमा के देखै छै । आरो चकोर चनरमा के की देखतै होतै, जेना कि गुलबिया । पारो गौर से गुलबिया के मुँह देखै छै । सच्चे, आय गुलबिया बड़ी सुन्दर लगी रहलौ छेलै । गुलाबी रंग के साड़ी पर बुलु रंग के चोली में आय गुलबिया सच्चे में सभै के ध्यान खींचै छेलै । लगै छै, आय गुलाबो मिलै वास्तें एत्ता सजी-धजी के खेतों में काम करैलें ऐलौ छै ।

गुलबिया नहियों सजै छै, तहियो एत्ते सुन्दर लगै छै । सहिये में गुलबिया सुन्दरता के एक प्रतीक छेकै । दूधो रंग, सफेद रंग भरलौ-भरलौ देहो पर गोल-गोल भरलौ-भरलौ चेहरा । आंख बड़ो-बड़ो, नाक एकदम खड़ा नै तें खड़े छै । आबें ई रंग, सुन्दरता पर हम्मं रीझें सकै छियै तें कोय मर-मरदाना आपना से बाहर होय जाय तें आचरज की । हेकरा में हैरानी के कोय बात नै छै ।

मतरकि पारो के आबें गुलबिया पर बहुत गुस्सा आवी रहलौ छेलै । ई गुलबिया के की होय गेलौ छै कि कोय बात के होश नै छै, आरो नै कोय बात के चिन्ता । नै घर जाय के ठिकाना छै, नै कोय सर-समान के चिन्ता, एकरो ई हालत होय गेलौ छै कि छोड़ियो के जाना मुश्किले होय छै । पारो गुलबिया के ई हालत देखी के ओकरा होश में लाबै ले खूब जोर से झकझोरै छै,

“ऐ गुलाबो, गुलाबो..... ।” मतरकि गुलाबो कोय जवाब नै दै छै । है बात नै छेलै कि गुलाबो बेहोश रहै, मतरकि होशो में बेहोश रहै । पारो ओकरा एक बार फिरू झकझोरलकै, “गुलाबो ।”

गुलबिया के बदन में कोय हरकत नै होय छै । हेनो लगै छै,

जेना सौंसे बदन एकटा पत्थर के मूरत रहै ।

पारो गुलबिया के मुँह के आपनो दोनों हथेली से पकड़ी के आपनो आँखी के एकदम नगीच ले आने छै । मुँह के आपनो दिश घुमाय के बोललकै, “गुलाबो, गुलाबो, देखें केत्ता सांझ घिरी गेलो छै । तों आरो हममें ई खेतों में अकेला बची गेलो छियै । घर चल गुलाबो । कि है परेम-वरेम के चक्कर में फंसी गेलें । केन्हें आपनो देहो के ई परेमों में हिलाय रहलो छें । जानै छें नी ई परेम सभें करै ले जानै छै । निभायवाला एके-दू टा होय छै । वही में मरदो में ।”

गुलबिया अभियो वैन्हें बैठलो छै । ओकरो चेहरा पर आभियो एगो विश्वास के चमक छै । जब पारो बार-बार झोलै छै, तबें गुलबिया कहै छै । गुलबिया पारो के हाथ पकड़ी के बोललै, “हमरो बलेसर ऐन्हो नै छै । हमरा से ऊ बहुत परेम करै छै ।”

पारो के गुलबिया के ई बात पर जरियो टा भरोसा नै छै । सखी के ई हालत देखी के ओकरो मन नै मानै छै । मतरकि गुलाबो के भी समझैलो जाय । पारो गुलबिया के समझावै लेली कहै छै, “गुलाबो, तों है कौन रोग लगाय लेले ।”

गुलबिया के आँख में लोर डबडबाय गेलै । ऊ पारो के हाथ आपनो हाथों में ले के बोललै, “तों नै बुझवै पारो । हममें ते परेम करी के जीवन भर रोग लगाय लेलियै । तों जानै छें राधा के, जे किशन के परेम करै छेलै । ऊ तनीटा प्यार पैलकै आरो जीवन भर किशन के परेम में आपनो जीवन गुजारी लेलकै । वैं की जानै छेलै कि ओकरो है परेम एक दिन ऐन्हो रूप धरतै । आय हर परेम करै वाला आदमी के मुँहो पर एके नाम आवै छै—राधे किशन ।”

“गुलाबो, अब तों है परेम-तरेम के बात भुलाय के घर दिस चल । केन्हें कि अब सुरुज के किरण भी आपनो मुँह छिपाय रहलो छै ।” पारो गुलबिया के हाथ पकड़ी के खीची के उठाय रो कोशिश करै छै ।

मतरकि गुलबिया आरो ठसकी के भुइयां पर आपनो देह के

गोती लै छै। ऊ पारो के हाथ सें आपनो हाथ छोड़ाय के बोलें लागलै, “जानै छैं पारो, हमरो बलेसर के हम्मं मीरा जकां भजै छियै। ऊ हमरो आँखी के सामना में मूर्ति रं हमेशा ठारो रहै छै। हम्मं ओकरा इहां असकल्ले छोड़ी के केना जैबै। मीरा के किशन ते पत्थर के छेलै, मतरकि हमरो किशन ते पत्थर के नै छै। जीता-जागता एगो इंसान छै। तोंही सोचें ऊ हमरो बिना केत्ता उदास होय जैतै” गुलबिया फेनू ऊ सड़क दिश ताके लागै छै, जौन रास्ता सें बलेसर आवै-जाय छै।

पारो गुलबिया के पागलो रंग हरकत सें बहुत गुस्साय जाय छै। ऊ गुलबिया के हाथ पकड़ी के जोर सें खींचै छै, आरो ओकरा उठाय छै। पारो आपनो चेहरा पर राग के भाव लानी के, मतरकि गुलाबो लेली मने-मन प्रेम के भाव राखतें हुवे थोड़ा समझैइयो के बोललै, “गुलाबो, आय तों घर जैवें की नै। आबे हम्मं तोरो है परेम के गप्प नै सुनभौ। सांझ उतरी गेलो छै। आबे घो में संझवाती भकभकावें लगलो होतै। माय हमरो आसरा देखतें होतै। आय खाली हमरो बात मानी ले गुलाबो। तोरा हमरे किरिया छौ।

गुलबिया रो मन अखिनियो भारी छै। ऊ जाय ले नै चाही रहलो छै। ई बात पारो खूब जानै छै। मतरकि आबे नै ठहरबै। आरो ई मतैलो गुलाबो के भी नै रहै देवै। आय चाहे जे होय जाय। आबे हम्मं गुलबिया के ई घनो जंगल रड खेतों में नै रहै देवै। जेना-जेना पारो आपनो मन के कड़ा करै छै, ओकरो हाथ के पकड़ गुलाबो पर जोर पकड़तें जाय छै।

मतरकि है कि, गुलाबो ते शिवजी रड जमीन में धंसलो जाय रहलो छै। नै, नै, आय जेना भी होतै, ऊ शिवजी रड धंसलो गुलाबो के आय यहाँ जमै ले नै देतै। आबे पारो गुलाबो के भर पंजा पकड़ी लै छै। आरो है की, पारो अचरज में डूबी जाय छै। गुलबिया के पत्थर रड भारी शरीर रुइया रड हौलो होय गेलो लगै छै। पारो गुलाबो के सौंसे बदन के आपनो बाहीं में ले के खेत सें बाहर होय जाय छै। अब धिरलो सांझ में खाली दू परछाईं जैते दिखाय दै रहलो छै।

ऐन्हों लगै छै जेना गुलाबो बलेसर के बांही में बंधलो दूर, बहुत दूर जाय रहलो छै।

[२]

आय चौथो दिन छै, जबे कि बलेसर के मालिक पटेल सिंह नें ओकरा चार बजे शाम तक नै छोड़ले छै। ओकरो चेहरा पर के सबटा हंसी अना बिलाय गेलो छै। ऊ नै ते केकरो से बोली-बतियाय रहलो छै, नै ते खेते में काम करै में ओकरो मन लगी रहलो छै। मतरकि खड़ा-खड़ा शून्य में ताकी रहलो छै।

सबसे बड़का बात ई छै कि आय बलेसर कोय मन पाट के डांटी नै रहलो छै। जबकि आन दिन मजदूर काम करै छेलै, ओकरो पर डांट पड़ी जाय छेलै। आय मजदूर सिनी मौका के फायदा उठैलकै। कामो बेसी नै करलकै आरो समय से पहिले जाय ले हल्ला करे लागलै। एक-दू मजदूर के हल्ला करते देखी सबने वहे रं करे लागलै। आरो दिन वे चार बजे के बाद जाय छेलै, केन्हें कि बलेसर छोड़ते-छोड़ते साढ़े चार बजाय दै देलै।

ई बात तहिया से शुरू होलो छै, जहिया से बलेसर मजदूर सिनी के नेता बनी गेलो छै। मालिक पटेल सिंह नें ओकरा खेतो के मैनेजर बनाय देले छै। सब मजदूर से काम कराय के ठीका ओकरे हाथो में छै। बलेसर खूब रोब-दाब से काम कराय छै। ऊ खूब बढ़िया से जानै छै कि मजदूर से केना काम लेलो जाय छै। केत्तो कुछ होय जाय, ऊ मजदूर के बेसी बैठे ले नै दै छै। खूब मेहनत करवावै छै, यही बेरी बलेसर रो मालिक पटेल सिंह ओकरा से काम लै छै। आय भोर से बलेसर के ढेरे काम सौपी देले छै। काम के भार देखी के

बलेसर ओकरा खूब जल्दी निवटाय लें चाहै छै। निबटी जैतै तें ऊ घड़ी भर गुलबिया के मुंह देखै लें ऐतै, माफी मांगतै, सबटा शिकवा-शिकायत खतम होय जैतै। मतरकि काम छै कि निवटिये नै रहलौ छै। जे मजदूर जाय के इजाजत मांगै छै, बलेसर आय ओकरा हाथो सें जाय के ईशारा करी दै छै। कुछ नै बोलै छै ऊ। ई देखी के चमरू के अचरज होय छै आरो दूर बैठलो टुकुर-टुकुर सब देखतें रही जाय छै। चमरू मोटो आरो करिया छेलै। उपरलका होंठ मोटा रो साथ-साथ कुछ ऊँचा भी छेलै। ओकरो मुँह देखी के हेने बुझाय छेलै, जेना कोय बाघ रो मुँह रहै। नाको बेसी ठड़ा नै रहै। आरो नाको हमेशा ऊपर-नीचें होतें रहै छेलै। ऊ आपनो नाक के ऊपर-नीचें कुत्ता रं करते हुवे आपनो हाथ के कमर के पास लै जाय छै। कमर के लुंगी में खोसलो कंधी निकाली के बलेसर दिश ताकै छै। मतरकि बलेसर चमरू के ई व्यवहार सें एकदम अनजान छै। चमरू कंधी सें आपनो बाल झाड़ै लेली आपनो हाथ ऊपर उठाय छै। ई रोजको बात छेकै, जबे चमरू के खेत सें जाय के होय छै, ऊ हेने करतें बलेसर के नगीच सें निकली जाय छै। काफी दबंग छै चमरू, शायद यही कारणे बलेसर नै टोकै छै। मतरकि आय सीधे निकलै के बदला चमरू बलेसर के नगीच आवी के खड़ा होय जाय छै आरो पूछै छै। ओकरो बोली में साफ-साफ कटाक्ष छै। चमरू नें बलेसर सें पूछै छै, “बलेसर, आय तोरो मुँहो के सबटा पानी कैन्हें सुखी गेलो छौं। घरो में कोय बात होय गेलो छै।”

आय बलेसर के ई हालत देखी के सबटा मजदूर सिनी टक-टक ओकरे ताकी रहलौ छै। मतरकि बलेसर के मन के भीतर होय वाला तूफान के कोय नै समझी रहलौ छै। बलेसर केकरो बात के कोय जवाब नै दै छै, मतरकि मन सें बस इतने टा कहै छै, “तों सिनी आपनो पैसा मालिक पटेल सिंह सें लै लियौ।” आरो झटकी के आपनो घर दिस चललौ जाय छै।

रास्ता में कत्ते लोग बलेसर के टोकलकै, मतरकि बलेसर केकरो बात नै सुनै छै, आरो नै ते केकरो सें कुछ बोलै छै। सोहन

ओकरो रूप देखी के अचरज करै छै। अनदिना ओकरो रूप कत्ते खिल्लो रहै छेलै, आरो बलेसर काका के टोकै छेलै, “की काका, आय काकी नें बड़ी परेम सें मछरी खिलाय के खेत पर भेजलौं रहौं। अभियो तांय मुँहो पर वहे चमक बिखरलो छौं।” आरो काका बलेसर के ई रं कुढ़ाय पर हंसी के रही जाय छेलै। मतरकि आय बलेसर नें काका के नै टोकलें छेलै, यहाँ तक कि टोकलौ पर ओकरो कोय जवाब नै मिलै छै। काकी भी आचरज करी रहलौ छै कि आय बलेसर ओकरा सें कोय बात कैन्हें नी करलकै, आय ओकरा चिढ़ैलकै कैन्हें नी ?

हांलांकि सोहन काका के कनियैन गांव के रिश्ता सें बलेसर के काकी लगै छै, मतरकि उमर में बलेसर के बराबरे होला के कारण दोनों के बात-व्यवहार में खुलापन ज्यादा छै। काकी बलेसर के हाथ पकड़ी के टोकलकै, जबकि अनदिना बलेसर ओकरे हाथ पकड़ी के टोकै छेलै कि काकी, आय काका खूब मानलकौं की नें ? जानै छियौं, रात के तौं आरो काका थियेटर देखै लें गेलो छेलौ। बलेसर काकियो सें कुछ नै बोलै छै। आपनो हाथ धीरें सें छोड़ाय के ऊ आगू बढ़ी जाय छै। आय बलेसर के नै काकी के टोकना अच्छा लगी रहलौ छै आरो नै रास्ता-पैड़ा केकरो हाथ पकड़ना। बलेसर यहू नै चाहै छै कि कोय ओकरो ई दशा देखी के कुछु सोचै आरो बोलै।

बलेसर आपनो घर पहुंची के चुपचाप आपनो कोठरी में आबी के भुइयां पर बिछलो चटाय पर बैठै छै, बैठै छै कि धम्म सें गिरी पड़ै छै। अनदिना नाँखी नै ते ऊ दीया बारै छै आरो नै ऊ धुपकाठिये जलाय छै। ई बलेसर के रोजके नियम छेलै, जेन्हें ओकरो नजर धूपकाठी पर पड़ै छै, हठाते ओकरा याद आवे लागै छै ऊ दिन, जो न दिन ऊ आपनो मालिक पटेल सिंह सें यहें रं देरी सें छोड़ै लेली झगड़ा करी के घर चललो ऐलो छेलै। बलेसर के ई बात एकदम अच्छा नै लगै छै कि वें सब मजदूर के गेला के बादो काम करै। ओकरो मालिक पटेल सिंह बराबर बहाना बनाय के ओकरा रोकी लै छै। यही वास्तें ऊ दिन बलेसर आपनो खेत सें काम छोड़ी के भागी गेलो छेलै। मनेमन

सोची लेले देले कि अब ई खेतों में काम नै करतै । केत्ता समझेले छेले ओकरा मजदूर सिनी कि तों है काम छोड़ी के अछा नै करी रहलौ छें, केन्हें कि है काम छोड़ी के आरो करभैं की ? मालिक जों हटाय देतौ तें आपनों पेट केना चलैभैं । मतरकि बलेसर के ऊपर ओकरो सिनी के समझावै के कोय असर नै होलौ छेले । केन्हें कि बलेसर ई बात खूब अछा सें जानै छै कि दुनिया में मरद रों दुए हाथ बहुत होय छै ।

वें खेत के काम छोड़ी घर पकड़ी लेले छेलै, मजकि दोसरे दिन ओकरा मालिक खुशामद करी खेत पर लै गेलौ छेलै । आरो तें आरो, ऊ दिन सें मालिक पटेल सिंह नें ओकरा खेत के मैनेजर बनाय देले छेलै । ऊ दिन मालिकें ओकरा समझाय के बोलले छेलै, “तों तें जानभे करै छै कि तों ई खेत में सबसे बेसी काम करै वाला आरो ईमानदार मजदूर छें । आरो यहू बात जानै छै कि हमरो सारा काम तोरे ऊपर छौ । आय सें हममें तोरा ई खेत के मैनेजर बनाय दै छिहौ । आबें सें तों ई खेत के अछा-बुरा समझिहैं ।” आरो वही दिन सें बलेसर खेत रों मैनेजर होय गेलौ रहै ।

यहू बात छेलै कि बलेसर मैनेजरी की, ऊ खेत के मालिकी भी नै स्वीकारतियै, स्वीकारी लेलकै तें कुच्छु बात रहै । जों खेत पर काम करबों छोड़ी देतियै तें गुलबिया के दर्शनो मुहाल । गुलबिया के देखले बिना बलेसर पर की बीतै छै, ई सिर्फ बलेसर जानै छै या जानै छै गुलबिया ।

आरो ठीक वहे दिन कोय सपने नाँखी गुलबिया खपरैल घरों के टटिया हटाय बलेसर घरों में चललौ ऐलौ छेलै । बलेसर तें हतप्रभ छेलै । मिनिट भरी तांय ऊ यहें सोचतें रही गेलौ छेलै कि ऊ सपना छोड़ी आरो कुच्छु नै देखी रहलौ छै । सच पूछो तें गुलबिया ओकरो आंखी पर आपनों हाथ नै राखी देतियै तें बलेसर के आँख ओकरा देखते रही जैतियै, नै जानों कत्ते देर । पहलें गुलबिया नें सन्नाटा के भंग करने छेलै, आरो कहने छेलै, “हमरा सब मालूम होय गेलौ छै, तोहें मैनेजर बाबू बनी गेलौ छौ, मतरकि मैनेजर बाबू के ई हालत? चादर

अलगनी पर आरो मैनेजर बाबू चटाय पर। दूसरा गली के दुर्गन्ध आवी रहलो छै आरो धूपकाठी कोन्टा में राखलो छै।” की-की नै गुलबिया बोलतें चललो गेलो छेलै आरो बोलथैं-बोलथैं एक धूपकाठी जलतें दिया सें सुगंधित करी मोखा में खोसी देलें देलै। आरो फेरू ई कही कि ‘हम्में पूबारी चाची साथें ऐलो छियै, हुनी कमली माय सें मिलै ले गेलो छै, छुपाय के ऐलो छी, बस चलै छियौ’ सपने नाँखी गुलबिया ऊ सांझे अलोपित होय गेलो छेलै.....बलेसर के दिमाग में ऊ सब बात एक-एक करी चक्कर काटे लागै छै।

भोरको लाली फूटथैं बलेसर के झपकलो आँख अचकचाय के खुली जाय छै। रात भर ऊ सुते नै पारले छेलै। पटेलसिंह के दबदबा के कारण मैनेजर नै, ऊ बंधुआ मजूर बनी के रही गेलो छेलै। ऊ मने मन सोचले छेलै। आबे ऊ बंधुवा मजूर बनी के नै रहतै।

बलेसर मने-मन फैसला करी लेलकै। आबे ऊ खेत में काम नै करतै, कैन्हें कि पटेल सिंह के दवाब में ऊ ओझराय के रही गेलो छै। आरो ई फैसला करथैं ओकरो चेहरा खिली गेलै। कै दिन सें माथा पर पहाड़ रड एकठो बोझा छेले। अब माथा रुइया रड हौलो होय गेलो छेलै। चार-पांच दिन सें जे घर बलेसर के काटे ले दौड़ै छेलै, आबे वहे घर चम्पा कटेली फूल नाँखी ही नै, मतरकि गुलाबो रड नाँखी महकलो-महकलो लागी रहलो छेलै। गुलाब के महक सें भीजलो माहौल में ओकरा गुलाबो के ख्याल आवी जाय छै। ओकरो हाथो सें बिछैलो चादर आय बड़ा सुख दै रहलो छै। ऊ चादर के धुवी-धुवी हेने महसूस करै छै कि गुलाबो ओकरे नगीच बैठलो छै। आरो वें चादर पर ऊँगली नै फेरी रहलो छै, फेरी रहलो छै गुलाबो के मुलायम हाथो पर, जे हाथो सें गुलाबो चादर बिछाय गेलो छेलै एक रात।

बाहर चिड़िया चुनमुन के चहचहैबो तेज होय गेलो छेलै। बलेसर बिछौना सें उठी के बड़ा परेम सें चादर लपेटी के उठाय दै छै। ऊ नै चाहै छै कि गुलाबो के हाथ सें बिछलो चादर गंदा होय। गंदा केना नै होतै। दिन भर केत्ते कोशी के बालू हवा संग उड़ी के सीधे

घर ऐतें रहै छै। जरा-सा आरो बेर होना छै बस। घर तें जेना कोशी माय के बिछौना होय जाय छै। वें गंदा नै करै लेँ चाहै छै। हठाते ऊ एकटा पंक्ति गुनगुनाय उठै छै, 'दास कबीर जतन सें ओढ़ी, जस की तस दीनी चदरिया।' बलेसर ई चादर केँ गंदा नै होय लेँ देतै। गंदा होय गेलै तें परेम की। पहलें वें चादर केँ अलगनी पर रखै छै, मतरकि ओकरा वहाँ चादर रखवों अच्छा नै लगै छै। फिरू ओकरोँ मन में की होय छै कि ऊ चादर केँ उठाय केँ खूँटी पर रखी दै छै, वै खूँटी पर जेकरा पर ओकरोँ कमीज कुछ देर पहलें टंगलोँ रहै आरो अब वें उतारी केँ आपनोँ देहोँ पर रखी लेलेँ छै आरो चुपचाप घोरोँ सें निकली पड़लै—हवा आरो चिड़िया के चहचहैबोँ केँ पीछू छोड़ी करी केँ कोशी दिस।

घर सें बाहर निकली टटिया ओड़काय केँ आय बलेसर के मन में की होय छै कि भोरकवा उगै के पहिलें करली कोशी दिस जाय छै। जब सें सेठ के मैनेजर बनलोँ छेलै, ओकरोँ जीवन बंधलोँ-बंधलोँ होय गेलोँ छेलै। उजास होलै तें आकाश में चिड़िया सिनी केँ उड़तें देखी केँ आय होकरा होने लागी रहलोँ छेलै, जेना ऊ एगो आजाद पंछी होय गेलोँ छै। सच, आजादी आजादी होय छै। सब तरह के बंधन सें मुक्त। केत्तोँ बढ़िया खाना मिलै आरो सोना के पिंजरा में बांधी केँ राखलोँ जाय, मन पर एक बोझा रही जाय छै। चिड़िया केँ घुमी-फिरी केँ खैवोँ अच्छा लगै छै, केन्हें कि आजाद होय केँ रहना सब्भे चाहै छै। आय केँ महीना सें बलेसर पर कटलोँ चिड़िया होय गेलोँ छेलै। सब तरह के शान-शौकत छेलै। मजदूर सिनी ओकरा सें थरथर कापै छेलै। मतरकि ओकरे आजादी कहुँ कैद होय गेलोँ छेलै। आय केत्ता दिना पर वें नदी दिस ऐलोँ छै। पहलें वें पटेल सिंह के खेते पर जाय केँ खजूर के डंटी सें मुँह धोय छेलै। आय केत्ता दिना के बाद ऊ बांस के बेंत सें धोतै। बित्ता भर बांस हाथ में ले केँ वें चारो दिश हेरै छै। सच्चे, आय सब चीज केत्ता बढ़िया लगी रहलोँ छै। चैत महीना में खुललोँ आरो साफ आकाश। ऐन्होँ बुझाय छेलै, जेना आकाश भी निफिकर छै।

ओकरो कहीं जाय के धड़फड़ी नै छै । छिनमन बलेसर रं ।

‘गंगा स्नान करै लेँ चलली गगल है निया गंगा माय’ के गीत गैतेँ चललोँ आबी रहलोँ छै । बलेसर कान लगाय केँ सुनै छै । बचपने सेँ ओकरा गीत गैवोँ आरो सुनवोँ बढ़िया लगै छै । आरो यही कारण छै कि गंगन हैनिया के गीत सुनथैँ वहू गुनगुनाय उठै छै, मतरकि गंगा माय के गीत नै, ऊ गीत जै में गुलबिया के मन बसै छै ।

गीत गैतेँ ऊ पुबारी टोला दिस बढ़ी जाय छै । ओकरा देखी केँ सबटा भौजाय रस्ता छोड़ी दै छै । पता नै बलेसर की कही बैठै । मतरकि ननकी भौजी केँ रहलोँ नै जाय छै आरो आपनोँ ठोर दाबी केँ मुस्काय केँ पूछै छै, ‘कि बलेसर दियोर, आय हिन्नेँ आवै के फुरसत मिली गेलौँ । जब सेँ मैनेजर बनलोँ छोँ, भौजी सिनी केँ तें भुलाय गेलोँ छौ । दियोर भुली जाय तेँ भुली जाय भौजी केँ, मतरकि भौजी आपनोँ दियोर केँ नै भुलाय छै । हम्में सिनी रोज तोरा याद करै छियौँ । तोरा तें हमरा सिनी केँ ताकै सेँ फुरसत नै मिलै छेलौँ ।’

बलेसर ननकी भौजी के मजाक रोँ जवाबो मजाके में दै छै, ‘भौजी, तोरा सिनी सेँ बात करै वास्तेँ हमरोँ मोँन छटपटाय गेलै । तोरा सिनी साथेँ ई गंगा नदी में नहाय के मजा कुछु आरो छै । तोरोँ दिल्लीगी हमरा बहुत बढ़िया लगै छै । ई रं हंसी-मजाक हमरा खेत में कहां मिलतियै । पटेल सिंह के मैनेजरी करी केँ हमरोँ सब चीज छुटी गेलोँ छेलै । चलोँ, आय गेठ जोड़ी केँ गंगे नहाय लेलोँ जाय ।’ ननकियो कम नै छेलै । बलेसर के बात सुनी वहू टन सना बोली उठलै, ‘गेठ जोड़ै में हमरा कोय दिक्कत नै । मतरकि, जब गुलाबो खबर लेतै तखनी ।’ सबटा भौजाय एक्के साथ ठिठियावेँ लागलेँ छेलै । गीत के सुर बदली गेलोँ छेलै, ई बात सुनी केँ बलेसर अवाक रही जाय छै ।

है की ? ननकी भौजी केँ भीतरिया बात केना मालूम ? हठाते ओकरा लगै छै कि ओकरा पर बारिश होय गेलोँ छै । मतरकि तुरंते वेँ आपना पर काबू पावी लै छै । पता नै की सोची केँ । हुवेँ नै हुवेँ, ननकी भौजी नेँ हेने मजाक करी देलेँ होतै आरो हमरोँ मन के चोर

सहमी गेलै। आरो जो जानिये गेलै ते ठीक, हाते बात खुलतियै, ओकरा सें यही अच्छा छै कि लोगें पहलें सें कुच्छु-कुच्छु जानै। आरू ऊ मुस्कुराय पड़लै अपने आप। एक बार सब्भे भौजी दिश आँख कोनियाय के देखलकै आरो फिरू पटेल सिंह के खेत दिश मलकलौ बढ़ी गेलै।

जखनी बलेसर खेत पहुंचलौ छेलै, वहां खेत में आभियो तांय एकठो मजदूर नै ऐलौ छेलै। बलेसर के आचरज लागै छै कि आय ते वें घर सें नहाय-धोहाय के बाद रास्ता भर झूमते-झूमते ऐलौ छै, तभियो खेत पर सवेरे पहुंची गेलौ छै। अनदिना ते धड़फड़ैले आवै देलै, तभियो मजदूर सिनी खेत पर आवी जाय चुकै छेलै। कहीं ई ओकरो मन के भ्रम ते नै छै। ऊ मने मन सोचै छै। ई बात एकदम सच छै कि ऊ आय खेत पर सवेरे आवी गेलौ छै। लागै छै, आय ऊ भिनसरे सें सब काम जल्दी-जल्दी करी लेलै छै। अनदिना नाँखी देर नै करलै छै। या यहू हुवै पारै कि आय ओकरा कोय काम नै छै खेतों में, यही लेली आय ओकरा सब चीजे इनठिकानौ लगी रहलौ छै। आबे धीरे-धीरे सब मजदूर आवी रहलौ छै। आय मजदूर सिनी बलेसर के खेत में बैठलौ देखी के भ्रम में पड़ी जाय छै। कोय सवेरे आरो कोय देरी सें ऐलै। मजदूर सिनी मने-मन सोचै छै कि बलेसर जरूर ई देखै ले ऐलौ छै कि के की करी रहलौ छै। के देरी सें आवै छै आरो के सवेर। सब बलेसर के नगीच आवी के आपनौ देरी सें आवै के कारण बतावै लागै छै। बलेसर सब कुछ समझी रहलौ छै। यै लेली मने-मन मुस्कुराय रहलौ छै, मतरकि बलेसर केकरो सें कुछ नै बोलै छै। आपनौ-आपनौ कारण बताय सब मजदूर आपनौ-आपनौ ढंग सें काम में भिड़ी जाय छै। कुछ देर पहलें जे भय छेलै, ऊ खतम होय गेलौ छै आरो कामों में फेरू वहे ढीलाय-सीलाय। आय बलेसर खेत में काम करै लेली केकरो डाँटै-डपटै भी नै छै। जब सें मैनेजर बनलौ छेलै, मजदूर पर बहुत गोस्सा आरू रोआब छेलै। चमरू, मंगरू, बसंता, मंदर, सीतबिया आरो सब मजदूर आपनौ-आपनौ काम करी रहलौ छै। काम की करी रहलौ छै, दिन काटी रहलौ छै। बलेसर के आय यहू बात के कटियो टा फिकिर नै

छै। बलेसर सब मजदूर के काम करतें देखी-देखी मनेमन सोचै छै। इस सब मजदूर हमरे रं एगो मजदूरे छै, फेरू हममें एकरा सिनी के कैंहें डांटवै-फटकारवै। मंगरू के जल्दी-जल्दी हाथ चलैतें देखी के ओकरो नगीच आवै छै आरो ओकरो हाथ पकड़ी लै छै। ओकरो हाथ सें कोदार आपनो हाथ में लै के बोलै छै, “की मंगरू, एत्ते जल्दी की छै काम के, होतै न। आरो एत्ते जल्दी काम खतम करी के की होतै। हां, बेसी काम करै सें मालिक बेसी पैसा देतियै तें, ई एगो बात होतियै। बेसी पैसा के लोभ में देहो खटैलो जावै सकै छै। मतरकि काम के कानो कीमत दै। दिन भर खटियो के वहे अजरे टका मिलतै। यहे लेली बेसी काम नै करो। समांग बचावो, समांग सें ई दुनिया-संसार छै, आरो जब तक ई समांग ठीक रहथो, तबे तक घर-परिवार सें लै के मालिक-मुख्तियार पूछथो। ई बात बहुत पुराना बूढ़ो-बुजुर्ग कही गेलो छै आरो ई दुनिया के सबसे बड़का सच भी छेकै।

बलेसर हेनै करी-करी सब मजदूर सिनी के बहलाय काम कराय रहलो छै। ऊ नै चाहै छै कि मजदूर सिनी बेसी खटै। आपनो मनो में केत्ते बात गुनी रहलो छै। मजकि मजदूर सिनी बलेसर के ई रूप देखी के अचरज में छै। ओकरो सिनी रो समझ में नै आवी रहलो छै कि ई बलेसर के आखिर होय कि गेलो छै। कभी गोस्सा देखाय छै तें कभी परेम-भाव। मतरकि कोय बोलै नै छै। चमरू बलेसर के देखी के आपनो आंख उठाय के ओकरो मुँहो रो भाव पढ़ै रो कोशिश करै छै, मतरकि कोय भीतरिया बात पढ़ै नै सकै छै। आय बलेसर केकरो पर जरियो-टा मैनिजरियो नै छांटी रहलो छै। दिन चढ़थें कि देर लागै छै। देखतें-देखतें सुरुज भगवान एकदम माथे पर आवी जाय छै। सब मजदूर सिनी आपनो-आपनो खाना निकाली के खाय रो तैयारी करी रहलो छै। मतरकि बलेसर एक दिश खाड़ो रहै छै। जबे ऊ चमरू नांखी खाली एक मजदूर छेलै तें वहु साथें मिली के खाय छेलै। आपनो साथ लानलो चूड़ा या सत्तू कोय चीजो के पोटली खोली दै, मतरकि कुछु दिनों सें बलेसर के खाना-पीना मजदूर सें हटिये के होय

रहलो छेलै। आय नै ऊ कन्हौं हटलो छै, नै कुछु साथ लानलो छै।

आपनो मनो में पता नै की-की सोचै छै मजदूरो सिनी आरो आपनो-आपनो पोटरी नै खोली रहलो छै कि तखनिये बलेसर चमरू से बोलै छै, “की चमरू दा, आय हमरा खाय पर नै बैठैभौ की ?” एतना कही बलेसर ऊ सबके बीच अनचोके आवी के बैठी जाय छै। आरो चमरू के पोटरी खोली के चौरों के भुंजा के एक फांक मारी के कहै छै, “सब्भे आपनो-आपनो पोटरी निकालो। मिली-जुली खैभै।” मंगरू, बसंता, चमरू, मुंदर, सीतबिया सब्भे आपनो सत्तू निकालै छै, आरो एके जगह नोन मिरचाय लगाय के सानै छै। तबे बलेसर फेरू कहै छै, ‘आय हम्में तोरे सिनी के बीच बैठी के खैभौं। बहुत दिन होय गेलौं, तोरो सिनी रो साथे खैलो-पीलो। चौरों के भुंजा बलेसर दांतों से चबैले जाय छै आरो कहले जाय छै, “हम्में तों एक्के जाति के चिड़िया छियै न मंगरू। अब तोंही सोचै कि मालिक पटेल सिंह में शिकारी नाँखी केत्ते चालाकी से हमरा तोरा सिनी से अलग करी देलकौं। हम्में ते छेलियै तोरे सिनी के बीच के चिरैया। आरो बनाय देलकै हमरा बाज कि तोरे सिनी पर आक्रमण करे सकौं। कैनहें कि हम्में अपने चिड़िया जाति में फूट डालियै। अब ते पटेल सिंह तभिये खुश होय छै, जबे कि लोग सिनी रो खून-पसीना चूसी-चूसी के आपनो शिकारी के देते रहियै। तभे ऊ हमरो से खुश रहै छै।”

बलेसर जखनी ई बात कही रहलो छेल्लै, तखनी चमरू आंख गड़ाय-गड़ाय के बलेसर के बात सुनी रहलो छेलै। बलेसर आपनो मनो रो बात कही के हौला होय ले चाहै छेलै। केत्ता दिनो से ओकरो मनो में एकटा बोझ छेलै। अपने भाय आरो बंधु-बांधव से दूर होय गेलो छेलै। केत्ता अच्छा लगी रहलो छै। मन में एकटा उमग उठी रहलो छेलै। पटेल सिंह ओकरा मैनेजर बनाय के कत्ते सजा देले छै। आपने सब से दूर करी देले छेलै। आय ओकरो आरो मजदूर के बीच के सबटा बंधन टूटी गेलो छै। चमरू बलेसर के बात सुनी के बड्डी खुश होय छै। बलेसर के बात खतम नै हुवे पारै छै कि ओकरो

बात लोकतै मंगरू आपनोँ अनुभव सुनावेँ लागै छै ।

मंगरू गेहुँआ रंग के नाटा कद के मजदूर छै । बदन भरलोँ आरो माथा ठो चौड़ा रं छै । माथा पर कारोँ-कारोँ घनोँ बाल । नाक चौड़ा आरो मोटा । ठोर थोड़ोँ चौड़ा, मतर पतरा । आंख खूब बड़ा नै, मतरकि छोटो नै । हरदम चेहरा पर एगो हंसी बिखरलोँ रहै छै । आरो मन में एकटा दंभ भी रहै छै कि ऊ कलकत्ता शहर सेँ घूमी केँ ऐलोँ छै । ओकरोँ किस्मत साथ देतियै तेँ ऊ मजदूरी नै खटतियै । जानै छै कि मजदूर सिनी रोँ हैसियत की होय छै । चाहै तेँ बहुत बड़ोँ काम करेँ सकै छै ई बिना पढ़लोँ-लिखलोँ, अनपढ़ गंवार । खाली होकरोँ मन में एकटा संकल्प होना चाहियोँ । मंगरू आपनोँ पुड़िया सेँ खैनी निकाली निचलका ठोरोँ के जड़ी में राखतेँ कहै छै, “एकदम ठीक कहै छैँ बलेसर । तोरा सिनी जानबे करै छैँ कि हम्मै दस बरस तक कलकत्ता में मजदूरी करलियै । तोरा सिनी नै जानै छै वहां कुमनिष्ट शासन करै छै । हमरोँ सिनी नाँखी मजदूरोँ के हिमायती मंत्री सिनी वहां रहै छै । सांझे जखनी हमरा सिनी खोली में लौटियै तेँ एक बड़का कामरेड हमरा सिनी के डेर सिनी बात सुनलै । वही बात सिनी में एक कहानी कहलेँ छेलै, जे कहानी हमरा हठाते याद आवी गेलोँ छै, बलेसर तोरोँ बात सुनी केँ । जानै छैँ, ई किस्सा हमरोँ देश के नै छै । ई किस्सा छै बहुत दूर देश के । कही छै कि सात समुन्दर पार एकटा देश छै, की तेँ ओकरोँ नाम बतैनेँ छेलै । देखैँ भुतलाय गेलियै ।’ आरो मंगरू आपनोँ माथा पर जोर डालतेँ हुवैँ याद करै के कोशिश करै छै । थोड़ा देर बाद बोलै छै, “की बतैय्यो, ई खैनी तेँ हमरोँ माथा के सबटा बुद्धिये भुतलाय दै छै ।” याद ऐथैँ माथा झकझोरी केँ बोलै छै, “हां, याद ऐलौ, ऊ देश के नाम छै रोमान । तखनी वहां आदमी खरीदलोँ जाय छेलै, जेना कि हम्मै सिनी भेड़ो-बकरी किनै छियै ।

वहां केरोँ राजा-महाराजा आदमी सिनी किनी केँ ओकरा सेँ गुलामी करवावै छेलै । बिकलोँ आदमी वहां केरोँ राजा के ताकत आरो पैसा के आधार छेलै । की जिनगी होय छेलै ऊ आदमी के, जे बाजार में

ककड़ी-खीरा रं बिकै छेलै आरो खरीदैवाला के मन मोताबिक कटी-मरी जाय छेलै ।”

मंगरू के कहानी सुनै में बसंता हेने मगन होय गेलै कि ओकरो हाथो रो कौर हाथे में रही गेलै । यहू होश नै छै कि ऊ खाना खाय रहलो छै । सीतबिया, जे तनी दूर बैठलो छेलै आरो नगीच आवी जाय छै । ओकरो उत्सुकता एत्ते बढ़ी जाय छै कि दांतो के बीच के भुंजा अभियो तांय वही फंसलो छै । मुंदर मंगरू के मुंहो के बड़ा गौर से देखी रहलो छेलै । जेन्हें मंगरू तनियो टा चुप होय, ओकरो उत्सुकता आरो बढ़ी जाय । मुंदर ने पूछलकै, “फेनू की होलै ?” “ई रं के जीवन में जेकरा से आपनो मनो के कुछ नै करै सकौं, भीतरे-भीतर एक आग सुलगाय रहलो छेलै । मतरकि कोय गुलाम कुच्छु बोले नै सकै छेलै । हां, वहां केरो गुलाम के मालिक तरफ से बहुत तरह के सुविधा मिलै छेलै । छिनमान बलेसरे रं । जेना कि मालिक पटेल सिंह ने हेकरा मैनेजर बनाय के कत्ते सुविधा देले छेलै । आपनो रं खाना-पीना खिलैबो, कखनियो बोरा-बखत कुछ जरूरत-दरकार पड़लौं, ते तुरंते सब चीज जुटाय के देना । देखै छेलै, जखनी बलेसर के मैनेजर बनैलकै, तखनिये से हमरासिनी से बेसी सुविधा हेकरा मिले लागलै । हम्मं सिनी कभियो पटेल सिंह के घर दिश जाय छियै । मतरकि बलेसर बिना कोय रोक-टोक होकरो घर जावे पारे ।”

मंगरू जखनी कहानी सुनाय रहलो छेलै, ओकरो आँखी में एगो चमक उभरै छै । “मतरकि हेत्ते सुविधा मिलला के बादो एक चीज बहुत अखरै छेलै कि ऊ आपनो मन के कभियो कुछ नै बोले सकै छै, आरो नै ते करे सकै छै । जे मालिक चाहतै, वहे गुलाम के करे ले पड़तै । गुलाम के शरीर खूब मस्त आरो मजबूत बनाय लेली ओकरा बढ़िया से बढ़िया खाना मिलै छेलै । कसरत करवैलो जाय छेलै । ओकरा सिखाय-पढ़ाय लेली एगो मास्टर देलो जाय छेलै, जेकरा कि नानिस्ता कहलो जाय छेलै ।”

चमरू जे थोड़ो ज्यादा होशियार छै, मंगरू के बात पर बेसी

विश्वास नै करै छै । वें पूछै छै कि तबेँ वहां खाली यहें करवावै छेलै वहां के राजा । तबेँ मंगरू फेरू आपनोँ बात केँ सच्चा साबित करै लेली बोलै छै, “नै चमरू, जब गुलाम तैयार होय जाय छेलै, तेँ ओकरा आपस में लड़ाय छेलै । खाली लड़ाय देखै वास्तेँ वहाँ अखाड़ा तैयार करलोँ जाय छेलै । वहां केरोँ राजा-महराजा आरो बड़का-बड़का लोग ई लड़ाय देखै वास्तेँ दूर-दूर सेँ आवै छेलै । ई लड़ाय देखै लेली वहां के राजा केँ गुलाम के मालिक केँ ढेरी पैसा दै लेँ पड़ै छेलै । थीरिस देश के गुलाम एगो छोटोँ ऐसनोँ छुरा चलाय में बहुत होशियार होय छेलै । एगो देश अफरीका के गुलाम मछरी पकड़ै के जाल आरो त्रिशूल चलाय में बहुत तेज होय छेलै । दोनोँ देशोँ के ई तरह के लड़ाय देखै लेली खूब लोग जमा होय छेलै । ई तरह के लड़ाय में जे गुलाम जीतै छेलै, ओकरा थोड़ोँ देर वास्तेँ आजाद छोड़ी देलोँ जाय छेलै । मतरकि आखिर ई सब केत्ता दिन चलतियै । आपने समान बंधु-बांधव केँ मारी केँ कोय केत्तेँ दिन रहतियै । एक समय हेनोँ ऐलै कि ई तरह के काम करै लेली ओकरोँ मन तैयार नै होय छेलै । हेने एकठो गुलाम छेलै, जेकरोँ नाम छेलै—इसपाटाकस । होकरा जबेँ अखाड़ा में उतारलोँ गेलै तेँ अपने रं गुलाम केँ मरतेँ देखी केँ ओकरोँ मनोँ में एकटा बदला के भाव जगी उठलै । वें देखलकै कि ओकरे समान गुलाम केँ वहां लड़वैलोँ जाय रहलोँ छै । ओकरोँ अंदर एक आग सुलगेँ लागलै ।” ई बात कहतेँ-कहतेँ मंगरू रोँ चेहरा भी लाल भभूका रं होय गेलै । सौंसे बदन एकदम फड़फड़ाय उठलै । जेना कि पटेल सिंह के ओकरा सिनी सेँ गुलामी कराय छै । ई तरह के गुलामी में मालिक केँ केत्तेँ सुख मिलै छै, मतरकि गुलाम के तेँ देहोँ के खूने बहै छै आरो ओकरोँ जानो जाय छै ।

फिरू आपनोँ कहानी केँ आगू बढ़ैतेँ हुवेँ बोलै छै कि जानै छैं चमरू, इसपाटाकस नेँ की करलकै । तेँ चमरू अचकचाय केँ पूछै छै, “की करलकै मंगरू ऊ गुलाम नेँ ।” तबेँ मंगरू आपनोँ मन के अंदर उठी रहलोँ एक ज्वार केँ दबैतेँ हुवेँ बोललै, जेना कि ओकरा ई बात

बोले लेली कत्ते मेहनत करै ले पड़ी रहलौ छै, छिनमन इसपाटाकस नाँखी, “केत्ता मन बनाय ले पड़लौ छेलै ओकरा ई रं सोचै आरो करै में। जहां गुलाम सिनी के बेददी से काटी-मारी देलौ जाय छेलै आरो वहीं अखाड़ा में लटकाय देलौ जाय छेलै। मतरकि इसपाटाकस के मनो पर एकरो उल्टा प्रभाव पड़लै, हेनै कि वें ई बात के मानै लेली तैयार होय गेलै। जब मरने छै ते केन्हें नी आपनो अंदर के आग बाहर निकाली के मरौं। जे होतै, देखलौ जैतै। आरो इसपाटाकस के जेन्हें मैदान में उतारलौ गेलै, ऊ आपनो मालिके पर हमला करी देलकै।” मंगरू के कहानी खतम होय जाय छै, मतरकि सबटा जन-पाट के कहानी खतम होय के होशे नै रही छै, सब टुकुर-टुकुर मुँह ताकते रही जाय छै। ओकरा सिनी के देखी के हेने बुझाय छै जेना कि वें संझली चौपाल में बैठलौ छै। खेतो में काम करै लेली नै ऐलौ छै। मंगरू आपनो खिस्सा खतम करथैं बलेसर से पूछै छै कि बलेसर, कहानी जे सुनैलियो, हमरे सिनी रं मजदूर के खिस्सा छेलै नी। अब तों की सोचलैं ? तबे बलेसर जे कहीं आपनो दुनिया में कहीं भुतलैलौ छेलै, अकचकाय के पूछै छै, “तों कुछ बोललै मंगरू ?”

मंगरू बलेसर के मुँह देखी के अचरज करै छै, केन्हें कि बलेसर के मुँहो पर एक विचित्र मुस्कान आवी गेलौ छै। हांलाकि हेना के बलेसर मंगरू के कहानी नै सुनले रहै, मतरकि ओकरो उत्तर मंगरू के जवाब नाँखी छेलै। बलेसर ओकरा से कहै छै, “हां मंगरू, तों ठीके कहै छैं, आखिर गुलामी के करै ले चाहै छै। हम्मू नै चाहै छियै। हम्मो आबे पटेल सिंह के खेत में काम नै करवै। आबे हम्मो आपनो खेती करवै। ऊ दिन नत्थू काका हमरा खेती वास्ते लोन लै ले बताय रहलौ छेलै। हम्मो आबे लोन लै के खेती करे पारौं। तों ठीक कहै छैं मंगरू।” तबे मंगरू जे बलेसर के सबटा बात सुनी रहलौ छेलै, आपनो मन के बात के दोहरैते हुवे बोललै, “आय ते है खेती-बारी आरो छोटो-मोटो काम करै ले केत्ते नी लोन मिलै छै। पंचायत के मुखिया ऋण दै छै, बैंक ऋण दै छै, जवाहर रोजगार योजना छै, एन आर पी ई ऋण दै छै,

ओकरा से गरीबों के सहायता मिले है। खाली काम करे वाला के मन में संकल्प होना चाहियो। आरो यहू नै ते तों जानै है न बलेसर, बिलाक के बीडिओ लोन दे सकै है। आरो सब के बात सुनला-समझला के बाद बलेसर मने-मन फैसला करै है, की वें कोय तरह से, कहियो से लोन ले के आपनों खेती करतै। आपनों खेती करै में केत्ते सुख है।

आरो फेनू बलेसर जे फैसला करी लेलकै, से करी लेलकै। आय से वें खेत रो काम नै करतै। आरो बलेसर बिना कुच्छु बोलले उठी के चुपचाप खेत से बाहर आवी जाय है। आय बलेसर के खेत के कोय चीज नै बान्हे पारी रहलो है। नै गाछ, नै बिरिछ, नै पोखर, नै बोरिंग से निकलते पानी। कुछ दिन पहले तक बलेसर के यहें चीज कत्ते प्यारो रहै आरो आय वही सब एकदम वीरानो होय गेलो रहै। बलेसर सब कुछ छोड़ी के, सब कुछ भुलाय के एकदम मुँह फेरी के आगू बढ़ी गेलो छेलै, जेना मशान में कोय अपने आदमी के जराय-पकाय होकरा पंचकाठ दे आगू बढ़ी जाय है। बलेसर छिनमान होने आगू बढ़ी जाय है।

[३]

चैत-बैशाख के महीना चली रहलो है। गरम रो महीना आवी गेलो है। भोरकुआ पर तनी टा बढ़ियां लगै है, केन्हेंकि ऊ समय मौसम थोड़ा ठंडा रही है, मतरकि जेना-जेना समय आगू बढ़ै है, भोरको ठंडा हवा कपूर नाँखी उड़ी जाय है आरो धीरे-धीरे वातावरण में धूप के प्रभाव बढ़लो जाय है। जैन्हें-जैन्हें सुरज भगवान ऊपर उठना शुरू होय है, देह-हाथ घामे-घाम होय जाय है। केन्हो अजीब मौसम होय है ई चैत-बैशाख रो महीना। न तन शीतल होय पारै है आरो नै ते मने शांत

रहेँ सकै छै । जेना-जेना धूप रोँ परभाव बढ़ै छै, वैन्हें-वैन्हें मन के व्याकुलता बढ़ै लागै छै । हेने बुझाय छै जेना कि धूप सें बचै लेली धरती में समाय जांव या फिरू ठंडा पानी सें भरलोँ नदी-पोखर में डूबलोँ सारा दिन बिताय दियै । मतरकि हेनोँ हुवेँ कहाँ पारै छै । एकरा लेँ समय कहाँ मिलै छै । खेती-बाड़ी आरो काम-धंधा या फिरू पेट बांधी केँ रहलोँ जावेँ सकै छै की ? काम तेँ करै लेँ पड़तै । आरो बलेसर सबकुछ जानतै-बुझतै काम शुरू करी दै छै ।

आय सें बलेसर लोन लेली दौड़-धूप शुरू करी दै छै । बलेसर आगा-पीछा देखले बिलाक दिश बढ़ी जाय छै । बिलाक घर सें आठ किलोमीटर दूर छै । मतरकि आय बलेसर के मनोँ में एकटा विश्वास छै कि वें जेना भी हुवेँ, लोन लै केँ रहतै, से आय वें धूपोँ-बताशोँ के ख्याल नै करै छै । बिलाक तक जैतेँ-जैतेँ बलेसर घाम सें तरबतर होय जाय छै । कुर्ता के एको कोना भीजै सें नै बचलोँ रहै छै । एत्ता धूप छेलै बाहर में की, अभी तक तेँ केला रोँ खेतोँ में बैठलोँ-बैठलोँ बुझाय नै छेलै । मतरकि केला के खेत सें अब बाहर ऐतैँ बाहर के धूप-बताश नें बलेसर के सौसे देहोँ केँ भिंजाय देलेँ छेलै । बैशाख के धूप रोँ बाते कुछ आरो होय छै । आरो वहू में कोशी माय के गोदी के । चलै लेली तेँ चली देलकै बलेसर, मतरकि हेत्ता ख्याल नै करैँ सकलै कि वें रास्ता में हेत्ता धूप में पड़ी जैतै । अखनी भगवान बलेसर रोँ सीधा मुँहोँ पर पड़ी रहलोँ छै । आँखी पर घाम चुवी-चुवी केँ आँखी रोँ पिपनी पर गिरी रहलोँ छै आरो बलेसर रोँ आँख बीचोँ-बीचोँ में बंद होय जाय छै । जखनी घाम चूवी केँ आँखोँ के कोरी में घुसी जाय छै , तखनी बलेसर के डिमी हेने लहरेँ लागै छै, जेना कोय आँखी में मिरचाय रगड़ी देलेँ रहै । घाम पोछै लेली आपनोँ कंधा पर के गमछा उतारी केँ आँख-मुँह पोछै छै आरो ओकरा मने-मन ख्याल आवै छै कि यहैँ गमछा सें एक दिन गुलबिया नें हाथ पोछलेँ रहै । आरो जबेँ ऊ गमछा सें आपनोँ मुँहोँ केँ पोछै छै तेँ ओकरा हेने बुझाय छै कि गुलबिया आपनोँ मुलायम-मुलायम हाथोँ सें ओकरोँ देहोँ रोँ घाम पोछी रहलोँ छै । बड़ा

सुख मिलै छै बलेसर केँ । ओकरा एक मिनटोँ लेली लागै छै कि धूप अनचोके नरम पड़ी गेलोँ रहै । एकदम नरम । गुलबिया के याद में अद्भुत असर छै, मतरकि धूप तेँ धूपे छै । सब कोमल भाव केँ उलाय-पकाय केँ राखी दै वाला । बलेसर केँ लागै छै कि ओकरोँ देह कुम्हारोँ के आवा बनलोँ जाय रहलोँ छै । वें पसीना सेँ भीजलोँ आपनोँ कमीजोँ के बदन खोलै छै आरो जोर-जोर सेँ फूक मारी देह-हाथ केँ ठंडा करै के कोशिश करै छै । आरो चलतेँ-चलतेँ बलेसर केन्हौ करी केँ बिलाक पहुँचिये जाय छै, मतरकि बिलाक तक पहुँचतेँ-पहुँचतेँ आखिरकार बलेसर थकी केँ चूर-चूर होय जाय छै । एत्तेँ घामे-घाम होला के बादो बलेसर आपनोँ देहोँ पर के सबटा पसीना पोछी केँ आफिस के बाहर एक बार थकथकाय केँ बैठी जाय छै । ओकरा छाँव में आवी गेला के बादो चैन नै मिली रहलोँ छै । वें कमीज खोलै छै आरो गमछे नाखी पसीना केँ निचोड़ी दै छै । फेनू बदन पर राखी लै छै आरो कुछ देर लेली आँख बंद करी लै छै, जेना देहोँ में बरफ के ख्याल करतेँ रहै । आपनोँ साँसोँ केँ, जे अभी तेज चली रहलोँ छै, संभारै छै । आफिस के सीढ़ी पर बैठलोँ-बैठलोँ दू-तीन मिनट में केत्ता बात सोची लै छै । भीतर सेँ आदमी आवी रहलोँ छै आरो केत्ता नी आदमी भीतर जाय रहलोँ छै । आदमी सिनी रोँ तांता लगलोँ छै । बलेसर भी उठी केँ भीतर जाय छै । बलेसर देखै छै कि वहाँ कोठली में एकटा टेबुल पर एगो मोटोँ ऐसनोँ आदमी बैठलोँ छै । हेने बुझाय छै कि ऊ बड़ा बाबू रहै । केन्हेंकि सबटा आदमी ओकरे आस-पास बैठलोँ या खड़ा छै । दत्ता बाबू यहें बतैलें छेलै कि मोटोँ रंग के आदमी मिलतौँ भीड़ोँ सेँ घिरलोँ, वहेँ बड़ा बाबू होथौँ । बलेसर दत्ते बाबू सेँ एगो आवेदन-पत्रो लिखवैनेँ ऐलोँ छै, जेकरा वें बड़ी हिफाजत सेँ प्लास्टिक के झोली में लेनेँ छेलै कि कहीं घामोँ सेँ भीजी नै जाय । वें कमरोँ सेँ ऊ झोली निकाली लै छै आरो झोली सेँ ऊ चपोतलोँ कागजो, जेकरा लै ऊ बड़ा बाबू दिस बढै सेँ पहिलें एक बार फेनू आपनोँ विश्वास लेली दूसरोँ आदमी सेँ पूछै छै । ऊ आदमी बताय छै, “होँ, टेबुल पर जे मोटोँ रं के आदमी बैठलोँ

छै, ऊ ई बिलाक के बड़ा बाबू छै। ओकरो नाम सुमेर सिंह छै, अभिये दस रोज पहिलें ऐलो छै।” वें आदमी एक्के सुरो में एत्ते जानकारी दै दै छै। बलेसर देखै छै कि एक-दू टा आदमी, जे पेंट-कुरता में रहै, वहीं पर कुरसी पर बैठलो चाय सुड़की रहलो छै। बलेसर ऊ बड़ा बाबू के बड़ा गौर से देखै छै।

ओकरा ख्याल आवै छै कि ई आदमी के छः-सात रोज पहिलें वें पटेल सिंह कन देखलें छेलै। पटेल सिंह-सुमेर सिंह। हुवें सकै छै कि रिश्तेदारी में रहें। बलेसर मने-मन विचारो के विन्डोवो में उड़ें लागै छै। काम हुवें पारें। जो ऊ आपनो पता-ठिकाना बतावै छै ते सुमेर सिंह ओकरो मदद करें पारें। बलेसर के मन में यहू बात उठै छै कि कहीं सुमेर सिंह ने पटेल सिंह के है सब बात बताय देलकै ते ओकरा जोहो लोन मिलै वाला होतै, वहू नै मिलतै। पटेल सिंह ते कभियो है नै चाहें पारें कि हमरो केला के एकड़-दू एकड़ के खेती रहै। मतरकि सुमेर सिंह भला ई सब बात पटेल सिंह के कैन्हें कहतै। यहाँ ते कामे छै गरीबो के मदद करना। तबे हमरा कैन्हें नी करतै। वें पटेल सिंह के नाम कहतै, तबे बड़ा बाबू जरूरे ध्यान देतै। आरो यही सब सोचतें हुवें बलेसर बड़ा बाबू के नगीच आवी के आपनो आवेदन-पत्र के सुमेर सिंह के आगू बढ़ाय छै छै।

सुमेर सिंह दूसरो आदमी से बात करै में मशगूल छेलै। से ऊ बलेसर रो आवेदन-पत्र लै के आपनो टेबुल पर फाइल रो नीचूं रखी दै छै। बलेसर ई देखी के कि सुमेर सिंह ओकरो आवेदन-पत्र फाइल के नीचूं में राखलो छै, जरूरे हमरो काम करतै, सोची खुश होय जाय छै। सुमेर सिंह ठीक से बलेसर के देखले बिना ओकरा हाथ से बैठै के ईशारा करी दै छै आरो फिर आपनो बात में मगन होय जाय छै। बलेसर बहुत आशा आरो उम्मीद लै के वहीं बाहर में आवी के बैठी जाय छै। लोग बेद के ऐते-जैते देखी के ओकरो विश्वास जमै छै कि यहाँ एत्ते आदमी आवी-जाय रहलो छै, जरूरे लोन लेली ऐते-जैते हुवै।

थोड़ा देर के बाद बलेसर के भीतर से बुलाहट होय छै। बलेसर मने-मन बहुत खुश होय छै कि अब ओकरो बुलाहट होय गेलो छै। अब ओकरा लोन जरूरे मिली जैतै। हुन्ने सुमेर सिंह आपनो कुर्सी पर ओठगांय के बैठलो छै। बलेसर ओकरो सामना में जाय के हाथ जोड़ी के खड़ा होय जाय छै। सुमेर सिंह होने कुरसी पर ओठगेलो हुवे बैठलो पूछे छै, “तोरो नाम की ?”

बलेसर हाथ जोड़ले-जोड़ले धीरे से बोलै छै, “बलेसर।”

“तोरो बापो रो नाम की।”

“शिवचरण।”

“की शिवचरण।”

“शिवचरण मंडल।”

“ते होना के नै बोलै। खाली शिवचरण कहला से भगवानो कुछ समझे पारतो की ?”

“तो काम की करै छै।”

“खेती-बाड़ी रो काम।”

“तो की चाहै छै।”

“लोन।”

“कथी लेली।”

“खेती-बाड़ी करै लेली।”

“खेती-बाड़ी लेले लोन।” बड़ा बाबू रो आँख ते जेना कौड़ी नाँखी फैली के रही गेलै। आरू फिरू आँख के घोंघा नाँखी चलैते हुवे कहले छेलै, “अरे बलेसर, बारी जोगै लायक ते ऋण नै उठावे पारै छै, ते खेती लोन लेभे ते चुकाबे पारभे की।” आरो हठाते फिरू सोचते आपनो बातो के बदलते हुवे बड़ा बाबू बड़ी नरमी से कहे लागे छै, “केते लेना छै।”

“बीस हजार।”

“मतरकि एत्ता पैसा लै लेली पहले चार-पाँच हजार ये टेबुल पर खर्च करै ले पड़तौ, करे पारभे।”

“बाबू, हममें सिनी ठहरलां गरीब जन-मजूर, कहाँ से एत्ते पैसा खरच करे पारभौं।”

“तबे है लोन लै लेली कथी ले ऐलो छें। है लोन-फोन एत्ते आसान नै छै, जेत्ता आसान तों बुझी रहलो छें।”

“हुजूर, मतरकि हमरे गामो के कैएक आदमी के है लोन मिललो छै। जे हमरे नाँखी गरीब छै।” “मिललो छै ते हेने ? गलैलकै ते पानी निकललै। पानी ले पहले लावे के जोड़ बैठावे बलेसर।”

सुमेर सिंह आबे ज्यादा बहस करे ले नै चाहै छै, केन्हेंकि ओकरो आस-पास ढेरो लोग के भीड़ जमा होय गेलो छै। ऊ बलेसर के टालै लेली एक हफ्ता बाद आवै लेली कहै छै, “ठीक छै, तों पाँच-छों रोज बाद ऐहियौ। तालुक हममें बीडिओ साहब से बात करी के राखभौं।”

आरो बलेसर आशा-निराशा के बीच झूलते बाहर निकली जाय छै। बाहर अभियो भी ओत्ते रौदा छेलै। चार बजी रहलो छै। मतरकि रौदा देखी के मन हेने बुझाय छै कि भगवान दिस नजरी उठाय के भी नै देखै। रुकौ ते नै सकै छै। फिरू बलेसर आपनो गमछा से मुँहो के ढाकते हुवे बांधी लेलकै आरो निकली पड़लै घर दिस।

आय बलेसर घर ऐते-ऐते एत्ते थकी के चुर होय जाय छै। ओकरो देहो के एक-एक हाड़ चिनकी रहलो छै, जेना देह से टूटी के बाहर निकली जैतै। वे आपनो हाथ पीछू करी के रीढ़ के सहलावे लागै छै। ओकरा लागै छै कि केत्ता अच्छा होतियै कि कोय ओकरो चूर-चराहते बदनके आहिस्ता-आहिस्ता मलतियै कि हठाते ओकरा गुलाबो के याद आवी जाय छै। आय गुलबिया पास होतियै ते ऊ कि हेने दर्द से बेचैन रहतियै। देहो के एक-एक गिरेहो पर मुलायम हाथ ससारी-ससारी के सबटा दर्द बिछी लेतियै। मतरकि गुलबिया आय ओकरो पास कहाँ छै। बलेसर मने-मन सोचै छै कि आय नै छै ते की, कल ते गुलबिया हमरो पास होतै घड़ी-दू-घड़ी आरो एक-दू दिन-रात वास्ते नै, सौसे जिनगी लेली। आरो ई सोचते-सोचते बलेसर के मोन

भटकी जाय छै आरो देखथैं-देखथैं दरद भी टीसना कुछु कम होय जाय छै। बलेसर दरद के जगह में ओकरो मुलायम हाथ केरो स्पर्श महसूस करै छै।

[४]

आय हफ्ता रोज गुजरी गेलो छै। आय के दिन सुमेर सिंह नें बलेसर के बुलैने छेलै। ऐत्ता दिन बलेसर केना काटलकै, वहीं जानै छै। दिनों में पचीसो बार औंगरी पर दिन गिनतें रहै छेलै। आय दिन पुरथैं ओकरो चेहरा पर आशा आरो खुशी के अद्भुत प्रकाश छेलै। ऊ एकदम भोर उठलो छै। सबटा काम निबटाय लेले छै आरो गमछी में पाव भरी सतू बांधी के बिलाक दिस ओरियाय जाय छै। ओकरा मालूम छै कि जरा-सा दिन चढ़थैं धूप केन्हो तीखो होय जाय छै। आगिन में जरला सें ते अच्छा यही छै कि तीन घंटा बिलाक के बाहरे बैठलो जाय।

बिलाक खुलथैं बड़ा बाबू हाजिर होय गेलो छै। मतरकि बलेसर सबसे पहिलें केना घुसतियै। ई सोची के कुछु देर बाहरे बैठलो रही जाय छै आरो हुन्ने बड़का बाबू होने आदमी सें घिरलो चल्तो जाय छै। केत्ता आदमी के निवटैला के बाद बलेसर के बुलाहट होय छै। बलेसर एक आशा आरो उम्मीद लै के बाहर सें हाथ जोड़ले-जोड़ले बड़ा बाबू के नगीच पहुंची जाय छै। बलेसर के देखथैं बड़ा बाबू ओकरा सें पूछै छै, “की बलेसर, तों ते पटेल सिंह के खेत में काम करै छेलैं।”

“हां हुजूर, हम्म हनको खेत के मजूर छेलियै।”

“आरो पटेल सिंह के खेत में तों मैनेजरो छेलैं ?”

“हां छेलियै ते, मतरकि आबे हम्म हनको खेतों पर काम

नै करै छियै।”

“हमरा तेँ यहू पता छै कि पटेल सिंह नें तोरा मैनेजर बनाय के साथें-साथें खूब सुख-सुविधो देलें छेलौं। फिरू तोरा कौन दरकार पड़ी गेलौ लोन के।”

“हुजूर, आबेँ हम्मं आपनोँ एकड़-दू एकड़ जमीन लै केँ खेती करै लेँ चाहै छियै।”

“ठीक कहै छै, तों मजदूर सिनी केँ केत्तो सुविधा देलोँ जाय, मन नै भरै छौं। जरियो टा सुविधा मिललौं नै मिललौं कि माथोँ पर चढ़े के कोशिश करेँ लागलौ। अभियो कुछू नै बिगड़लोँ छौं, तों पटेल सिंह के खेत रोँ काम नै छोड़ोँ। लौटी जा खेत में काम करै लेँ। हम्मं तोरा तोरोँ भलाई वास्तेँ भी समझाय रहलोँ छियौँ। जहां तोरोँ बाप-दादा के नाभि गड़लोँ छौं, वांही काम करी केँ तोरोँ मुक्ति मिलतौँ। की है लोन-फोन के चक्कर में पड़ी गेलोँ छै। नै सकेँ सकभैँ।”

“नै हुजूर, आबेँ हम्मं हुनकोँ खेतोँ में काम नै करवै। हमरा लोन मिली जाय तेँ हम्मं करवै तेँ अपने खेती करवै।” ई कहतेँ बलेसी के चेहरा पर मन के एक विश्वास भाव झलकी उठलोँ छेलै।

सुमेर सिंह के बहुत समझैला के बादो बलेसर आपनोँ बातों पर अडिगे रहै छै। बड़ा बाबू तबेँ थोड़ा गोस्साय केँ बोलै छै, “तेँ ठीक छै। तों पहलेँ पाँच हजार टका ई टेबुल पर रखी दें तबेँ तोरोँ लोन वास्तेँ सोचलोँ जैतौ।”

बलेसर बड़ा बाबू के ई रुख देखी केँ थोड़ोँ घबड़ाय जाय छै, मतरकि फेरू हाथ जोड़ी थोड़ोँ धिधियैतेँ हुवेँ बोलै छै, “हुजूर, हम्मं पहलेँ कही चुकलोँ छियौँ कि हम्मं ठहरलां गरीब-गुरुवा। हेत्ता पैसा कहाँ सेँ लानेँ पारवै आरो फिरू तोरोँ सिनी रोँ यदि गरीब-गुरुवा पर किरिण होतै, तेँ हम्मं गरीब तेँ मरिये जैवै। तों तेँ हमरोँ मालिक पटेल सिंह केँ जानवे करै छौ। ई तेँ हम्मूं आबेँ जानी गेलोँ छियै कि तोहोँ पटेल सिंह केँ जानै छौ। हम्मं हुनकोँ खेत पर बहुत दिन तक खटलेँ छियै हुजूर। जोँ आपनेँ कोशिश करवै तेँ हमरा ई लोन जरूरे मिली जैतै।”

मतरकि सुमेर सिंह पर ओकरो एत्ते गिड़गिड़ैवों के कोय असर नै होय छै ।

[५]

दत्ता बाबू नें बलेसर के मुँह देखते हुवे पूछलकै, “मतरकि अखनी तोंय जाय कहाँ रहलो छें ।”

बलेसर आपनो आँखी के गोल-गोल घुमैते हुवे बोललै, “हम्मैं ई गाँव के मुखिया पटेल सिंह, जे हमरो खेत के मालिको छेलै, सें मिलै वास्तें जाय रहलो छियै । ओकरा सें लोन मिलै लेली फिरू बात करवै ।”

दत्ता बाबू ओकरो बात सुनी के अचकचैतें हुवे एकाएक बोली उठै छै । कुछु गंभीर बात । बलेसर जानै छै, जखनी दत्ता बाबू कोय गंभीर बात कहै छै, तखनी हुनी आपनो बांही के कुर्ता ऊपर-नीचें दस बेरी जरूरे करै छै, चश्मा नाकी पर ठीक सें राखै लेली ओकरा पाँच बार संभारै छै । अखनियो दत्ता बाबू ठीक वहे रं करे लागले छेलै । आरो हठाते फिनु रुकी के बोलै छै, “तों की पगलाय गेलो छें बलेसर, जे मुखिया पटेल सिंह लग जाय रहलो छें । आबे तोंही सोचें, जे सुमेर सिंह नें तोरा लोन नै देलकौ, अब ई पटेल सिंह तोरा लोन की देतौ । आरो तों ते जानबे करै छें, हमरो देश के सबसे बड़ो दुश्मन छै हमरो जाति-व्यवस्था आरो अमीरी-गरीबी के भेदभाव । आबे तोरो केकरो कन प्रयास करना बेकार छै । हमरो मानें ते तोरो पास बस एक्के सहारा बची गेलो छै । तों ओकरो कन जाय के कोशिश करें ते हमरा विश्वास छै कि तोरो खेती लेली पैसा के व्यवस्था होय जैतौ ।” एक्के साँस में एत्ते बतैते-बतैते दत्ता बाबू के साँस फुले लागले छेलै । साँस

फुलै के बेमारी हुनका पौर साल सें लगी गेलोँ छै । ऊ आपनोँ साँस केँ स्थिर करै लेली जेन्हें रुकै छै कि बलेसर के अंदर के बेताबी बढी जाय छै, ई जानै लेली कब, कहाँ ओकरोँ काम हुवेँ पारै ।

बलेसर के मुँहोँ पर एक आशा के किरण फुटी जाय छै आरो ऊ बेचैनी में पूछै छै, “ऊ कहाँ दत्ता बाबू ?”

दत्ता बाबू के साँस तबतक स्थिर होय गेलोँ छेलै । ऊ आपनोँ बात केँ बोलै लेली बलेसर के सहारा लेतेँ हुवेँ बलेसर के कंधा पर आपनोँ हाथ रखतेँ ओकरा समझैतेँ हुवेँ बोललै, “बलेसर, तोरोँ तेँ बाप-दादा केँ हम्में जानै छेलियौ । जिनगी कटी गेलौ ई भूमि बाबू कन । हुनकोँ देहरी पर काम करतेँ आरो रिन-कर्जा लेतेँ-देतेँ हुवेँ । तहूँ कैन्हें नी हुनके कन जाय केँ करजा मांगै छैं । हम्में जानै छियौ, वें तोरा जरूरे रिन देतौ । हुनकोँ तेँ पैसा लै-दै के कामे छै । आरो फिरू वहाँ पैसा खरचा-उरचा करै के बात नै उठै छै । कैन्हेंकि तोरोँ बाप-दादा केँ वें चिन्हवे करै छेलौ । पूरा गांव-टोला के लोग तेँ छोड़ी दें, इलाका-बियान भरी के लोग आवी केँ हुनका सें करजा लै छै । यही सूद के पैसा सें देखै नै छैं, कत्तेँ बड़का महल खड़ा करी लेलकै । हमरो बेरा बखत लाख-दू लाख हुनिये भूमिबाबू संभालै छै ।

ई बात बलेसर के मनोँ में धंसी जाय छै । ठीके कहै छै दत्ता बाबू । हमरो बाप-दादा नें हिनके सें पैसा-कौड़ी लै केँ हमरोँ फूफीसिनी के शादी-बीहा करने छेलै । तब ऊ छोटी छेलै । माय-बाबू बोलै छेलै तेँ ऊ सुनलेँ छेलै । हम्में आबेँ भूमियक बाबू कन जैवै । जेना भी होतै रिन-करजा लेना छै आरो हुनके सें लेवै ।

बलेसर दूसरे दिन आपनोँ गांव के महाजन भूमि चाचा के घर पहुंची जाय छै । घर की छै, महल छै । एतेँ बड़ोँ हाता तेँ ओकरोँ मालिक पटेल सिंह के भी नै होतै, जेत्ता बड़ा में भूमि बाबू के छै । ठीक कहै छेलै दत्ता बाबू । खूब पैसा कमैलेँ छै भूमि बाबू नें । एक बीघा रोँ हाता तेँ जरूरे होतै । एक क्षण लेली बलेसरोँ के मन में आवै छै, जोँ ऊ केला के खेती में सफल होलेँ तेँ यही रं हवेली बनतै । चारो बगल

शीशम के आरी बनाय देलें छै। बीचों में महल छै। केत्ता अच्छा रंगोली टीपलें घर छै। बाहर रों मिसतरी नें बनैलें छै। दादा बोलै छेलै। घर के आगू में एगो बड़का रं सीढ़ी छै। ओकरा पर चढ़थैं बड़का गो बरामदा छै। बरामदा के बाद भूमि बाबू के बैठै लेली बड़का ठो बैठकखाना। जेकरा में भूमि बाबू आरो हुनको मुनीमजी बैठै छै। बलेसर बच्चा में केत्तें आय-जाय छेलै, ई घर में आपनों बाप-दादा के साथ। भूमि बाबू के नाम बहुते छै ई गांव में। भूमि बाबू के नाम जी पर ऐथैं हुनको समूचा बात ओकरो दिमागों में घुरे लागै छै।

भूमि बाबू गोरा रं के लंबा-चौड़ा शरीर वाला लोग छै। रंग हेत्तें गोरा छै, जेना रोज दूधे सें नहैतें रहै। भगवानों के देलें रंगे नै छै, मतरकि मुंहो-कान सुन्दर छै। लम्बा ठारो नाको पर बड़का-बड़का आँख। मूँछ बड़ों-बड़ों रोबदार। भूमि बाबू के कोय नै कहै कि लेन-देन वाला साहूकार छै।

जखनी सीढ़ी पार करी के बलेसर भूमि बाबू के पास पहुँचै छै, बाहरे सें हाथ जोड़ने-जोड़ने तें ओकरा हठाते आपनों नगीच देखी के भूमि बाबू थोड़ा हतप्रभ होय छै। मतरकि तखनिये हुनी एकरों आवै के बातों सें एकदम तटस्थ होय जाय छै। भूमि बाबू के ई समझतें देर नै लागै छै कि ई हमरा पास कुछ मांगै लेली ऐलें रहै। भूमि बाबू आपना के हेने दिखाय रहलें छै कि ओकरा अभी बात करै के जरियो टा फुरसत नै छै। मतरकि बलेसर मन में पक्का ठानिये के ऐलें छै कि ऊ आय भूमि बाबू सें करजा लैइये के जैतै। होकरो लेली जेत्तें देरी होकरा यहाँ बैठै लें पड़े, ऊ यहाँ बैठतै। आरो होकरा लेली ऊ गोड़ो पकड़ी लेतै। वें गोड़ पकड़िये लेतै, तें की होतै। पुशत-पुशत के जिनगी तें हिनके सिनी के गोड़ों के नीचें कटी गेलें छै। आय हम्में गोड़ पकड़िये लेवै तें की। आरो बलेसर आपनों कोनो बात के ख्याल नै करी के सीधे गोड़ पकड़ी लै छै। भूमि बाबू आपनों गोड़ों के झटकी के हटाय लै छै। फेनू कुछ नरम-नरम होतें हुवें पूछें लागै छै, “की बलेसर, कोनो बात छौ की ?” तबे बलेसर अकचकाय के भूमि मालिक के

तरफ देखी फेनू हाथ जोड़ी के बोलै छै, “हां मालिक, हम्में आपनो खेती करै के सोचै छियै।”

“मतरकि, तों तें पटेल सिंह के खेत में काम करै छैं, फिर ई कौन खेती के बात करी रहलौ छैं।”

“आबे हम्में आपनो केला के खेती करवै।” बलेसर आपनो बात के जोर देतें हुवे कहै छै।

“तों जानै छैं, आपनो खेती करै में कल्ले टका के जरूरत होय छै ? आरो फिरू ई महीना-दू महीना वाला खेती नै छै। पूरे एक बरस रो खेती छै। तों हेत्ता दिन ई खेती करे पारभैं। बाहरो सें देखै में ई खेती-बारी बढ़िया लगै छै बलेसर, मतरकि भीतर हुलकला सें सब मरम समझै में आबे लागै छै। ई सब खेती-बारी बड़ा-बड़ा लोग वास्तें छै। जे आपनो पैसा के जरियो टा पैसा नै समझै छै, लगैतें रहै छै। तबे ऊ जाय के एक साल में कुछ पैसा बनै छै। खाद-बीज के दाम आबे आकाश छूवी रहलौ छै रे बलेसर।” भूमि बाबू नें बलेसर के मनसा के समझतें हुवे होकरा हारै के कोशिश में कहलकै। “हम्में तें यूं कहभौ, तों है सिनी बात दिमागो सें निकाली दें आरो वही पटेल सिंह रो खेती में ठाठ सें मैनेजरी कर आरो दोनों जून के रोटी खो।”

बलेसर, जे भूमि बाबू के बात के बड़ा ध्यान सें सुनी रहलौ छेलै, ओकरो विश्वास के कहीं सें डिगाबे नै पारलकै। बलेसर आपनो मनो के विश्वास के आरो गहरैतें हुवे बोललै, “जे भी हुवे मालिक, आबे हम्में करवै तें आपनो खेती। आरो हम्में पैसा लेली ऐलो छियै, मनो में एगो विश्वास लेलै कि आपने हमरो बाप-दादा के रिन-करजा दे छेलौ आरो हमरो बाप-दादा चुकाइये के गेलो छै। हम्मूं आपने के ई रिन चुकाय देवै।” भूमि बाबू मनेमन सोचै छै—ई बलेसर हमरो पीछा नै छोड़तै, तभियो एक ढेला फेंकी के हुनी टालै के अंतिम परयास करै छै आरो बलेसर सें बोलै छै, “रे बलेसर, तोरो बाप-दादा के बात कुछ आरो छेलै। रिन-करजा लै छेलौ तें यही लेली हमरे द्वारी पर खटतें-खटतें जिनगी काटी देलकौ। आरो फिरू तोरो बाप-दादा रो खेलो-पीलो

शरीर छेलौ, जे खेती-बारी सें लै केँ घर-अंगना तक संभारी दै छेलौ । तोरो तेँ ई जवानियो में शरीर केन्होँ रोगिये रं होय गेलोँ छौ । हम्में चाहबौ करौँ कि तोरोँ देह खटाय केँ टका वसूली लै तेँ वहू संभव नै छौ । सब धन बुड़ै वाला ही लगै छै । तों हमरोँ देहरी पर की काम करभैं । आरो हम्में तोरा कोय काम दियौ नै पारौँ बलेसर । फिरू तोंही बतावैं, हम्में तोरा कौन बात लेली रिन-करजा देभौ ?”

“मतरकि, हम्में आपना सें वादा करी रहलोँ छियै मालिक कि हम्में खेती सें जे पैसा होतै, रिन चुकाय देवै ।” बलेसर फिरू आपनोँ बात दुहरावै छै ।

“अरे बलेसर, खेती-बारी के कोनो भरोसा छै । साल भरी में की होतै, की नै होतै । आरो कम सें कम हम्में तेँ भविष्य के बातों पर तनियो टा भरोसा नै करै छियै । कोशी के बाढ़ केँ, के जानै छै । केकरो घर-बार, खेत-पतार कखनी पानी में समाय जैतै, एकरोँ लेखा तेँ भगवानो के पास नै छै कि तोहूँ है नै जानै छैं कि तोरोँ गांव सेमापुर के नित्यानंद के केला के खेती बारगिये आंधी-बाढ़ में दहाय गेलोँ छेलै, की करेँ पारलकेँ नित्यानंद । हमरा सें तेँ तों पैसा भविष्य में नै लेभैं, पैसा तेँ अभी तुरत लेभैं । आरो अखनी पैसा लै वास्तें तोहों की इन्तजाम करलेँ छैं ।” भूमि बाबू आपनोँ मनोँ के बात घुमाय-फिराय केँ बलेसर के नगीच राखै छै ।

बलेसर बहुत सोचै-विचारै के बाद ई फैसला करै छै कि ऊ आय जे होतै, केन्हौ करी केँ पैसा लेतै जरूर । ऊ कुछू देर मनोँ में उपाय सोचै छै आरो फिरू मजबूती साथें कहै छै, “हमरोँ जर-जमीन आरो खेती-बारी बंधक-रेहन पर राखी लियै मालिक । जबेँ हमरा पैसा होतै, हम्में छोड़ाय केँ लै जैवै ।”

भूमि बाबू केँ आभियो तांय है बातों पर विश्वास नै होय छै कि बलेसर आपनोँ जमीन आरो झोपड़ी रेहन राखी केँ करजा लेतै । मतरकि जमीन-जग्घा रेहन पर राखी केँ करजा लै के बात सुनथैं भूमि बाबू के मनोँ में लावा फूटेँ लागै छै, जे भाव केँ छुपैतें हुवें हुनी फिरू

कहलकै आरो आपनो विश्वास लेली फिरू पूछे छै, “की हेने मुँहामुँही बोली देलैं आरो हम्मं विश्वास करी लियौ। कल जों तों आपनो बात सें फिरी जैभैं तबेँ।”

“तेँ ठीक छै मालिक। जों हमरो बातों के विश्वास नै होय छौं, तेँ हम्मं लिखी केँ दै छियै, आपने रो विश्वास लेली।” भूमिबाबू के ईशारा पावी मुंशी जी दराज सें कजरौटी आरो एकटा सादो कागज बलेसर के तरफ बढैलकै आरो वही सादा कागजों पर बलेसर नें आपनो कजरौटी वाला अंगूठा जेन्हें बढैलकै, वैन्हें ओकरो अंगूठा जहाँ-के-तहाँ रुकी गेलै।

भूमि बाबू केँ बलेसर के मनो के बात केँ समझतेँ देर नै लागलो छेलै। से हुनी कहै छै, “देख बलेसर, अभियो सोची ले, हम्मं तेँ कहभौ कि करजा-रिन लै के चक्कर में आपनो पुस्तैनी घर-जमीन कोय रेहन पर नै रखै छै। लोग मरियो जाय छै, तहियो कोय आपनो डीह नै बेचै छै, नै रेहन रखै छै।”

बलेसर नें भूमि बाबू के बात सुनलेँ छेलै आरो मनो के भाव छुपैतेँ हुवेँ झट सना कहलेँ छेलै, “नै, मालिक नै। हम्मं तेँ ई सोची रहलो छेलियै—अंगूठा के टीपा ई कोरा कागज पर कहाँ देलो जाय ?” आरो बलेसर मुंशी जी के बतैले अनुसार काजल सें आपनो अंगुली के निशान दै दै छै। भूमि बाबू केँ जब विश्वास होय जाय छै, तबेँ ऊ आपनो कोठनुमा बक्सा सें बीस हजार टका निकाली केँ पाँच बेर हाथ सें गिनतेँ हुवेँ फिरू मुंशी जी केँ गिनै लेँ दै छै। मुंशी जी तीन बार मुंह अंगुरी छुवाय केँ रुपया गिनै छै। आरो तबेँ भूमि बाबू बलेसर के हाथ में देतेँ हुवेँ बोलै छै, “ले बलेसर, बढिया सें गिनी ले।” आरो जब तक बलेसर रुपया लै केँ गिनतेँ रहलै, तब तक भूमि बाबू आँख गड़ाय-गड़ाय केँ रुपया केँ देखतेँ रहलै।

आय केत्ता दिन के बाद बलेसर के मन के बात पूरा होय गेलोँ छै। ओकरो चेहरा पर पैसा पैला के बाद एगो निश्चिन्ती आवी गेलोँ छै। आबेँ मने-मन केत्ता बात सोचतेँ हुवेँ वें पैसा केँ आपनो कमर

के अंटी में खोसते हुवे घर आवी जाय छै। बहुत दिन बाद आय बलेसर के वहे बिछौना, जे कल कांटा नाँखी चुभै छेलै, रुइया नाँखी मुलायम लगी रहलौ छै। बलेसर आपनो कमर में बंधलौ रुपया के बार-बार छुवै छै आरो मने-मन सोचै छै—ई पैसा हम्में केना संभरी के रखियै। जो आय गुलबिया यहाँ रहतियै ते वही एकरा संभारी के रखतियै। हर बार बलेसर के गुलाबो के कमी अखरी जाय छै। मतरकि आय नै छै ते की, कल गुलबिये हमारो जिनगी के रानी होतै आरो बलेसर के आंखी में गुलबिया फूलों सें सजली रानी नांखी रंग-रूप में उतरी ऐलौ छै। ऊ देखै छौं, केला खेती में वें एत्ते पैसा कमाय लेलें छै, हेने बुझाय छै जेना बलेसर एक बड़का सेठ होय गेलों छै आरो गुलबिया ओकरो सेठानी। केत्ता रंग के सपना में डूबलौ-उतरलौ कबे बलेसर के नींद आवी जाय छै, ओकरा पता नै चलै छै।

जोन दिनो सें बलेसर करजा करी के एत्ता-एत्ता रुपया लानलें छै, ओकरो मनो के चिन्ता आरो चिन्तन बढ़ी गेलों छै। तीस साल के बलेसर के आंखी में पचास वर्ष के सपना पलें लागलें छै। ऊ रोज केला खेती के सपना देखी रहलौ छै। केला खेती कोय हेनो-तेनो नै, मतरकि खूब बढ़िया फसल तैयार करै के बात सोची-सोची बलेसर मने-मन खुश होते रहै छै। बलेसर के मनो में दीपक घोष सें लै के हीरक सान्याल के नाम आवै छै। ई सिनी जमीन लीज पर खेती करै वास्तें दै छै। सोचै छै, वें दीपक घोष के जमीन लेतै, कैन्हेंकि हुनको जमीन बढ़िया दोमट वाला छै। दीपक घोष के पास तीसो-तीस बीघा जमीन छै। पूरे सेमापुर गांव में। दू-तीन जगह हुनका जमीन छै। कुछ बावनगंज में छै आरो कुछ सकरैली में छै। मतरकि हम्में बावनगंजवाला जमीन लेवै। कैन्हेंकि बावनगंज वाला जमीन बहुत बढ़िया छै। खेती करतें-करतें एत्ते ते हम्में जानिये गेलो छी कि केला के खेती वास्तें दोमट मिट्टी होना बहुत जरूरी छै। मालिक रो खेती करै के क्रम में कैबार हम्में बावनगंज गेलो छेलियै। वहां के जमीन हमारो देखलो-सुनलो छै। ऊ दीपक घोष सें बीघा-दू बीघा जमीन लीज पर लै लेतै।

आधा पैसा अभी दै देवै आरो आधा पैसा बादोँ में देवै, फसल कटला के बाद । आरो जहां तक जोताय के बात छै, जमीन कोड़े लेली ट्रैक्टर वांही पर मिली जैतै, मुद्दर साव या तांती राम के । मतरकि वें कै दिन सें मनेमन हिसाब लगाय रहलोँ छै तेँ लगै छै, नै ट्रैक्टर सें कोड़े में बहुत पैसा खरचा होतै । ऊ भुथरी या सीताराम के हल-बैल लैकेँ खेत जोती लेतै । वहां मंगरू सें बात होय गेलोँ छै । पुत्तल मोतीलाल बाबू कन सें लै लेतै आरो पुत्तल भी ऐन्होँ लेतै, जे बीट में बीचोँ सें लिकलतें हुवें, जेकरोँ जड़ मोटोँ रहेँ आरो पत्ती तलवार के समान पतला आरो नुकीला कोनावाला रहै । ऐहनों पुत्तल मोतीलाल बाबू के छै । हुनकोँ खेती ई गांव में मशहूर छै । बलेसर सोचतें-सोचतें सब किसिम के केला गाछ के बारे में सोचेँ लागै छै । मालभोग, अमृतसागर, चम्पा, चीनी चम्पा, अल्पना, भीमकेला, नेन्द्रन । मतरकि हम्में लगैवै तेँ खाली अल्पना आरो मालभोग ।

जहां तक खेत में नाइट्रोजन, पोटाश आरो फासफोरस के दरकार पड़तै, ऊ सबसें अच्छा कमानी में सें केकर्हौ कोय छै, येँ मुत्तलिक वें मोतीलाल बाबू सें जरूरे पूछी लेतै, बड़ी अनुभवी किसान छै । मोतियेलाल बाबू सें पूछी केँ वें आपनोँ खेत में नाइट्रोजन आरो पोटाश छिटतै । हेना तेँ फासफोरस के भी जरूरत पड़ै छै, मतरकि नाइट्रोजन आरो पोटाश के बेसी जरूरत पड़ै छै । खैर अभकी तेँ खेती के पैहलोँ बरस छै, तेँ यै लेली खाद-पानी पौधे के अनुसार करै लेँ पड़तै । जेना कि केला गाछ के तना केँ चारो तरफ एक-डेढ़ बित्ता छोड़ी केँ आधा बित्ता के पट्टी रं करै लेँ पड़तै । ई सब काम वें आपनो सें करी लेतै, ई सब होकरोँ करलोँ होलोँ छै । जहाँ तक पटवन के बात छै, पानी पटावै लेली दयानंद बाबू के पम्पिंग सेट लै लेतै । ई सब कामोँ में गुलाबो के साथ बहुते छै, कैन्हेंकि गुलाबो तेँ नित्यानंद बाबू के खेतोँ में काम करै छेलै । बलेसर आगू सोचै छै ।

जैन्हें-जैन्हें समय आगू बढ़लोँ जैतै, तेँ खाद दै वास्तें पुत्तल सें दूरियो बढ़तेँ जैतै । गुलबिया आरो हम्में मिली-जुली केँ हेने खेती

करवै कि देखैवाला देखतै। हम्मं यहू जानै छियै कि बीचो-बीच में सब गाछ कुछु बड़ो होय जैतै ते ओकरो पत्ता काटै ले पड़तै आरो गुलाबो ई सब काम बढ़िया से जानै छै। बलेसर जानै छै कि केला खेती में देखभाल के बड़ी जरूरत होय छै। पुत्तल गाछ बड़ो नै होलौं कि ढेर बच्चा वैसे फुटे लागै छै। यै बच्चा सिनी कि गाछ बढ़ै ले दै छै। मतरकि कोय चिन्ता के बात नै छै। जब-जब शम्स के नगीच दोसरो पुत्तल हुवे लागतै, तबे हम्मं आरो हमरी गुलाबो मिली के काटी लेवै।

ई सब खेती-बारी के काम हमरा से ज्यादा ते गुलाबो जानै छै। हम्मं ते ज्यादा खाद-बीज लानै में रहवै। खेत पर नहियो रहभै, तहियो गुलाबो हेकरा बढ़िया से संभाली लेतै। खूब मेहनत करवै हम्मं आरो गुलाबो मिली के चारो तरफ ओकरो मन मोताबिक गाछ-बिरिछ लहराय रहलो छै। हरा-हरा पत्ता देखी के बलेसर रो मन एत्ते हरा-भरा छै कि कुछु कहलो नै जाय। चारो तरफ खानी फुटी गेलो छै। खानी फुटला के साथे गुलाबो बलेसर से कहै छै, “यहे रं ठड़ा-ठड़ा आपनो खेती निहारबो कि है खानी बेचै लेली गाड़ियो लानभौ। देखै छै कि की रं खानी तोरो जवानी नाँखी फुटी गेलो छै।” गुलाबो देखै छै कि बलेसर ओकरो बात सुनतौ अनठियाय देले छै आरो बात बदलते हुवे कहै छै, “कोनो की पहले खेती-बारी नै करले रहियै।” “बँसबीटी से बाँस कीनी लिहौ उरमा के बाबू से। वे अच्छा बांस देतै आरो सस्ते में देतै।” गुलाबो बलेसर के समझाय छै।

आरो देखते-देखते बलेसर के आंखी में पाँच महीना एक क्षण में गुजरी जाय छै। वे देखै छै कि केला के गाछ खूब बढ़े लागले छै। बलेसर के देखी खूब आचरज लागै छै। ऊ अचरजे में डूबलो छै कि गुलाबो ओकरो गाल में हलका से आपनो औंगरी धसेते हुवे कहै छै, “हेना आचरज से की निहारै छौ। आखिर हमरो दोनों के मेहनत केन्हो रंग लानले छै। सबके जुवान पर बस एके बात छै कि गुलाबो आरो बलेसर मिली के केले बढ़ियाँ खेती करले छै। देखै लायक खेती छै। वाह, बलेसर वाह।”

बलेसर केँ लागै छै कि गुलाबो यहें सब बोललौं चललौं जाय रहलौं छै, जेकरोँ उत्तर में बलेसर कहै छै, “नै गुलाबो, नै। है सब जे लहलहाय रहलौं छै, सब तोरोँ खून-पसीना के मेहनत छै। तोरोँ आत्मा के खुशी छै है गाछ-बिरिछ आरो फल।” फिरू बलेसर यहू सपना देखै छै कि ओकरोँ खेत के पास ट्रक ठेला लागलौं छै। एक सौ रुपया खानी सें वें कम में बात नै करतै। एतने नै, ट्रकवाला ओकरोँ मुँहमांगा दाम दै लेली तैयार छै। कहाँ-कहाँ केरोँ ट्रक नै लागलौं छै। कलकत्ता, बनारस, उत्तर प्रदेश, पटना आरो आजमगढ़ के व्यापारी ठाड़ोँ छै ओकरोँ माल लै लेली। बलेसर के भाव बढ़ी गेलौं छै। होकरो लगै छै कि वें आज जेतौँ दाम लगैतै, उतते टका व्यापारी देतै। मतरकि वें कुछ नै करतै, बिना गुलाबो के पूछलौं। से वें खेत के एक कोना में खड़ी गुलाबो के नगीच पहुँची जाय छै।

गुलाबो आपनौँ लगैलौं गाछ-बिरिछ आरो बनकेल केँ खूब गौर सें छूवी-छूवी केँ देखी रहलौं छै। बलेसर ओकरा है रं बनकेल केँ छूवी-छूवी केँ देखला पर टोकै छै, “तौं ई सब्जी पतार वाला गाछ लगैनेँ छौ। फल के कोनो व्यापारी ई गाछ लेतौं ?” तबेँ गुलाबो बोलै छै, “हमरा कोय व्यापारी सें की काम छै। हमरोँ ई बनकेला केँ वें व्यापारी लेतै, जे व्यापारी हमरोँ छै। जे हमरोँ तन-मन के व्यापारी छै।” गुलाबो के बात सुनी केँ बलेसर केँ लागै छै कि ऊ ठठाय केँ हँसी पड़लौं छै आरो सचमुचे में जखनी बलेसर के सपना टुटै छै, ई सब बात याद करी केँ ऊ जोर सें ठठाय केँ हँसी पड़ै छै। आपनौँ आस-पास के सब जगह केँ गूजैतै हुवेँ।

सबनें देखलकै, सबनें देखी रहलो छै गुलबिया आरो बलेसर के मेहनत । ठीक आपनो सपने रं बलेसर नें खेतियो करी के सेमापुर वाला के सब खेतिहर के आँखी चौधियाय देलकै । दीपक घोष से दू बीघा जमीन लेला के बाद वें खेतों में गुलबिया साथें जोन दिन पहलो हर गाड़लें छेलै, वहीं दिनों से गुलबिया के खून-पसीना ऊ माटी से सनी के हलफलावे लागलें छेलै । पहलो हर गाड़े के पहले बलेसर गुलबिया साथें शिव मंदिर गेलो छेलै । जे मंदिर सत्यनारायण जायसवाल ने आपनो माय-बाबू के स्मृति में बनलें छेलै ।

आरो वहीं में बलेसर गुलबिया के संकेत पावी हेनो पूजा करलकै कि गांव के दूए-चार बड़ो-बड़ो हेनो करे पारतै । धुबनो-गुग्गुल साथें चंदन के टुकड़ा मंगवैलें छेलै गुलबिया ने । मंगवैलें की छेलै, आपने से एक-एक समान कीनी ऐलो छेलै हटिया से, बिना कुछ बात सोचलें-विचारलें । होना ई पूजा होकरे घर के छेलै । पंडितो करलें छेलै वें जे ठीक-ठीक से संस्कृत के पाठ करे पारै । मंतरे पर ते भगवान खुश होय छै । जो मंतरे गलत होतै ते भगवान धन-सम्पत की देतै । आरो वहै दिन से गुलबिया आपनो मालिक नित्यानंद बाबू के काम छोड़ी देलें देलै । मंदिर में पूजा करला के बाद बलेसर मुद्द के हर खेतों में राखलें छेलै । गुलबिया ने बड़ी नेम-धरम से हरो के पूजा करने छेलै । खेतों में सब पूजा-पाठ करी लेला के बाद दोनों ने मिली के आपने से पूरा खेत जोतना शुरू करी देलें देलै । यही नै, दोनों हेने मिली-जुली के खेती करै में जुटी गेलो छेलै, जेना कोय आपनो आवैवाला बच्चा-बुतरू के देखभाल में जुटी जाय छै ।

आय एक-डेढ़ महीना बीती गेलो छै । खेत आबें तैयार छै खेती करै लेली । आषाढ़ शुरू होतै । बलेसर ने मोतीलाल बाबू कन से पुत्तल लानी के लगाय देने छै । गुलाबो सब जानै छै कि बलेसर खाली आपनो किसिम के गाछ लगैतै, से ऊ आपने से खोजी-ढूंढी के आपनो मोस

आरो बनकेला केँ किनारी में लगाय देनें छै ।

समय देखतेँ-देखतेँ बीती जाय छै । आबेँ पुत्तल सेँ हरा-हरा पत्ता निकली गेलोँ छै । गुलाबो आपनोँ सबटा अनुभव केँ खूब उपयोग ई खेतोँ में करी रहलोँ छै । जैन्हें गाछ में कुछू पत्ता निकलेँ लागलेँ छेलै, ऊ दौड़-धूप करी केँ ओकरा में दवाय नाइट्रोजन आरो फास्फोरस छिटी देलेँ छेलै । ई सब करै वास्तेँ गुलबिया केँ कोय गाछ-बिरिछ केँ डॉक्टर-वैध केँ नगीच जाय केँ जरूरत नै छेलै । ऊ बचपने सेँ खेतोँ में काम करतें ऐलोँ छै आरो आबेँ तेँ ओकरोँ जिनगी केँ बीस बरस बीती गेलोँ छै । बलेसर आपनोँ खेतोँ पर बैठलोँ-बैठलोँ गुलाबो केँ देखतें रहै छै । आरो गुलाबो छेली कि दिनभर आपनोँ काम में भिड़ली रहै छेली । ओकरा अब दिनभर काम करै सेँ फुरसत नै छेलै । गाछ केँ केना की करना छै, कबेँ दवाय देना छै, कबेँ पत्ता काटना छै, कबेँ पानी पटाना छै, कबेँ पुत्तल काटना छै, ई सब काम खाली गुलाबो ही करी रहलोँ छै ।

बलेसर आपनोँ खेतोँ में लहलहैतेँ गाछ-बिरिछ केँ देखी आचरज करै छै । आरो ओकरा यहो आचरज लागै छै कि ई सब काम गुलाबो नेँ केँता बढ़िया सेँ संभारी लेलेँ छै । बलेसर मनेमन सोचै छै ई गुलाबो हमरा पर जरियो टा काम केँ भार नै पड़ै लेँ दै छै । हेनोँ कोय काम नै छै जे गुलाबो नेँ नै करलेँ छै । खेत केँ देखी हेने बुझाय छै, जे आय खेत केँ रंग-रूप छै, जोँ वेँ आपना सेँ करतियै तेँ ई रूप-रंग नै होतियै । ई तेँ गुलाबो छै, जे खेत केँ आपनोँ बच्चा सेँ भी ज्यादा परेम दै छै । नै आपनोँ तन केँ ख्याल छै, नै तेँ सुध । केँता बेसुध होय केँ काम करी रहलोँ छै । हममें जबेँ-जबेँ खेती में हाथ बंटाय लेँ जाय छियै, तबेँ ऊ हमरोँ हाथ पकड़ी केँ हटाय दै छै । हरदम एक्के बात कहै छै, “तोँ हमरोँ है छोटोँ-छोटोँ बच्चा सिनी केँ हाथ नै लगैइयौ । केँता जतन सेँ एकरा हममें बड़ा करी रहलोँ छियै । जबेँ ई बड़ा होय जैतोँ, तबेँ तोँहें एकरा सेँ खेलियौ ।”

गुलाबो केँ ई बात पर बलेसर खूब गंभीरता सेँ सोचै छै आरो

एकरोँ मानें दूँटै के प्रयास करै छै । कुछू-कुछू मानें वें भी पकड़ै छै आरो जेत्ता मानें पकड़ै छै, ओकरा सें चार गुना ज्यादा ओकरोँ बदन में गुदगुदी उठै छै । गुलबिया के बात बलेसर सोचै छै तेँ सोचतें चललौँ जाय छै । जबें ऊ दोनों बच्चे छेलै, बकरी चराय वास्तें दोनों खेत-बहियार निकली जाय छेलै । गुलबिया जे कुछू भी आपनौँ घरों सें लानै छेलै, ऊ सबटा हमरोँ आगू में राखी दै छेलै । ई कहतें राखी दै छेलै कि दोनों साथे खैबै । तों जे कुछ लानलौँ छौँ, एकरा में मिलाय दौ । फेनू गुलबिया तें की खाय, हमरे सबटा बातों-बातों में खिलाय दै, ई कहतें कि सुनै छियै, लड़का जाति केँ भूख बड़ी लागै छै—कैन्हें कहै छेलै गुलबिया ई, यही सें कि ओकरोँ हालत गुलबिया सें छिपलौँ नै छेलै । द्वारी-द्वारी पर माय के नौड़ीपना करला के बादो हमरोँ सिनी के पेट बड़ा मुश्किल सें भरै पारै छेलै । ऊ तेँ धन्य छेलै बाबू, जे घर छोड़ी केँ पंजाब चललौँ गेलै आरो पैसा लै केँ लौटलै तेँ डीह-डाबर बनेँ पारलै । गुलाबो तखनिये सें हमरोँ घर आवी रहलौँ छै । जहिया सें माय मरलै आरो गुलाबो के जुआनी में पानी लागलै, तहिये सें घर आना-जाना बंद होय गेलै । आय वही गुलाबो की रं खेती में तन-मन-धन लगैलौँ हुवै छै । जेना ओकरे खेत आरो हम्में ओकरोँ पुरुख—बलेसर ई बात सोचथैं एकबार फिरू सिंहरी उठै छै । सोचै छै, आय नै तेँ कल ई सब बात सच होने छै । वें आपनौँ चमकतें आंखी सें गुलबिया केँ निहारै छै, जे केला के कोमल पत्ता नाँखी लहलहाय केँ खेती कामों में बावली बनी गेलौँ छै ।

[७]

आरो रोजे गुलाबो आपनौँ खेतों में काम-धंधा करी केँ बलेसर सें अलग होय जाय छेलै, जेना चकवा चकई सें अलग होय जाय छै ।

गुलबिया □ ४६

रात भर दोनों तड़पै छेलै एक-दूसरा लेली। दोनों के हेनोँ दुख जिनगी में पहिलोँ बार अनुभव होलोँ छेलै।

मतरकि गुलाबो रोज दुगना उत्साह सेँ फिरू खेत आवै छेलै, जेना कि कोय धरती आकाश सेँ मिललोँ प्रतीत होय छै। जेना हहैली कोशी हिमालय सेँ निकली केँ गंगा दिश भागै छै, होने केँ दोसरोँ दिन होतै हहैली गुलबिया बलेसर के खेतोँ दिश भागी जाय छेलै। आरो फिरू मिली जाय दोनों दिनभर लेली। समय आपनोँ तेज रफ्तार सेँ बीतलोँ चललोँ जाय रहलोँ छेलै। देखतेँ-देखतेँ आबेँ गाछ सिनी में खानी फुटेँ लागलेँ छेलै। गुलाबो ई सब देखी केँ खूब खुश होय छेलै, कैन्हें कि पहले साल में खेती एत्तेँ दमदार शायदे होय छै, जेन्होँ कि अभरी ई खेतोँ में होलोँ छै। बलेसर गुलाबो सेँ कहै छै, “ई सब तोरे मेहनत आरो सूझबूझ के कमाल छै गुलाबो।” बलेसर गुलाबो के हाथ आपनोँ हाथ में लै केँ बहुत परेम सेँ ओकरोँ तरहथी पर आपनोँ अंगुरी छुवाय छै, कुछ लिखे के कोशिश में आरो कहै छै, “गुलाबो, ई सब खेती में जे कुछ होलोँ छै, सब तोरे परेम के कारण।” वेँ कहबो करै छै, “देखोँ, हमरोँ-तोरोँ ई परेम केत्ता सुन्दर रूपोँ में खिली गेलोँ छै। सच कहै छियौँ गुलाबो—जोँ ई रंग खेती हम्में चार-पाँच बरस हम्में करी लेभौँ, तेँ हम्में लखपति जरूरे बनी जैभौँ। ई रंग खेती तेँ ई गाँवोँ में केकरो नै छै, जेन्होँ हमरोँ सिनी के। अभरी जे ई खानी मोटावै तेँ हमरोँ खानी के डाक लगतै डाक, देखियौ।” यहें रंग के कत्तेँ बात बलेसर आरो गुलाबो दिनभर करतेँ रहै छै, आरो गुलाबो के मनोँ में सपना भुक्का-भुक्का फुलतेँ रहै छै। एकदम रसभरलोँ। महुवे नाँखी पागल बनाय दै वाला गंध आरो रसोँ सेँ भरलोँ।

आरो देखतेँ-देखतेँ चार महीना बीती जाय छै। सावन महीना आवै में आरो दस दिन रही गेलोँ छै। गुलबिया आरो बलेसर आँख फाड़ी-फाड़ी आषाढ के सरंग केँ ताकतेँ ऐलोँ छै। येँ बीचोँ में कैएक बार सरंग में मेघो उतरलोँ छै, कड़कवाला मलका साथेँ, मतरकि असली बरसात तेँ सावने के। सावन उतरतै, खेत-बहियार खानी के महक सेँ

महमह करेँ लागतै । आरो सावन के उतरतें ठीके बलेसर के खेत गंध सें बौरावेँ लागलेँ छेलै । बिकै वास्तें एकदम तैयार । हेनो खेतिये होलों छै कि केकरो नजर लगी जाय । छोटका किसान सें लै केँ बड़का किसान तक एक्के बात दोहराय रहलोँ छै, “जे हुवेँ, अभरी खूब नफा कमैतै बलेसर ।” आरो ई सब बात के चरचा कानो-कान होतें हुवेँ पटेल सिंह तक पहुंची गेलोँ छेलै कि बलेसर अभरी बहुत बढ़िया खेती करलेँ छै । पटेल सिंह ई गांव के मुखिया छेकै आरो कोय हुनकोँ सामना में हुनके मजदूर के बड़ाय करेँ, हुनी ई बरदाश्त करै वाला नै छेलै । कैन्हें कि आखिर हुनकोँ भी कोय इज्जत छै कि नै ? पटेल सिंह ई सब बात खूब मनेमन गुनै छै कि बलेसर ओकरोँ मुंह चिढ़ाय रहलोँ छै, आरो हमरोँ बेइज्जती करी रहलोँ छै । से हुनी आपनोँ दिमाग दौड़ावेँ लागै छै कि हुनका आबेँ की करना चाहियोँ । से हुनी सब बात के पहले पता लगाय लै छै कि आखिर बलेसर एत्तेँ बड़ा कमाल करलकै केना ? सब पता लगैतें-लगैतें हुनका पता लगलै कि ई सब काम में कोने-कोने बलेसर केँ मदद करनेँ छै ।

पटेल बाबू ठहरलै गांव के मुखिया । कभियो केकरो देहरी नै टपै छै, मतरकि आय तेँ टपै लेँ पड़तै । कैन्हें कि ई खाली हुनके बात नै छै, एकरा में भूमियो बाबू केँ फायदा छै । हुनी मनेमन सोचै छै कि छोटका लोगोँ के सिर पर बैठना बेकारे छै । पछियारी टोला के शेखू नें चमरटोली के बिरना केँ कत्तेँ माथा चढ़ाय राखनेँ छेलै आरो फिनू आखिर में होलै कि, वही बिरना ने यूनियन बनाय केँ शेखू बाबू के सब जर-जमीन तहस-नहस करवाय देलकै । रातो-रात सब फसल-तसल कटवाय लेलकै । यहू नै सोचलकै कि शेखू बाबू नें महीना-महीना तक नै, साल-साल भर ओकरोँ घरों के परवरिश करनेँ छेलै । दूसरा लूटतियै तेँ लूटतियै, कम-से-कम बिरना केँ तेँ है नै करना चाहियोँ । आरो नै जानै कत्तेँ बात सोची जाय छै पटेल बाबू नें । जोँ ई बलेसर केँ नै रोकलोँ जाय तेँ ई हमरोँ सिनी रोँ माथोँ पर बैठी जैतै । आय पटेल सिंह के पैर में घिरनी लागी गेलोँ छै । ई सब बात हुनी आपनोँ बरामदा

पर टहलते हुवे सोची रहलो छै । हुनी यदि चाहै आरो भूमि बाबू के घर खबर भिजावाय दै तेँ कि मजाल छै कि भूमि बाबू हमरोँ बात काटी दैतै । छै तेँ रिन-करजा दै वाला ही । पैसा कमैलेँ छै, मतरकि आखिरकार हम्मै ई गाँव के मुखिया छियै । मतरकि समय-समय के बात छै । मानलियै कि हम्मै जमींदार साथेँ मुखिया आरो ऊ महाजन । मतरकि शास्त्र कहै छै, समय पड़ला पर आदमी केँ समयेनुकूल बात-व्यवहार करना चाहियोँ । वही होय छै चतुर पंडित । आरो हुनी ई सोचै छै कि अखनिये हम्मै जैवै भूमिबाबू कन । आरो हुनी एक पल देरी नै करै छै । अनचोके हुनकोँ पैर भूमि बाबू के घर दिश उठी जाय छै । रास्ता-पैड़ा के कत्तेँ लोग आय हुनका ई रंग चलतेँ देखी केँ आचरज करै छै । जेँ पटेल सिंह एक कदम बिना गाड़ी-घोड़ा के नै चललेँ छै, आय पैदल छै । की बात छै, केकरो कुच्छू समझै में नै आवी रहलोँ छै । जत्तेँ लोग, ओत्तेँ शंका ।

आरो मलकलोँ-मलकलोँ पटेल सिंह भूमि बाबू के द्वार लग पहुँची जाय छै । आपनोँ धोती केँ संभारतेँ हुवेँ टनकलोँ आवाज में पुकारलकै, “अरे भूमि बाबू, कहाँ छौ ? छौ की नै ।” भूमि बाबू, जे आपनोँ कोठली में बैठलोँ हिसाब-किताब में मशगूल छेलै, अनचोके पटेल सिंह के आवाज सुनी केँ धड़फड़ाय जाय छै । हुनी धड़फड़ाय केँ आपनोँ गद्दी पर सेँ उठी केँ बाहर आवै छै । द्वारी पर पटेल सिंह खाड़ोँ छै—ऊपरे ताकी रहलोँ छै । भूमि बाबू आपनोँ धोती के कोंची ठीक करतेँ हुवेँ हड़बड़ैतेँ हुवेँ नीचेँ उतरै छै आरो पटेल सिंह सेँ परनाम-पाती करै छै । आपनोँ मनोँ में उठी रहलोँ ढेरे प्रश्न के ओझरा में बड़बड़ैतेँ हुवेँ पूछै छै, “आय आपने हमरोँ घर दिस ? जोँ आपनेँ खबर भिजावाय दैतियै तेँ हम्मै आपनेँ के घोँर चललोँ ऐतियै । ई तेँ हमरोँ बड़ा भाग छिकै कि आपनोँ रोँ गोड़ ई घारोँ में पड़लै । हमरोँ घोँर आय पवित्र होय गेलै ।” पटेल बाबू शायद ई सब सुनै लेँ नै चाहै छेलै, से हुनी सीधे आपनोँ गोड़ घरोँ दिश बढ़ाय देलकै । मतरकि हठाते रुकी जाय छै, ई कहतेँ कि दुआरिये पर आभार करभौ कि भीतर जाय लेँ भी कहभौ ।

भीतर जाय के बात सुनथैं भूमि बाबू एक बार जोर सें खखसलै आरो आपनो नौकर सुगना के 'सब कुछ हटाय ले' वही खखसबो में कहै छै। सुगना—जे भूमिबाबू के साथ द्वार तक ऐलो छेलै, धड़फड़ैतें ऊपर भागै छै आरो पीछू-पीछू मध्यम गति सें भूमि बाबू पटेल सिंह साथें ऊपर चललो जाय छै।

भूमि बाबू के बहुत कहलौ पर पटेल सिंह नीचें गद्दिये पर पालथी मारी के, जमी के बैठी जाय छै आरो बिना लाग-लपेट के दांत चोभलैतैं-चोभलैतैं कहना शुरू करै छै, “भूमि बाबू, तों ते जानवे करै छों बलेसर के, ऊ हमरो खेत के मामुली मजदूर छेलै। हममें ओकरो मेहनत आरो ईमानदारी देखी के ओकरा आपनो खेतो के मैनेजर बनाय देलें छेलियै। की सुख-सुविधा ओकरा नै देलें छेलियै, मतरकि की बतावों, ई छोटो लोग के जरियो टा सुविधा दौ ते माथे पर चढ़ी के बैठी जाय छै। केत्ता बढ़िया मैनेजरी करै छेलै, ऊ छोड़ी देलकै। मनो में एकटा भूत सवार होय गेलै कि करवै ते आपने खेती करवै। यहाँ केरो बिलाक सें लै के हमरा तक दौड़ लगैलकै। जब कहीं कोय काम नै बनलै ते आपने कन करजा लै ले आवी गेलै, आरो आपने बिना कोय माथो लगैलें करजा दैयो देलियै। आबें तोंही सोचो भूमि बाबू, जे मजदूर हमरा शिकस्त दिये सकै छै, ऊ कल तोरा शिकस्त केना नै दिये पारै छै।”

पटेल सिंह के बात सुनी के भूमि बाबू के माथो ठनकी जाय छै। कहै छै, “है ते हमरा सें बड़का गलती होय गेलै, मतरकि आबें की करलो जाय ?”

आपनो गोटी के चाल ठीक पड़तें देखी के पटेल सिंह लगलें कहै छै, “यहू सोचो, जे जमीन आपनो एक्का पर लिखाय लेलें छौ, जो अब यहू आपने के हाथ सें निकली जाय ते की करभौ। आपने चाहवै कि ऊ जमीन आपने के हाथ सें निकली जाय। आय ते दू बीघा में खेती करलें छै, कल जो वें एकरा सें पूंजी बनाय के दस बीघा के खेती करे लागै ते कल वें महाजनी करे पारें। आबें आपने सोचियै,

जों ऊ महाजनी करी रिन-करजा दियेँ लगै, तेँ आपनेँ के टक्कर में आवी जैतै। फिरू आपनेँ रोँ ई महाजनी बँटी जैतै। आरो हम्में ई कहियो सें नै चाहै छियै कि आपनेँ के ई कारोबार बँटी जाय।” भूमि बाबू केँ लागै छै कि ठीके में ओकरा सें जिनगी के बहुत बड़ोँ भूल होय गेलोँ छै आरो पटेल बाबू छोड़ी केँ ओकरोँ ई भूल कोय नै सुधरेँ पारेँ, से हुनी दुखित स्वर में पूछै छै, “ई भूल के सुधार हुवेँ पारेँ ? जों कुछ रास्ता छों तेँ कहोँ, हम्में ऊ सब करै लेँ चाहै छियै, जे तों कहभौ ?”

पटेल बाबू के तेँ जेना मने के बात होय गेलोँ छेलै, से हुनी भूमि बाबू के कान के नगीच आपनोँ मुँह लाय केँ आहिस्ता सें कहै छै, “आपनेँ तेँ जानबे करै छियै कि फसल काटे रोँ समय एकदम नगीच आवी गेलोँ छै, आरो यही समय छै, जबेँ बलेसर केँ मात करलोँ जावेँ सकै छै।” बलेसर केँ मात करै के बात सुनथेँ भूमि बाबू के मुरझैलोँ चेहरा हठाते खिली उठै छै, जेना हुनी आपनोँ हारलोँ बाजी एकबार फिनू जीती लेलेँ रहेँ। आँखी में चमक फुटी पड़ै छै आरो अभी तक जे हुनी हाथ भर के दूरी सें भूमि बाबू के बात सुनी रहलोँ छेलै, आपनोँ मुँह बित्ता भरी हुनकोँ नगीच लानतेँ हुवेँ कहै छै, “बोलोँ पटेल बाबू बोलोँ, लागले चोट हमरा की करना छै ?”

भूमि बाबू मने-मन सोचै छै—ठीक कही रहलोँ छै ई पटेल बाबू, आबेँ आपनोँ वास्तेँ होकरा कुछ-न-कुछ करै लेँ लागै। आबेँ चाहे जे होय जाय, ऊ बलेसर केँ आगू बढै लेँ नै देतै।

पटेल बाबू बलेसर केँ मात दै के नुस्का बताय छै। बलेसर रोँ खेतोँ में फसल आबेँ कटै लेली एकदम तैयार छै। आय सावन शुरू होय में चार दिन बाकी छै। सबके खेत-खेत घूमी रहलोँ छै व्यापारी। सबके खेत देखी सुनी रहलोँ छै। हेना तेँ सबके फसल अच्छा या खराब तैयार तेँ होय गेलोँ छै। मतरकि बलेसर रोँ खेत देखी केँ सब्भे व्यापारी फेनू हुन्ने फिरी जाय छै। जेना गरीबदारोँ में कभी-कभार सुंदर जनानी आबी जाय छै नी, आरो गांव जबार भरी के मरदाना के नजर हुन्ने लटकलोँ रहै छै, वही रं बलेसर के ई केला खेत होय गेलोँ छै। आरो

एक बात जानै छौ कि नै भूमि बाबू, ओकरो ई केला खेती के राज छेकै जोगबनिया के बहिन गुलबिया । वही छौड़ी के हाथो आरो माथो के चलते बलेसर के केला के खेती जवानही रड फुटी पड़लो छै । जो तोहो बलेसर के एक जगह पर मात दौ ते दूसरो जगह पर हम्मं ओकरा मात दै देबै ।” भूमि बाबू बड़की-बड़की कौड़ी रड आँख फाड़ी-फाड़ी के पटेल बाबू दिस ताकै छै, जेना हुनी पूछते रहे, “बोलो, हमरा की करना छै ।” तबे पटेल बाबू ने पाँच बार आपनो हाथो के जोरो से दबैते हुवे कहलकै, “तोरा करना ई छौ कि टका के बलो पर सब व्यापारी के भड़काय देना छौ कि ओकरा से कोय केला नै खरीदै । दाम लगावै ते आधो-आधो, हेने लै बाला के भड़काय दौ कि फसल के दाम ते छोड़िये दौ, खेत के भी दाम नै मिलै ।”

“समझी गेलियै । सब समझी गेलियै ।” भूमि बाबू कहै छै । “आरो जहाँ तक गुलबिया के बात छै, हम्मं ओकरो व्यवस्था करी देबै । ई नट्टिन जब तांय बलेसर के पीछू-पीछू लागलो रहतै, बलेसर के किस्मतो साथे रहतै । हिन्ने बलेसर के खेती जैते आरो हुन्ने गुलबिया आपनो मरदाना के घोर । जोगबनिया के बुलाय के कल्हे हम्मं कही दै छियै कि आपनी बहिन के कोय मरदाना के खुट्टा से बांधी दें, नै ते तोरहे बांधी के पिटबौ । भूमि बाबू, गुलबिया ससुराल जैते कि बलेसरो रो किस्मत नरक गेलै । खेती ते जैबे करतै, गुलबिया के बीहा होतै, यहू सारा पगलाय के मरी जैते ।”

एतना कहते-कहते पटेल बाबू ठहाका मारी के हांसै लागलै । आरो आपनो इज्जत-प्रतिष्ठा सुरक्षित देखते भूमियो बाबू ‘हो-हो हा-हा’ करी के ठाय पड़लै ।

आरो आखिर में बलेसर रो खेती खतमे भै गेलै। जे दिन सें गुलबिया बलेसर रो खेतों में आना-जाना छोड़लकै, वहे दिनों सें खेत जेना तहस-नहस होय गेलै। गुलबिया ऊ खेत लेली लक्ष्मी रहै लक्ष्मी, ऊ खेतों में गुलबिया नै रहै छेलै ते धनो नै रहै छेलै, जेना गुलबिया के गोड़ों में लक्ष्मी के बास छेलै। जे दिनों सें गुलबिया हमरो खेतों वास्तें आपनो जान-परान लगैनें छेलै, वै दिनों सें ऊ खेतों में जेना लक्ष्मी के गोड़ चली के ऐलो रहै।

आय गुलबिया कै रोजो सें खेत नै ऐलो छै। नै जानो की होय गेलो छै। बलेसर आपनो खेतों में बैठलो-बैठलो कत्ते नी बात सोचै छै। मतरकि दिमाग कामे नै करी रहलो छै। सबटा जेना भुतलाय गेलो छै। बलेसर खेतों में कभी हिन्ने कभी हुन्ने घुरै छै। न कोय हिन्ने ताकै छै आरो नै कोय पूछै छै। बस बलेसर घूमतें रहै छै। हेनो कोय लोगो नै भेटावै छै, जेकरा सें गुलाबो के बारे में कुछ पूछै। बलेसर आपना में कत्ते बात सोचै छै। नै जानौ गुलाबो के की होय गेलो छै। मन-तन खराब छै की, हाँ हुवे पारै, एत्ता खटलो छै ई खेतों वास्तें कि, कोय की खटतै। मतरकि जो मन-तन खराब होतियै ते खबर जरूर भेजवैतियै। नै-नै गुलाबो के मन नै खराब हुवे, बलेसर भगवानो सें मने-मन प्रार्थना करै छै।

बलेसर सोचै छै कि आखिर हुवे की पारै। पहनें ई खेतों पर खाली आदमिये नै, चिड़िया चुनमुन के चहचहैबो होय छेलै। आय कै रोजो सें हेने बुझाय छै जेना ई खेत खेत नै रही गेलो छै—मुदाघट्टी होय गेलो छै। आरो मुर्दघट्टी में लहाश सांय-सांय जली रहलो छै। ओकरो आग के लपट सें बलेसरो नै बचे पारले छै। लहाश जरै सें जेना आग के लपट उठै छै, होने के बलेसर के दिल सें आग के लपट उठी रहलो छै। उठतियै कैन्हें नी ? बात खाली गुलबिये के ते नै छेलै, बात यहाँ खेतियो के छै। बलेसर के सब्भे कुछ मालूम होय गेलो छै कि ओकरो

खेती के मोल गिराय में केकरो-केकरो हाथ छै, मतरकि गामों में कोय नै बोलै छै। असकल्ले ओकरा कुछू बोलै में भय लागै छै। बात कहीं झूठ होय जाय तबे। मतरकि बलेसर मने-मन ई बात मानी रहलौ छै कि ई बात केन्हौ के झूठ नै हुवे पारै। ओकरो खेती बरबाद करै में जेत्ते गुनाहगार पटेल बाबू छै, भूमियो बाबू ओकरा से कम नै छै।

केला के सब टा गाछ गाछ नांखी नै लगी रहलौ छै। हेने बुझाय छै जेना श्मशान में लहाश खाड़ो रहे। सबटा गाछ जीत्तो आदमी रड आपनो किस्मत पर कानी रहलौ छै। ओकरा देखी के बलेसर के अन्तमन हाहाकार करी उठै छै। नै जानों की होय गेलै ई खेतों के। कुछू दिन पहिने ई खेत सब्भे के नजरो में लक्ष्मी के वासो छेलै। आय अनचोके एकटा श्मशान घाट भै गेलै। बलेसर सोची-सोची के हलकान होय रहलौ छै, होतो चल्तो जाय रहलौ छै। अखनी बलेसर आरो केत्ते बात सोचतियै कि ओकरो आंखी के नगीच चार दिन पहलको दृश्य खाड़ो होय गेलै। जबे भूमि बाबू दस ठो लठैत साथे होकरो खेतों पर चढ़ी ऐलो छेलै आरो कहलै छेलै, “की बलेसर, तोरो ते पैसा लेलो आय एक बरस से बेसीये होय गेलो। रुक्का पर ते लिखने छेलै कि एक बरस में पैसा सूद समेत घुमाय देभो। मतरकि तो ते सूद दे के बात ते दूर-हमरो मूल भी नै लौटाय ले ऐलै। बहुत दिन हमने तोरो आसरा देखी लेलियो। सोचलियै कि तोरो केला बिकी जैतो ते आपने आबी के पैसा घुमाय देभे। मतरकि तोरो केला फसल बिकला के बादो हमरा एक टा फूटी कौड़ीयो सूंघाय ले नै ऐलै। आरो अबे हमने एत्ता इंतजार नै करै सकै छियो।” आरो कत्ते नी बात भूमि बाबू खाड़े-खाड़ बोललै गेलै, मतरकि बलेसर के कान जेना कुछू नै सुने पारी रहलौ छेलै। सौंसे शरीर जेना पत्थर के होय गेलो रहे। आबे ते बलेसर सिवाय एक टा बूत के आरो कुछू नजर नै आबी रहलौ छेलै। नै ते बदन में कोय हरकत होय रहलौ छेलै आरो नै ते वें आपनो जगह से हिली-डुली रहलौ छेलै। आखिर में बड़ी मुश्किल से आपनो सौंसे ताकत लगाय के वें कहने छेलै।

बलेसर केँ याद आबै छै की रड कनमुहो होतेँ हुवेँ वें भूमि बाबू सेँ कहनेँ छेलै, “मालिक जे खेती सेँ चालीस-पचास हजार के नफा होना छेलै, ऊ खेती के व्यापारी दाम लगैलकै बीस हजार आरो एक व्यापारी नै, सबटा व्यापारी। ई टका तेँ हमरोँ हाथो नै लगेँ पारलै कि खेत मालिक आरो खाद मालिक आबी केँ लै गेलै। आपने केँ टका दै के बात सोचथै रही गेलियै, आबेँ तेँ हम्में यही कहबै हम्में आपनोँ मकान हारलाँ.....।”

तखनी भूमि बाबू आपनोँ चेहरा पर केन्होँ बनावटी गुस्सा लानतेँ हुवेँ कहनेँ छेलै, ‘रे बलेसरा, तोरोँ ऊ श्मशान लै केँ हम्में की करबौ, अपनोँ मुरदा गाड़बै की। मतरकि आबेँ तेँ तोरोँ खालो बेची केँ हम्में आपनोँ पैसा वसूल नै करै पारौँ। अबेँ तेँ तोरोँ वही मुर्दघट्टी पर संतोष करेँ पारौँ।’ आरो की रंग भूमि बाबू तमतमैलोँ खेतोँ सेँ चल्लोँ गेलोँ छेलै। बलेसर के आँखी में एक-एक करी केँ सब दृश्य घूमी जाय छै।

पैहनेँ तेँ बलेसर गुलाबो लेली अलगे परेशान छेलै, आरो ऊपर सेँ ई खेत के करजा। सब मार एक्के बार पड़ी गेलोँ छेलै। केना बरदास्त करेँ सकै छेलै बलेसर। ऊपर सेँ नीचे तांय टूटी केँ रही गेलोँ छेलै बलेसर। भूमि बाबू के रूक्का पर लिखलोँ बातोँ के अनुसार आबेँ तेँ बलेसर केँ घरो-द्वार सब खतम होय गेलोँ छेलै। कच्चा माल केँ बेसी दिन खेत में राखबोँ ठीक नै छेलै, ओकरा पर सेँ पाकलोँ केला। बलेसर आखिर में नौ-छौ करी केँ भसाय देनेँ छेलै आपनोँ खेत। जोन खेतोँ सेँ ओकरा पचास हजार टका के फायदा होतियै, वही खेत अठारह-बीस हजार टका में जेना-तेना करी केँ बिकी-बिकाय गेलोँ छेलै।

आरो वही दिन सेँ सभ्भे सेँ बेखबर होय गेलोँ छेलै बलेसर। नै आबेँ ओकरा आपनोँ देहोँ के होश छेलै, नै आपनोँ जीवन के। बलेसर के कपड़ा-लत्ता एकदम मैलोँ-कुचैलोँ होय गेलोँ छेलै। कल तक जे बलेसर बाबू रंग बनी संवरी केँ रहै छेलै, वही अबेँ दीन-दुखिया-साधु रड दीखै छेलै। आरो अबेँ बलेसर कहाँ नहैतै, कहाँ रहतै, यहू बात

के होश नै छै। कैन्हें कि नै रहै के घोर रहलै ओकरा नै खाय-पीयै के पैसा कौड़ी। सब्भे जेना लक्ष्मी के घर सें जैतैं बिलाय जाय छै, होने के बिलाय गेलो रहै। कहै छै, जेना लक्ष्मी धीरें-धीरें घोर आवै छै, होने धीरें-धीरें घरों सें चल्लो जाय छै। मतरकि बलेसर रो लक्ष्मी ते कबे कौन द्वारी सें ऐलो छेलै आरो कबे कौन द्वारी सें चल्लो गेलो छेलै ओकरे नै पता छेलै। बलेसर ते गुलाबो के ही लक्ष्मी मानै छेलै। जोन दिनां सें गुलाबो ओकरो घोर ऐलो छेलै वही दिनां सें जेना सब्भे खुशी बलेसर के घोर दिस ऐलो छेलै। आरो जोन दिनां सें गुलाबो गेलो छेलै, वही दिनां सें जेना सबटा खुशी बिलाय गेलो छेलै। बलेसर के याद आबै छै कि खेत के फसल बिकै सें आठ रोज पैहने सें गुलाबो के खेत आना बंद होय गेलो छेलै। जबे ओकरे लक्ष्मी आना छोड़ी देले रहै ते फसल सें लक्ष्मी केना ऐतियै। आखिर वहू नै ऐलै। अजीब मतछिनतो रड जिनगी कटी रहलो छै बलेसर के। कुछू देर तांय ऊ खेतों में आबी के फसलहीन केला गाछों के ताकै छै, ताकतें रहै छै, आरो फेनू लौटी जाय छै आँधी- बताशो रड वहे ठाकुरवाड़ी।

अबे बलेसर खाली ठाकुरवाड़ी में बैठलो रहै छै। ऊ मंदिर के चौखट पर हेने बैठलो रहै छै। बार-बार खाली सूना आँखों सें ठाकुरवाड़ी दिस ताकतें रहै छै। बलेसर मने-मन कुछू-कुछू बड़बड़ैतें भी रहै छै। की बड़बड़ावै छै, कोय नै समझै सकै छै। जो बलेसर समझतें होतै ते समझतें होतै। ओकरा देखी के ते यहू नै बुझाय छै कि वें जे बड़बड़ावै छै, वहू समझै छै कि खाली हेने बड़बड़ावै छै।

बलेसर के मोन होय छै कि ऊ ठाकुरबाड़ी के भीतर जाय भगवानों सें लिपटी के खूब कानै। मतरकि ओकरो गोड़ नै उठै छै। गोड़ उठला सें पैहने ओकरा ऊ दिन याद आवी जाय छै जबे गुलबिया ओकरो छाती पर आपनों सर राखतें हुवें कहने छेलै, “हमरो ई छांव हमरो जिनगी सें कभी नै हटै।” आरो एकरो उत्तर में बलेसरो कहलें छेलै कि बस फसल कटै भरी के देर छै, यही ठाकुरबाड़ी में तोरो मांग सिंदूर सें भरी देबै। मतरकि ई सब कुछू नै हुवे पारले छेलै। फसल

लुटलै तेँ ऊ आपनोँ दुखोँ सेँ बोझिल होय गुलबिया के घोँर जाय रहलोँ छेलै। शायद दुख सेँ मनोँ केँ शांति वहीं मिलेँ पारै छेलै। मतरकि ऊ गुलाबो के घर तांय कहाँ जाबेँ पारलेँ छेलै। बीचे में पुरनिया रोँ भौजी राह रोकी केँ पूछनेँ छेलै, “कहाँ जाय छौ दियोर।” पुरैनिया वाली भौजी केँ पता छेलै कि ई बेरा में बलेसर असकल्ले कहाँ जावेँ पारै। ऊ दिन बलेसर कुछू नै छुपैलेँ छेलै। साफ-साफ मनोँ सेँ कही देलेँ छेलै, “गुलाबो कन जाय रहलोँ छी।” आरो पुरनिया वाली भौजी नेँ तबेँ ओकरा सब्भे बात बतैनेँ छेलै कि गुलाबो अबेँ ई गाँव सेँ बाहर केकरो कनयांय होय केँ चल्लोँ गेलै। सुनथेँ बलेसर के होश उड़ी गेलोँ छेलै। आरो भौजी सबटा बात कहतेँ चल्लोँ गेलोँ छेलै, “जोगबनी पर एक दिन नै जानोँ कौन भूत सवार होलेँ कि गुलाबो केँ जे पीटना शुरू करलकै तेँ दू घंटा तांय पीटतेँ रही गेलै बेचारी के, खलरी उतारी देनेँ छेलै। ओकरोँ कहीं ऐबोँ-जैबोँ बंद करी देनेँ छेलै। मतरकि ऊ आपनोँ जिद पर अड़ली छेलै कि जेना भी होतै, बलेसर सेँ मिलै वास्तेँ जरूरे जैतै। मतरकि ओकरोँ सब्भे प्रयास बेकार चल्लोँ गेलोँ छेलै। आरो एक दिन तेँ गुलाबो केबाड़ के सीकड़ तोड़ी केँ भागै लेँ चाहै छेलै, मतरकि पकड़ाय गेलै। ओकरोँ बाद भौजाय बिमली नेँ गुलाबो के हाथ-गोड़ बांधी केँ घरोँ में ठेली केँ गिराय देनेँ छेलै। कैन्हें कि जोगबनिया के है हिदायत छेलै आपनोँ कनयाय केँ कि अबेँ गुलाबो काहीं आबेँ जाबेँ नै पारै।

लोगेँ तेँ बहुते कुछू बोलै छेलै। पुदनिया माय एक दिन हमरोँ कानोँ में कहनेँ छेलै कि जोगबनिया केँ पैसा मिललोँ छै कि जल्दी सेँ अपनोँ बहिन के हाथ पीला करी केँ गाँव सेँ बाहर भेजी दौ, आरो ई काम एत्ता जल्दी करना छै कि केकरो कानो-कान खबर नै हुवेँ, नै तेँ जोगबनिया के ई गाँव भरी में हुक्का-पानी बंद करी देलोँ जेतै। हेनोँ खबर गाँव में उड़ी रहलोँ छेलै।

गुलबिया केँ चार-पांच दिन तांय बांधी केँ राखलोँ गेलै। वेँ अन्न पानी तेँ त्यागीये देलेँ छेलै। भौजाय जे अन्न मुँहोँ में दै छेलै, ६० □ गुलबिया

सब उगली तेँ देबे करै छेलै, आपनोँ भौजाय पर थूकियो दै छेलै। एक-दू दिन तांय तेँ आपनोँ भौजाय केँ खूब गारियो देनेँ छेलै। सबकुछ समझै छेलै गुलाबो। ओकरा यहू खबर होय गेलोँ छेलै कि ई सब काम ओकरोँ भाय-भौजाय केकरोँ कहला पर करी रहलोँ छै। मतरकि भौजाय बिमली सब कुछ सुनियो केँ अनसुनी करी दै छेलै। वें जानै छै कि ई सब बातों में कोय दम नै छै। ई सब एगो बुखार छेकै, मियादी बुखार थोड़े नी छै जे कि एक बार होलै तेँ बार-बार होतें रहतै। ई बुखार वही बुखार छै, जेकरा की कहै छै—एन्फ्लूजा। जे रहबो करै छै तेँ एक-दू दिन। बोखार उतरतें सब धीरें-धीरें ठीक होय जाय छै। आखिर केँ दिन गाली देतें ई मुँहो सें। एक तेँ अन्न त्यागी देनेँ छै, कत्तेँ शरीरोँ में जान छै जे भूखलोँ-प्यासलोँ चीखतें-चील्लैतें रहतै। आरो यही होलै। एक-दू दिन बीततें-बीततें गुलाबो के बोलबोँ-बाजबोँ आरो गारी देबोँ बन्द होय गेलै। समय के साथें शरीर के सब्भे ताकत छिन्न-भिन्न हुवेँ लागलै। एक-दू बार तेँ अन्न के अभाव में बेहोश भी होय गेलोँ छेलै गुलाबो।

दू रोज तांय बंधले रही गेलें छेलै आरो वही हालते में जबें ऊ बेहोश होय गेलै तेँ भौजाय नें हाथ खोली केँ खटिया पर बिस्तरे नांखी बिछाय देनेँ छेलै। अबेँ गुलाबो कुछ नै बोलै छेलै। कि बोलतियेँ, ओकरोँ तेँ देहोँ के सबटा ताकते छिन्न-भिन्न होय गेलोँ छेलै। खाली सुन्न नांखी कभी-कभी आंख खोली केँ ताकी लै छेलै। ओकरा देखी केँ लोग यही कहै छेलै कि अभी तांय गुलाबो के हुकुर-हुकुर जे जीवी रहलोँ छै तेँ केकरो आवै के ही आस में।

आरो तीनो-चार दिन नै बीतलौ होतै कि आपनोँ चचेरोँ साला बसंत के साथें गुलाबो के बीहा करी देलेँ छेलै। गुलाबो के बीहा की होलोँ छेलै, बसंत खाली आबी केँ ओकरोँ मांग में सिंदूर भरलें छेलै। गुलबिया आपनोँ तन-मन सें एकदम बेकार नांखी होय गेलोँ छेलै। की होलोँ छेलै, की नै होलोँ छेलै—कुछू नै पता छेलै गुलाबो केँ। केन्हें की घरों में जे कुछू होय रहलोँ छेलै, सब एक सुनियोजित ढंग सें रचलोँ एक नाटक मात्र छेलै। जेकरा भाग में लैवाला जोगबनी और विमली मुख

छेलै ।

गुलाबो के सबटा अरमानों पर खून के धारा बही गेलों छेलै । कुछू होश नै छेलै गुलाबो के । बेहोशी के अवस्था में बसंत होकरो जीवन के मालिक बनी गेलें छेलै । जों गुलाबो होश में रहतियै तें ई सब आपनों सामना में कभियो नै होय लें देतियै । मतरकि ऊ सब होय गेलों छेलै, जे गुलाबो आपनों मनो में भी नै सोचले छेलै । आस-पड़ोस के एक दूर जोर जनानी आबी के गीत-लाद गैले होते, मतरकि सब भीतरे-भीतर डरी रहलें छेलै कि नै जानों कबे की होय जाय ।

पुरनिया वाली भौजी थोड़ो थमी के कहने छेलै, “यहूर के बीहा कोय बीहा होय छै । कत्ते बढ़ियां होतियै जे ई घरों में गुलाबो के बारात सजी-धजी के गाजा-बाजा के साथें ऐतियै । गुलाबो गांव भरी में एन्हों लड़की छेलै, जे कि सुंदर होय के साथें खूब होशियारो आरो सब्भे कामों में ठोस छेलै । हेनों लड़की के ससुरारो यही गामों में होतियै तें कत्ते नीक्को होतियै । की कहियौं दीयोर, दुखनी नानी नें कहने छेलै कि गुलाबो के डोली नै जाय रहलें छेलै, ओकरो लहाश जाय रहलें छेलै । डोली राते-रात गामों से बाहर भै गेलै । चिड़ियो चुनमुन के पता नै लागलें छेलै । हाँ, एतना लोगें जरूरे कहै छै कि एक बार राती बड़ी जोर के चीख उठलें छेलै । ऊ चीख आरो केकरो नै, गुलबिया के रहै । तोरे नाम लै के चीखले रहैं दीयोर । हे दीयोर, तोहें जेकरो वास्ते जहां जाय रहलें छौ, ओकरा तें कोय दूसरे बहेलिया लै गेलौं ।” कहते-कहते भौजी के आँख लोराय गेलों छेलै आरो बोली सचमुचे में कलपे लागलें छेलै । आरो वही कलपित्तों सुरों में भौजी दू-चार बात आपनों बातों में आरो जोड़ी देने छेलै, “जे भी हुवे, बड़का लोग के बातो बड़का रड होय छै । देखें, आपनों स्वास्थ में धक्का लगला से कत्ते बड़ो काम करी दै छै ई बड़का लोग । जबे गुलाबो के ई सब बात पता चलतै तें वें कभियो खुश नै रहे पारतै । अखनी तें जोर-जबर्दस्ती सब्भे कराय देलकै बिमली भौजी नें—मतरकि जे कुछ करलकै ऊ अच्छा नै करलकै ।

६२ □ गुलबिया

हम्मैं सिनी तेँ सब्भे दिन ई लड़का लोगोँ के दवाब में रहीये जैबै । तोंही सोचोँ बलेसर, आय ई काम गुलाबो साथें होलै कल ई घटना आरो केकरोँ साथें हुवेँ पारै । ई बड़का लोगें आपनोँ पैसा के आगू केकरो कोय सुख देखै लेँ नै चाहै छै । बस जे चाहै छै, आपनोँ लेँ ही चाहै छै । नै पैसा में कोय ओकरा सें आगू बढै आरो नै कोय प्रतिष्ठा में । तोरोँ साथें की होलौं ? तों हुनकोँ सिनी के बराबरी तेँ नहिये नी करैलेँ चाहै छेलोँ, खाली आपनोँ लेली कुछू पैसा कमाय लेँ चाहै छेलौ । की मिललौं ? नै तेँ पैसा आरो नै तेँ प्रेम । दोनों चीज चल्लोँ गेलै एक्के साथ । हम्मैं छोटोँ लोगोँ के कोय मोँन नै होय छै, कोय इच्छा नै होय छै, कोय अरमान नै होय छै, जोँ बड़का लोगोँ सें टकराबै के बात होलौं नै कि हमरोँ सिनी के सबटा बात हुनकोँ सिनी के पैसा आगू दबी जाय छै । पैसा जे नै करबावै ऊ बड़का लोगो सें ।”

बलेसर केँ एक-एक करी केँ सब्भे बात याद आबेँ लागै छै कि ऊ दस रोजो तांय पटेल बाबू सें लैकेँ भूमि बाबू के द्वारी तांय पहुंची केँ ढेर देरी खाड़ोँ रहै । मिनटो तांय दोनों केँ सवालिया आंखी सें घूरतेँ रहै छेलै, कुछू बोलेँ नै छेलै, आरो फेनू कभी केला खेतोँ में जाय केँ ढेर देरी तांय कपसतेँ रहै आकि ठाकुरवाड़ी के देहरी पर माथोँ पटकतेँ रहै । आबेँ तेँ ओकरोँ आंखी के लोरो सुखी गेलोँ छै कानतेँ-कानतेँ । आरो देहरी पर माथा पटकला के बादो ओकरा कोय चोट नै बुझावै छेलै । एकदम सुन्नोँ-सुन्नोँ रड होय गेलोँ छै बलेसर के देह-हाथ ।

नै खाय के सुध रहै, नै पीयै के । नै धरान के प्रति रूचि नै, देहोँ के ख्याल । गुलबिया के बिना बलेसर के जिनगी सें लै केँ दुनिया तक बेरथ होय गेलोँ छेलै, बेमतलब । श्मशान नांखी, जेकरोँ बीच ऊ एगो जित्तोँ लाश नांखी बुलतेँ रहै छै ।

जखनी गुलबिया के आँख खुललै, वें अपना केँ अनचीन्होँ जगह पर पैलकै। आँख फाड़ी-फाड़ी केँ सब घर द्वार दिस ताकै छै। मतरकि कोय चीज आपनोँ पहचानलोँ के नजर नै आबै छै। तीन-चार दिन के बेहोशी के बाद सौँसे शरीर एकदम निढाल रंग होय गेलोँ छेलै, मतरकि अपनोँ बदन के सौँसे ताकत लगाय केँ वें कोठली सें बाहर ऐंगना में आबै छै। वें सब चीज केँ गौर सें देखै छै, कोय चीज हेनोँ नै बुझाय, जे ओकरोँ घर केँ रहै। आँख मली-मली केँ वें सब चीज केँ चीन्हे के कोशिश करै छै, मतरकि सब बेकार होय जाय छै। जहाँ ओकरोँ खूँटी होय छेलै, जेकरा पर वें अपनोँ शृंगार के सामान रखै छेलै। ऊ दिस नजर घुराय छै तें वहाँ पर एकटा फोटो टंगलोँ दीखै छै। केकरोँ छै—कुछ जनाय में नै आबै छै।

हिन्हें-हुन्हें देखला के बाद वें जोर-जोर सें चीकरलेँ भी जाय रहलोँ छै कि हमरा ई कहां लानी केँ रखी देलकै ई मुँह झौँसा सीनी। ओकरोँ चीखै-चिल्लावै के आवाज सुनी केँ गुलबिया के दूल्हा बसंत वहाँ आबी जाय छै। ओकरोँ हाथ जोर सें अमेठी केँ बोलै छै। ई राकसिन हेनोँ की चीकरी रहलोँ छैं, ई तोरोँ दूल्हा के घर छौँ। आरो तों अखनी ससुरार में छौ। ई तोरोँ भाय-भौजाय के कोनो द्वारी नै छै जे यहाँ तोहें हेना करी केँ चीखवोँ आरो चिल्लैबोँ। यहाँ तोरोँ चीख सुनै वाला कोय नै छै। अब चुपचाप अपनोँ कोठली में जा आरो ई चीखबोँ-चिल्लैबोँ बंद करोँ।

मतर गुलबिया पहले नांखी टांस गल्लोँ सें कही छै, “नै तोहें हमरोँ मरद छेकौ, न हममें तोरोँ जनानी। तों हमरा पर हुकुम चलाय वाला के। तोंहें केना ई समझी रहलोँ छौ की तोरोँ हुकुम हमरा पर चली जैतों। आरो वहु में ओकरोँ, जेकरा सें हमरोँ कोय रिश्ता नै छै, एक अर्धही पैसा के भी नै। तों हमरा बातों सें बान्है वाला के होय छौ। हममें केकरोँ गुलामी आय तलक नै करलेँ छियै। समझलोँ की नै।” आरो

अपनों हाथ छोड़ाय केँ फिरु भागै के कोशिश करै छै, मतरकि कमजोर शरीर के कारण वहीँ पर धम्म सना बैठी जाय छै। शायद ओकरोँ माथों चकराय उठलोँ छेलै।

बसंत जे बहुत देर सें अपनों कनयाय के बात सुनी रहलोँ छेलै, गुलबिया के बातों सें बसंत के शरीर कांसा के बरतन नाँखी झनझनाय उठै छै आरो वें वही गुस्सा में ओकरोँ दोनों बांह पकड़ी केँ ओकरा खाड़ों करी केँ अपनों आवाज केँ थोड़ा आरो टांस करतें हुवें बोलै छै, “आय तलक तें तों केकरोँ गुलामी नै करलोँ होबों, कैन्हें की तोरा होनों मरदे नै भेटैलौं। मतरकि आय सें तों हमरोँ सब गुलामी करबौ। आरो हम्में तोरा सें सब गुलामी करभैभौं। कैन्है की हम्में अब तोरोँ मरद होलियौं। मरद यानि मालिक। आरो जेना गुलाम आपनों मालिक के गुलामी करै छै, आय सें तहूँ अपनों ई मालिक के गुलामी करभौ। है कान खोली केँ सुनी लौ।”

गुलबिया ओकरोँ ई बात सुनथें अपनों मुंडी, जे नीचेँ झूकलोँ छेलै, उठैलकै आरो एक बार बसंत के मुंह दिस गोस्साय केँ ताकै छै। नै जानौं, फेनू कहाँ सें ओकरा में ताकत घुरी ऐलोँ छेलै। आरो लगभग चीखै के सुरों में बोलै छै, “की सबूत छै, कि तोंहें हमरोँ मरद छौ, आरो हम्में तोरोँ जोरू।”

गुलबिया के बात सुनी केँ बसंत ओकरोँ मांगों में अपनों ओंगरी रगड़तेँ हुवें बोलै छै, “है जे सीती में लाल टेस सिनूर देखै छौ, वही सबूत छेकै तोरोँ हम्में मरद छेकियै।”

गुलबिया अपनों ओंगरी आपनों सीती पर राखलेँ छेलै आरो फिरु आंखी सें आपनों ओंगरी केँ देखै छै, जेकरा पर लाल-लाल सेनूर उतरी आबै छै। ऊ एक क्षण लेली निस्तेज पड़ी जाय छै आरो दूसरोँ बार अपनों नजर केँ चारो तरफ घुराय छै। हठाते ओकरोँ नजर वाहीं पर अलमुनियम के लोटा पर पड़ी जाय छै, जेकरा में भरलोँ लोटा पानी छेलै। गुलबिया झपटी केँ ऊ लोटा केँ उठाय लै छै आरो अपनों मुड़ी झुकाय केँ सौंसे माथा धोय लै छै। पानी ढारते सबटा सिनूर भरभराय

केँ धुलाय जाय छै। दहिना हाथ सें पानी ढारी लै छै आरो बायां हाथ सें अपनोँ माथा केँ खूब जोर-जोर सें रगड़ी केँ सबटा सिनूर केँ साफ करै लेँ चाहै छै। जेना-जेना अपनोँ बायां हाथ केँ रगडै छै, होने-होने आरो सेनूर ओकरोँ सौंसे बदन पर पानी के साथ मिली केँ लाल टुह-टुह होय केँ गिरेँ लगै छै। अखनी गुलबिया के मुँह-कान सेनूर पानी सें मिली-जुली केँ एकदम लाल-लाल होय जाय छै। अखनी गुलबिया एकटा शक्ति रूप में ठाड़ोँ देवी नाखी बुझाय रहलोँ छै। जेना की लाल जावा के फूल लाल टस-टस रं होय छै आरो भगवती पर चढ़ै छै, होने केँ लाल रं जावा फूल नांखी भरी गेलोँ लगै छै। हेने बुझाय छै जेना अखनी गुलबिया अपनोँ हाथ सें केकरो खून करी देलेँ रहै आरो खून के सौंसे छींटा ओकरोँ बदन पर पड़ी गेलोँ रहै। आरो एक बार होकरोँ ई रूप देखी केँ बंसत भी भीतरे-भीतर डरी जाय छै, मतरकि तुरंते अपना केँ संभाली लै छै। अब गुलबिया के सौंसे माथा एकदम सूनोँ होय जाय छै। आरो वें सिनूर के बहते धार केँ देखते हुवेँ बोलै छै, “लेँ, हम्मै ई बीहा केँ बीहा नै मानै छी। केकरो मांग में जबरदस्ती सिनूर भरी देला सें कोय केकरोँ बिहाता नै बनी जाय छै। हम्मै तोरोँ देलोँ सबटा सिनूर धोय केँ गिराय देलियोँ, अब तेँ नै हमरोँ कोय मालिक आरो नै हम्मै केकरो गुलाम। अब तोहोँ कोन सबूत देभौ कि तोहें हमरोँ मालिक छेकौ, आरो तोहें हमरोँ मरद।”

बसंत, जे गुलबिया के ई रूप देखी रहलोँ छेलै, वें लोटा ओकरोँ हाथ सें छीनी केँ एक तरफ फेंकते हुवेँ गुस्सा सें बोललै, “की होलै, जोँ तोहें एक बार धोय देबौ तेँ की हम्मै तोरोँ मालिक नै हुवेँ पारियै। तोरोँ मानला नै मानला सें की होय जैते। तोँ जेत्ता बार सिनूर धोबौ, हम्मै ओत्ता बार तोरोँ मांग सिनूर सें भरी देबौ। आरो हे बेँ लेँ भरलियोँ।” ई कही केँ बसंत ओकरोँ मुँह सें चूते गीला सिनूर केँ अपनोँ दायां हथेली पर उतारी केँ फेनू गुलबिया के सीथी पर राखी दै छै। राखी की दै छै पोती दै छै। एक बार नै दू-चार बार, होने केँ जैसेँ गुलाबोँ के माथा एकदम लाल-लाल होय जाय छै, जेना ओकरोँ मुँह नै

रहै, कोय लाल सुरजे देहो पर उगी गेलो रहै।

आरो बसंत तबे वही गोस्सा में कहै छै, “समझलो कि नै तोहें, आरो अब ते कोय तोरा हमरो बिहैतो कहतौ।”

गुलबिया अपनो शरीर के सौंसे ताकत लगाय के उठै छै आरो अपनो माथा के बाल पीछू करते हुवे हठाते बसंतो के कमीज के बटन घींचते हुवे बोले लागलै, “तों हजार बार हमरो मांग में सिनूर डालबौ, आरो हममें हजार बार हेकरा धोय डालबै।” आरो अपनो दांत पीसते हुवे बसंत के कमीज पकड़ी के ओकरो शरीर के खींचे लगै छै। गुलबिया बसंत के कमीज के बटन भी खींचले जाय छै आरो अपनो भीतर के सौंसे ताकत लगाय के जोर-जोर सें चिल्लैने जाय छै। ओकरो ई चीख-पुकार के आवाज बाहर जाय रहलो छेलै। ई सब दृश्य देखै लेली अंगना में केत्ता लोग जमा होय जाय छै। नयी कनियाय के देखै के उत्साह में सब ऐलौ छेलै, मतरकि ओकरो ई रूप एकटा तमाशा बनी जाय छै। अड़ोस-पड़ोस के सबटा जर-जनानी घुंघटा के भीतर सें आँख फाड़ी-फाड़ी के सब दृश्य देखे लागै छै। बच्चा सिनी हैरत सें जे देखी रहलो छै, ते सबके मुंह दू फांक में बंटी के रही जाय छै। जेना की बसंत आरो गुलबिया के रिश्ता अखनी दू फांक में बंटलो दीखी रहलो छै।

बसंत मुहल्लावाला के सामना में देखी के आरो गोस्सा होय उठै छै। से भीड़ के छाटे लेली ऊ गुलबिया के हाथ पकड़ी के ले जाय लगै छै। मतरकि गुलबिया आरो चिल्लाय-चिल्लाय के बसंत के गारी दै लागै छै कि ई आदमी हमरा सें जबरदस्ती बीहा करले छै। ई बीहा हमरो होश-हवास में नै होतो छै। एको कहला सें की हममें हेकरो बीहाता होय गेलियै। आरो सब जर जनानी कभी गुलाबिया के ते कभी बसंत के मुंह ताके लगै छै। हेकरो पहिले की गुलबिया आरो बेसी कुछु बोलतियै, बसंत ओकरा कोठली में ले जाय छै आरो धक्का दै खटिया पर वहीं गिराय दै छै। फेनु झपटी के बाहर आबै छै आरो दरवाजा के कुंडी चढ़ाय दै छै। गुलाबो बिछौना पर गिरी के कपसी-कपसी के कानै

लगै छै । ई सब दृश्य देखी केँ बसंत के माय झनकी बसंत सें बोले छै, “छोड़ी दै बसंता तों एकरा ई कोठली में । मरै लेँ छोड़ी देंही दू दिन आरो भूखलोँ-प्यासलोँ । अपने माथोँ ठंडाय जैते । आखिर कबतक ई अपनोँ ताकत केँ अजमैतें । बहुत बलवाला केँ देखलियै । ई कौन सत्ती छेकै जे तपस्या करतें रहती अपनोँ यार-भतार के । आरो सत्ती नाखी पाबिये लेती अपनोँ भोला केँ । ई कलमुंही हमरोँ घर आबी केँ हमरा सिनी के नाक में दम करी मारलकै । जोँ ई सब बात पहिलें जानतियै तेँ कभियो अपनोँ बेटा के बीहा ऊ घर में नै करतियै । रहतियै अपनोँ भाय-भौजाय के कपारोँ पर । हमरोँ कपारोँ पर पटकी देली ई बिमली नें । नै जानोँ की कही केँ बसंत केँ बुलैलकै आरो वहाँ ई आफत केँ हमरोँ माथा पर पटकी देलकी । पागल, बताशोँ केँ की हमरे लेली रखलकी छेलै ऊ बिमली । आरो कोय घर नै मिललै, जे हमरोँ बेटा केँ वहाँ फंसाय देलकी । कब तलक हमरा ई पागल कनयाय केँ दोही लेँ लागतै । बिमली केँ आरो कोय मुड़ै लेँ नै मिललै तेँ अपने भाइये मिललै । बहिन होय केँ डायनपनो उतारलेँ छै अपनोँ भाय पर । है बीहा थोड़े करबैलेँ छै । ”

बसंत के माय के आवाज जोर पकड़लोँ जाय छै, एत्तेँ जोर की गुलाबो अपनोँ कपसबोँ छोड़ी केँ अपनोँ सासोँ के बात सुनेँ लागै छै । घंटा आध घंटा झनकला के बाद बसंत माय चुप होय जाय छै । बाहर के सबटा हल्ला-गदालो शांत होय जाय छै । सब लोग जाय चुकलोँ छै । आरो सौंसे घरों में चुप्पी पसरी गेलोँ छै । गुलबिया अपनोँ आँख मुंदी लै छै । आरो आँख मुंदतै ऊ कहीं लौटी जाय छै अपनोँ अतीत में । अतीत के सबटा बात सिनेमा रील नांखी ओकरोँ दिमाग पर उतरेँ लगै छै ।

ऊ दिन जबें वें खेत जाय लेली तैयार होलौं छेलै, भाय नें खेत जाय सें मना करै छेलै। भाय के बात उठाय देनं छेलै आरो जाय लेँ निकलै छै, ई देखी केँ जोगबनी गुस्साय गेलौं छेलै। ओकरोँ हाथ पकड़ी लेलेँ छेलै आरो गाल पर एक थप्पड़ जड़ी देलेँ छेलै। ओकरोँ बादो वें केन्हौँ हाथ छोड़ाय केँ भागै रोँ कोशिश करलेँ छेलै। ऊ गिरी पड़लौं छेलै। तखनिये भौजायो बिमली आबी गेलौं छेलै। ओकरा भर पांजा पकड़ी केँ घर भीतरी लेँ गेलौं छेलै। तखनी की रं बाघिन बनी केँ वें अपनौँ भौजाय केँ बिछौना पर गिराय देलेँ छेलै आरो पता नै वें अपनौँ भौजाय केँ की करी देलेँ रहतियै जों तखनिये भैया नै आबी गेलौं रहतियै। भाइयो ओकरोँ रूप देखी केँ डरी गेलौं छेलै। हमरोँ ऊ रूप-बिंडोवो वाला आंधी-तूफान वाला बडका-बड़का गाछी केँ जड़ों सें उखाड़ी दै वाला अंधड़ बताश। तहियो गोस्साय केँ दांत पीसतें भैया बोले छै, “आय सें तोरोँ खेत जैवोँ बंद।” हममें गोस्साय केँ पूछलेँ छेलियै, “कैन्हें ?”

भाय पूछनें छेलै, “कैन्हें, हौ की तोरोँ आपनौँ खेत छौ कि तों वहाँ जैबे करबे ? ऊ के होय छौ तोरोँ ?”

‘के होय छौ तोरोँ’, ऊ ई बात सुनथें तखनी की रं के होय गेलौं छेलै। ओकरा लागलौं छेलै की जीवन के आखरी बेला में ओकरा सें कोय एक सत्य बात पूछलेँ रहै। आरो तब झूठ की बोलना छेलै। वहू मुंह फाड़ी केँ साफ-साफ कही देलेँ छेलै, “सुनै लेँ चाहै छौ तें सुनौँ, बलेसर के होय छै हमरोँ ? बलेसर हमरोँ होय वाला पति छेकै, हमरोँ सुहाग। आरो सुनी लेँ। हाँ, हाँ, ऊ हमरोँ खेत छै। एत्ता दिन हममें ऊ खेत सें अपने नै, तोरो दोनों के पेट भरलौं छेलियै। तखनी कैन्हे नै रोकलेँ छेलौ, जे आय हमरा कैन्हे ऊ खेत जाय सें रोकरी रहलौं छौ।

आय दोनों के अंतड़ी भरै वाला कोय दूसरोँ घरों में आबी गेलौं छै की ? याकि हमरा घरों में बांधी केँ अब हमरोँ देहों के कमाय

खाय लेँ चाही छौँ” ।

हमरोँ बात सुनथैँ भैया केत्ता बाघ-चीता होय गेलोँ छेलै । आरो ठीक बाघे नांखी ओकरोँ गल्लोँ पकड़ी लेलैँ छेलै, जेना कि कोय बाघ अपनोँ पंजा केँ अपनोँ शिकार पर राखी देलेँ रहै । आरो केन्होँ दहाड़तेँ हुवेँ कहलेँ छेलै, “हरमजादी, औरत जात होय केँ मरदाना केँ पोसे के बात करैँ छैँ । तोरोँ हेनोँ पचास औरत ई घरों में होतैँ तेँ हम्में असकेल्ला ओकरा खिलाबेँ पारौँ, ओकरा में तोरोँ देह के कमाय हम्में खैबैँ” । पता नै भैया की करी देतियै । ऊ तेँ संजोग रहै कि तखनिये कोय दरवाजा पर कुंडी खटखटैलेँ रहै ।

पटेल सिंह नेँ आबी केँ हांक पारलकोँ छेलै । हांक सुनथैँ भैया द्वारा दिस हड़बड़ैलोँ भागलोँ छेलै । भैया आरो पटेल सिंह के बीच होय वाला सबटा बात हम्में ठीक-ठीक सुनलेँ छेलियै । पटेल सिंह कही रहलोँ छेलै, “देख रे जोगबनिया, तौँ अपनोँ बहिन केँ बांधी केँ रख, कोय तरह के हंगामा खड़ा नै करैँ । आरो जेत्ता जल्दी होय छौँ ऐकरोँ बीहा करी केँ ई गाँव सेँ बाहर कर । ई बात हम्में तोरा कल्हो कही देलेँ छेलियौ ।” तेँ भैया के आवाज सुनाय देलेँ छेलै । वेँ पूछी रहलोँ छेलै, “मतरकि मालिक, एत्ता जल्दी हम्में एकरोँ बीहा कहाँ करबै ।” पटेल सिंह नेँ गल्लोँ आरो टांस करी बोललेँ छेलै, “जेना भी हुवेँ, बीहा तेँ करैँ लेँ पड़तौ, नै कोय मिलैँ छौँ तेँ तौँही बीहा करी लेँ अपनोँ बहिन सेँ” । भैया के मुंह के बोली जेना छिनाय गेलोँ रहै । पर मरदानगी झाड़ै वाला भैया पटेल सिंह के सामना में मौगी नांखी गुडमुड़ाय गेलोँ छेलै ।

तखनी भैया केत्ता धिधियैलोँ आवाज में पटेल सिंह सेँ कहनै छेलै, “हे की कहैँ छौँ मालिक, कोय हिन्दू कि अपनोँ बहिन सेँ भी बीहा करैँ छै । हेनोँ पाप बोली केँहे बोलैँ छियै ।” वेँ एकदम चुपचाप होय गेलोँ छेलै ।

आरो नै जानौँ तखनी भैया के बदला पटेल सिंह पर हम्में की रंग खंखूआय उठलोँ छेलियै । कहलेँ छेलियै, “ई विष के गाछ जंगलोँ सेँ उखाड़ी देना चाहियोँ, सौँसे जंगल माहूर-माहूर करी रहलोँ छै ।”

हमरोँ बात पटेल सिंह पर ठीक-ठाक लगलोँ छेलै । मतरकि नै जानौँ की सोची केँ ऊ कुछु शांत बनलोँ रहलोँ छेलै । आरो जखनी भैया द्वारी सेँ ऐंगना दिस ऐलोँ छेलै, ओकरोँ अंटी में कुछु छेलै । जरूरे ऊ टका के गड्डी होतै । हमरा बेची दै वास्तेँ पटेल सिंह नेँ ऊ टका हमरोँ भाय केँ थमैलेँ होतै ।

“अरे, तोँ सिनी आदमी थोड़े छौ । आदमी के नाम पर एकटा कलंक छौ । पैसा आगू में सब ईमान-धरम बेची आबै छौ । तोरोँ सिनी रोँ तेँ कुत्ता रंग जी लपलप करै छौँ-जेना कुत्ता केँ हड्डी कहीं नजर आबै छै, ओकरोँ सौँसे बदन ओकरा पर लपकी पड़ै छै । तोँ सिनी पैसा आगू में कुत्ता नाँखी होय जाय छौ । जे टका वास्तेँ बहिन केँ बेची दै, ऊ भाय की, मनुखो नै । कुत्ता हड्डी केँ चबैतेँ अपनोँ जबड़ा के खून चाटेँ लगै छै । तोहोँ वहै रं छौ, अब पैसा लेली अपने बहिन केँ बेची रहलोँ छौ ।”

भाय हमरोँ ई सब बात सुनी केँ आरो गोस्साय उठलोँ छेलै । आरो गाल पर खींची केँ दनादन केत्ता थप्पड़ मारलकोँ छेलै । तखनी हम्मू एकदम नागिन नांखी फुंफकारतेँ खाड़ी होय गेलोँ छेलियै । आरो कहलेँ छेलियै, “मरदानगी झाड़ै छौ, हम्मू अपनोँ बलेसर केँ बुलाय केँ लानै छियौँ, फैसला करी लियौ की केत्तोँ बड़ोँ मरद ? जनानी पर जोर दिखाय केँ कोय मरद बनै छै ।” आरो ई कही केँ हम्मै द्वारी दिस भागलोँ छेलियै कि भाय नेँ झपटा दै केँ हमरा पकड़ी ले लेँ छेले ।

.....गुलबिया केँ अनचोके अपनोँ माथा के कोकड़ी में खूब दरद बुझाबै लागै छै....., भाय नेँ की रं हमरोँ बाल खींची वाहीं पर मोटोँ-मोटोँ रस्सी सेँ कस्सी केँ बांधी देलेँ छेलै । हम्मै कसमसैतेँ रही गेलोँ छेलियै । मतरकि टस सेँ मस नै हुवेँ पारलोँ छेलियै । आखिर मरद जात के बल के आगू जर-जनानी के ताकते की रही जाय छै । आरो हम्मै विवश होय केँ रही गेलोँ छेलियै ।

.....ओकरा फिनू याद आबै छै बलेसर के । वेँ जरूर अपनोँ खेत पर हमरोँ आसरा देखतेँ होतै, मतरकि कभीयो नै मिलेँ पारलियै

हम्में। ऊ दिन जे संझकी घर ऐलो छेलियै, तखनिये बलेसर सें मिललो छेलियै। केत्ता खुश छेलै। हमरा अपनो बांही में बांधी के कहलें छेलै, “देखौ, गुलाबो, अब हमरो तोरो जिनगी के सबसे बड़ा सुख के दिन भी नगीच आबी रहलो छै। जोन दिन ई खेत के सबटा केला बिकी जैतै, हम्में तोरो घर पर आबी के तोरो भाय-भौजाय सें जिनगी भर वास्ते तोरो हाथ मांगी लेबों। हाँ, ऊ दिन बहुत जल्दिये ऐतै। जब हम्में अपनो यही हाथो सें तोरो ई दुधिया सीती में फलाशे हेनो सिनूर के रंग भरी देबों।”.....ई बात याद ऐतै गुलाबो के हाथ अपनो मांगों पर चललो जाय छै। ओकरा लागै छै अभियो ओकरो मांग दूधिये बनलो छै। एकदम सुन्नो-सुन्नो। केकरो हाथ सें सिनूर पिन्है के आकांक्षा में बेचैन।

.....बलेसर के केत्ता व्याकुल होय के कहलें छेलै, “हम्में तोरो पास जलदिये ऐभों।” केत्ता गद्गद होय गेलो रहै हमरो मन। मतरकि भगवान हमरे वाम होय गेलो रहै। ऊ दिन सें घर ऐतै कहीं सुख के पहिया एकाएक पलटी गेलो छेलै आरो सुख कहीं उल्टी के गिरी गेलो छेलै। ऊ दिन सें आय दिन तांय खाली दुखे-दुख ते देखलें छेलै गुलबिया नें। एक्को दिन नै बढ़िया सें खेलको छेलै, नै बढ़िया सें सुतलें छेलै। की हठाते ओकरा फेनू बलेसर के ख्याल आबी जाय छै-की होलो होतै बलेसर के। ओकरो खेत बिकलो होतै की नै। जरुरे भूमि बाबू ओकरो खेत बिकबाय देलें होतै। चाहै भूमि बाबू रहै या पटेल सिंह—एक राक्षस के दू आंख। जरुर बलेसर के सुख शांति घर-द्वार, सब संपत निगली गेलो होतै।

बलेसर के ते घरों-द्वार रूक्का पर लिखबाय लेलें छेलै। अब वें घर-द्वार सें लैके केला खेत तांय सब कुछ हारी गेलो होतै। नै जानों, कहाँ रहते होतै, की खैते होतै, हमरो बिना ते ऊ आरो टूटी के रही गेलो होतै।

हमरो बिना एक्को दिन खाना नै खाय छेलै ऊ। जब तलक कौरी सें खिलाय नै छेलियै, खाय नै छेलै। केत्ता मनाय-मनाय के

खिलाय लेँ पड़े छेलै। मरद के मन भी एत्ता जनानी रं होय छै, ई तेँ हम्मं पहली बार जानलेँ छेलियै बलेसर के संग रही केँ। सचमुच में मरद अर्धनारीश्वर होय छै, आधा मरद आरो आधा जनानी। अब ओकरा के खिलैतेँ होतै। खैते होतै की नै खैतेँ होतै। घर-द्वार सेँ टूटलोँ आदमी केँ के पूछै छै। हमरोँ याद में तेँ आरो पगलाय गेलोँ होतै। कोय एकटा पंछियो नै मिललै, जेकरा सेँ ओकरोँ हाल-चाल जानतियै।

ऊ जतना बलेसर के बारे में सोचै छै, ऊ उतेँ ओकरोँ नेहोँ में भीजलोँ बनलोँ जाय छै, जेना की पानी में मिसरी घुलतेँ हुवेँ, नोँन घुलतेँ हुवेँ कि हठाते ओकरा लागै छै कि द्वारी पर बलेसर आबी केँ खाड़ा होय गेलोँ छै। हांक पारी रहलोँ छै, “गुलाबो, हम्मं आबी गेलियौ। कै रोज सेँ हम्मं तोरोँ बिना खाना नै खैलोँ छियै। एक्को कौर खैले नै जाय छै गुलाबो, हम्मं आबी गेलियौ।”.....गुलाबो है सोचै नै पारै कि ई इक सपना छेकै, ई सच नै छेकै, तहियो ऊ धड़फड़ाय केँ उठै छै आरो द्वारी दिस भागै छै। मतरकि कोठरी के किबाड़ तेँ बंद छै। वें माथोँ पटकी-पटकी चीखना शुरू करै छै, “किबाड़ खोलौ। हमरोँ बलेसर आबी गेलोँ छै, द्वारी पर खाड़ोँ हमरा हांक दै रहलोँ छै। हम्मं बलेसर बिना नै रहै पारौ.....।”

गुलाबो घंटा भरी आपनोँ कपार किबाड़ पर पटकतेँ रही छै बलेसर के नाम लै-लै केँ। पहलके नाँखी द्वारी पर कुछु जर-जनानी जुटी गेलोँ छै। बच्चो-बुतरु खेल-तमाश बुझी केँ आबी गेलोँ छै। बसंत आपनोँ कोठरी में गुस्सा में साँपेँ नाँखी फंफकारी रहलोँ छै, आपनोँ सारा विष ओकरा पर उतारी केँ ओकरा आय मारियै देतै। बसंत के माय अपनोँ बेटा केँ कसी केँ पकड़लेँ होलोँ छै। कही रहलोँ छै, “बेटा है नै करै। मरी हेराय गेलौ तेँ जिनगी भर वास्तेँ कोर्ट-कचहरी आरो जेल देखै लेँ पड़तै। आरो हुन्ने केबाड़ी पर गुलाबोँ के माथोँ पटकबोँ, चिचियैबोँ जारी छै पहिलके नाँखी। कै दिनकोँ नाँखी।

ई बात के खबर समूचा गांमोँ में फैली जाय छै। बसंत आपनोँ कनियांय केँ पागल करी देनेँ छै। हां, पागल करार करी देला के बादो

बसंत गुलाबो के रोजे-रोज मारबो-पीटबो भी नै छोड़े छै। आरो गुलाबीयो जेना ई बातों के अभ्यस्त होय गेलो छै। ई देखी-जानी के टोला-पड़ोस के जोर-जनानी बसंत माय के समझैतें रहै छै, “हेना नै करवाबो बसंत माय, बसंत के कुकर्म करै सें रोको। जल्लादो है रड जीव-जंतु के नै काटै छै जेना कि बसंत आपनो कनियैनी के पीटै छै। अबे तें ऊ तोरो घरो के इज्जत छेकौं। हेनो जुलूम नै करौ, आखिर तें ऊ एक जित्तो इंसान छै। ई रड गरजबो अच्छा नै होय छै।” खाली टोला-पड़ोसे के जोर-जनानीये नें जे आबै छै, है बात समझाबै छै, जवान-जुहान सें लै के बड़ो-बूढ़ो तांय। आखिर में बसंत कुछ शांत भै जाय छै।

आरो जेना-जेना बसंत नरम पड़लो जाय छै, होना-होना गुलबिया आरो उग्र होलो जाय छै, जेना बिना कुछ फैसला के ऊ चुप नै बैठतै। ऊ सांझे जबे तेतरी के दादी बसंत माय सें जोरन मांगै लें ऐलो छेलै तें बाते-बात में पंचायतो के बाद खुली गेलै। बात शुरू करलें छेलै बसंत माय नें, मतरकि अंत होलो छेलै तेतरी दादी सें।

तेतरी दादी नें फुसफुसाय के नै, मतरकि टनको गल्लो सें कहलें छेलै, “हेकरा में सोचै-विचारै के की जरूरत, देहो पर है रड गुरो पाले के जगह फोड़ी के बहाय देबौ ही अच्छा। पंच बैठाय लें आरो जेकरो पक्षो में फैसला होतै, होकरे जीत।”

तेतरी दादी के बात सुनी के बसंत माय कहने छेलै, “धीरें बोलो माजी, संपिनिया सब्भे सुनतें होथो, सुतै के ढोंग करतें रहै छै, आरो जागले-जागले सब सुनतें रहै छै।”

मतरकि तेतरी दादी होने टनको गल्लो सें कहने छेलै, “अरे ये में सुनै, नै सुनै के की बात छै, पंच जे फैसला देतै, ऊ तें सब्भे के मानै लें लगतै। आरो हमरा तें लागै छीं पछियारी वाली कि फैसला तोरो पुतैहिये के पक्षो में होतौं। सौंसे गांव में हल्ला छीं कि बसंत रोजे आपनो कनियैनी के गाय-बैल नांखी डंगाबै छै। आरो फेनू तोरे बेटा यहू हल्ला करी देने छै कि ओकरो कनियांय पगलिया छै। आबे

पछियारी वाली तोहीं कहौ कि पगलिया केँ घरों में राखै सें की फायदा, हमरा तें लागै छै कि पंच यही कहतौं कि गुलाबो केँ ओकरोँ नैहर जाय लेँ देना चाहियौ, ओकरोँ दिमाग ठीक होतै की खराबे रहतै, ओकरोँ नैहरा वाला जानै ।

तेतरी दादी जोरन लै केँ चल्लोँ गेलै, आरो आपनोँ कोठरी में ठिक्के सुतै के बहाना करतें गुलाबो नें कान तेज करनें सब्भे सुनी लेनें छेलै, आरो ओकरोँ चेहरा पर एक बारगिये ढेरे चमक उतरी गेलोँ छेलै, जेना कै माघ महीना के कुहासा फाड़ी केँ सुरूज के किरण गाछों पर खिली गेलोँ रहै । मतरकि गुलाबो नें आपनोँ ई रूप आरो भाव एकदम छुपाय लेनें रहै आरो वै दिनों के बादे सें ओकरोँ पगलपंथी आरो बढ़ी गेलै ।

अनचोके ई परिवर्तन सें बसंत माय आरो घबराय गेलोँ छेलै । जे बातों वास्तें ओकरोँ मोँन तैयार नै होय रहलोँ छेलै, ओकरोँ वास्तें ऊ एकदम तैयार छै—अच्छे होतै पंचा बैठाय लेबै । पंच पुतैहिया के पक्षो में फैसला नहियो देतै तेँ कही सुनी केँ दिलवाय देलोँ जैतै । अबेँ एकरोँ है घरों सें निकलिये जाना अच्छा होतै, जेतैँ जल्दी हुवें ।

आरो सप्ताह भरी के बादे गांव के पछियारी टोला के बरगद गाछी नीचें पंचायत बैठलोँ छेलै । ठीक सांझ के पांच बजे पंच सिनी गाछी तरी जुटी गेलोँ छै । पंच आबै के पहिनें टोला के सब्भे जोर-जनानीयो के भीड़ पहनें सें जुटी केँ तैयार छै । सब्भे केँ एक्के उत्सुकता छै कि आय पंचायत की फैसला करतै । फैसला गुलबिया के पक्ष में होतै की बसंतों के पक्षो में । यही उत्सुकता केँ शांत करै लेली गांव के बड़ोँ-बूढ़ोँ सें लैकेँ जवान-जुहान तक जुटी गेलोँ छै ।

पंचायत में तेतरी दादी सें लैकेँ मुखिया शमशेर सिंह तांय आबी गेलोँ छै । सब पंच सिनी गाछी के नीचू बनलोँ पिंडा पर पालथी मारी केँ बैठी जाय छै ।

एक तरफ जनानी सिनी बड़का-बड़का घुंघटा डाली केँ अंचरा मुँहोँ में दबाय केँ कनखी सें पंच के मुँह दिस ताकै छै, आरो दोसरोँ

तरफ मरादाना सीनी पंचो तरफ मुंह करी के बैठलो छै। मतरकि भितरिया बात यही रहै कि सब कोय आधे मनो सें पंचो दिस देखी रहलो छै आरो आधो मोन ते सबके बस गुलबिये पर गड़लो होलो छै।

गुलबिया जे बड़ी निसंकोच होय के एक दिस आगू में बैठलो होलो छै—ठीक पंचो के आमना-सामनी। ओकरो मरद ओकरा सें थोड़ा हटी के वही पर बैठलो छै। मतरकि गुलबिया के चेहरा पर तनियो टा ई भाव नै छै ऊ आपनो सोसरारी के कुल-परिवारो के बीचो में बैठली छै। ओकरो चेहरा पर अनदिना सें कुछ ज्यादा चमक छै। ओकरो चेहरा है बताय रहलो छै, जेना ऊ बहुते कुछ जल्दीबाजी में कहना चाहै छै। गुलबिया के आंख कही रहलो छै कि ओकरो विश्वास छै, जीत ओकरे होतै, पंच ओकरे पक्षो में बोलतै। आरो तबे की छै। गुलबिया ते मैना बगरो नांखी स्वतंत्र होय जैतै। एकदम सुग्गे नाखी टांय-टांय करने ऊ पिंजरा सें उड़ी जैतै आरो पहुँची जैतै आपनो वही जंगल, जहाँ ओकरो खोता छै। खोता में ओकरो मरद कि रं जवान होय गेलो होतै ओकरो आसरा ताकते-ताकते। जखनी ऊ जंगल पहुँचतै, सौसे जंगल ओकरो टिटकारी सें गुंजी जैतै। ई सब बात सोचथै गुलबिया तन-फन करे लागले छेलै। आरो जखनी एक पंचे गुलबिया सें है पूछले छेलै कि तोहे है बर्ताव कैन्हें करै छौ, बसंत के तोहे आपनो पति मानै छौ कि नै, आरो नै मानै छौ ते कैन्हें ?

यै पर गुलबिया खाड़ी होय के जे बोलना शुरू करने छेलै एक्के सुरो में बोल्ते चल्तो गेलो छेलै, “सुनो पंचसिनी, ई मरद जे हमरो बगलो में बैठलो छै, ई आपनो बहिन के मरद होतै, हमरो नै। हेकरो बहिन आरू ये नें मिली के हमरो जीवन के साथे खिलवाड़ करने छै। कौन जनम के बदला निकाली रहलो छै ई हमरा सें। हम्में ते एकरा कभियो नै आपनो मरद जानलियै कैन्हें कि ई हमरो बिहोशी में हमरो मांगो में सिनूर भरने छै। आबे है बीहा के कौन बीहा कहलो जैतै, जेकरा में एक पक्ष एकदम्मे शांत आरो मौन छै। पंच साहब, चुटकी भरी

सिनूर जों कोय मरद कोय औरत के मांगों में भरी दै आरो जनानी ओकरो जिनगी भर लेली गुलाम होय जाय, जोरु होय जाय, तबे तें भै गेलै। तोहों सिनी एक-एक मुट्ठी सिनूर लै ले आरो ई गांव भरी के जनानी सिनी के मांगों में जाय के पोती आबों तें सब जनानी तोरों सिनी रो जोरु होय जैतों।”

गुलबिया के है रड बरताव आरो बेपरद बात करतें देखी के पंच सिनी तें दंग छेबे करलै, सौसे टोला-पड़ोस के आदमियों सिनी मूख बनी गेलों छेलै। केकरो मुहों से बोल नै फूटी रहलौ छै। बोल फूटी रहलौ छै तें बस गुलबिया के, ऊ बोलतें जाय रहलौ छै, “सुनों पंच सिनी, तोरा सिनी तें हमरों बाप-दादा नांखी छौ आरो धरती पर न्याय-अन्याय के देखै वास्तें देवता नांखी। जों तोहेंसिनी हमरों न्याय नै करभौ, सत्य के पक्ष नै लेभौ तें धरती पर विश्वास करै वास्तें बचिये की जैतै, जों तोरा सिनी आरो कुछ जानै ले चाहै छौ तें है जानी ले कि बसंत हमरों पति, हमरों मरद कभीयो नै हुवे पारै। ऊ अगर कोय होतै तें वही होतै, जेकरा हम्में आपनों मनो से मानी चुकलौ छियै आरो जे हमरा आपनों मनो से आपनी कनियांय मानलें छै। आरो कल हमरों मांगों में सही सिनूर पड़तै तें ओकरे पड़तै।” गुलाबो के है सब बात सुनी के सबने आपनों कानों पर औंगरी राखी लेलकै। पंचो आपनों मुंह फेरतें हुवे कहलकै, “हद होय गेलै, ई कुलच्छन तें पाप बोली रहलौ छै आरो ई पाप जहां जैतै, वहीं गांव-घर के खैतै। यै लेली है जरूरी छै कि हेकरा यही गामों में राखलौ जाय ई पागल नै छै, पागल होय के ढोंग करै छै, ई छै तें कुलच्छन वाली औरत आरो हेनो औरत लेली पंचो दिस से एक्के फैसला हुवे पारै कि बसंत, जे है जनानी के मरद छेकै, वें हेकरा घर लै जाव आरो साम, दाम, दंड, भेद—जेना भी हुवे हेकरा, आपनों बस में करै। हेनो औरत के रास्ता में लावै वास्तें जों होकरो जानो चल्लो जाय छै तें पंच ई फैसला दै छै कि गामों के मान-मर्यादा के देखतें हुवे बसंत पर कोय मुकदमा नै होतै।”

पंच के फैसला होय चुकलौ छेलै। सब्भे आपनों घोर लौटी

रहलो छै आरो सब्भे रौ पीछू-पीछू बसंत गुलबिया के बांही धरनें, लगभग घसीटने-घसीटने घोर दिस लै चल्लो जाय रहलो छै। कुछू देर पहनें जे गुलबिया टन-टन करी के बोली रहलो छेलै पंचो के बीच, जेना कोर्ट-कचहरी में कोय वकील बहस करतें रहै, वही गुलबिया अनचोके एकदम कुम्हलाय गेलो छेलै। ओकरा ई जरियो टा विश्वास नै छेलै कि पंच के पक्ष ओकरो विपक्ष में होतै, आबे तें जिनगी भर वास्ते सड़ी-गली के यहें गैर मरदो के गोड़ो नीचे रहना छै, बचै के बस एक्के रस्ता छै कि आपनो देह-हाथ आपनो दांतो से नोची-नोची के मरी जाय याकि फेनू कहीं कोय नदी-पोखर में धौस दै जिनगी खतम करी लै। गुलबिया घसीटलो-घसीटलो चल्लो जाय रहलो छै, जेना कोय बकरी के कोय कसाय रस्सी डाली के खीचै छै आरो बकरी ओकरो पीछू जाय ले नै चाहै छै, ई दृश्य के देखवैयो कम नै छै, मतरकि बचवैया कोय नै। गांव टोला में औरत के साथें हेनो व्यवहार, शायद हेकरा से बड़ी के आरो तमाशा की हुवे पारे वहांकरो लोगो वास्ते।

जे भी हुवे ऊ दिन के पंचो के फैसला ने गुलाबो के एकदम से हिलाय के राखी देने छेलै। जखनी ऊ आपनो घोर गेलो छेलै, ठीक वही रातो से होकरो स्वभाव में एक अजीबे परिवर्तन होय गेलो छेलै। गुलाबो बोलै छै कुछू नै, मतरकि जेना-जेना ऊ पगलीया रड पहनें करै छेलै, अबे नै करै छै। ई सब देखी के होकरो सासे नै, बसंतो भीतरों से बड़ी खुश नजर आवै छै।

बसंत के माय ते शीतला माय के थानो से लैके जख थानो में कबूलती कबूली ऐलो छै, “हे शीतला माय, जो हमरो पुतोहू के पागलपन दूर करी दौ ते जोड़ी कबूतर तोरा देबौं, हे जख बाबा जो हमरो पुतोहू ठीक होय गेलै ते जोड़ा पाठा के बली देबौ।” कौन-कौन देवता के सामने मनौती नै राखले होतै बसंत माय। ई देवी-देवता के असर रहै या जेकरो भी, गुलाबो में बदलाव ते जरूरे आबी रहलो छै। यही बदलाव देखी के एक दिन सास ओकरो नगीच आबी के

कहलकै, “कनयांय, आबेँ जे होलै से होलै, पहाड़ हेनोँ जिनगी सामना में पड़लोँ छौन, हेने केँ गुमशुम बनी केँ नै काटलौ जाबेँ सकै। कोय नै काटेँ पारै छै। जहिया हम्मू बीहा करी केँ येँ ऐंगना में ऐलोँ छेलियै, हमरो मनोँ में ढेरे बात छेलै, बात यहू सही छेलै कि ई घरों में आबै के मने नै रहै, मतरकि जबेँ यहीं हमरोँ सुहाग बांधी देलोँ गेलै तेँ यही घरों के पुरूख केँ आपनोँ सुहाग मानी केँ जिनगी खपाय के बात सोची लेलियै। आरो वही संकल्प के है परिणाम छेकै कि है घर भरलोँ-पुरलोँ देखौ छौ। अबेँ हमरोँ जिनगी के की, दू बेटी छेलै दोनो बिहाय केँ आपनोँ-आपनोँ जग्घों पर छै। घरों में एक्के वही बसंत बेटा, अबेँ तेँ एकरे सेँ वंश बढ़तै। आरो तोरोँ बिना वंश कैन्होँ ?

[११]

सौसे गाँव में कुकवारोँ मची गेलै कि बसन्ता माय के पत रही गेलै। दादी बनैवाली छै बसन्ता माय। जत्तेँ भी बड़ोँ-बूढ़ी छेलै गाँव में—सब्भे के जुआनी पर एक्के बात।

हिन्ने बसन्त माय के गोड़ोँ में तेँ जेना पंख लागी गेलोँ रहेँ। पुरानोँ मांस में जेना नया खून बहेँ लागलोँ छेलै। बूलै तेँ जेना जुआन छौड़ी केँ मात करी देतै।

—की बसन्ता माय, अबकी तेँ सौसे गाँव के लुलुआ डुबौन करबैबौ। अंगना में सुरुज उतरै वाला छौं।

—यहू में की दू बात छै। सब बाकी बकाया अबकिये बार।

सचमुचे में ई अजीब बात छेलै कि जे गुलबिया गुमसुमे बनलोँ रहै छेलै, वहू आबेँ बोलबोँ-चालबोँ शुरू करी देलेँ छेलै। घरे-ऐंगन के लोँगोँ सेँ नै, द्वारी-बहारी के जोँन जनानी सेँ। बसन्ता माय के तेँ जेना

गुलबिया □ ७६

भागे लौटी ऐलो रहे ।

मजकि एक बात पर घर-बाहर के जनानी के बड़ा आचरज लागै कि जखनी गुलबिया के कोय ओकरो कोखी के बच्चा लेली बोलै, ते ओकरा कोय खुशी आकि दुख नै हुऐ । चेहरा पर कोय भाव जेना उतरबे नै करै ।

जोर-जनानी सोचै, शाअत, ढेर दिना के बाद गुलबिया के गोद भरै ले जाय रहलो छै, आरो कहीं बातों के नजर-गुजर नै लागी जाय, यही लेली ई संबंध में केकरो से बातचीत नै करै ले चाहै छै ।

समय बीतलो जाय छेलै । तीन महीना, चार महीना, पाँच छों, सात आठ आरो नौवा महीना पूरा होय पर आबी गेलै । बसन्त के खुशी के ठिकानो नै रही गेलो छेलै ।

घर-द्वार के सजावट में घोर भरी परेशान छेलै, मजकि गुलाबो जेना ई सब बातों से एकदम कहीं दूर छेलै, कुछ होन्है के जेना ओकरा मालूमो नै रहे कि ऊ गुलबियो छेकै । माय बनी रहलो छेली, ऊ मजकि मनो में कोय ममता नै ।

ई बात के ले के बसन्त कभी-कभी परेशान भी होय जाय ।

यहू बात नै छेलै कि गुलाबो ओकरा से बात व्यवहार नै करै । सब कुछ होवै—हँसी-मजाक, सब्भे कुछ । लेकिन जबे भी बसन्त आपना के बाप आरो ओकरो माय होय के याद ओकरा दितावै ते ऊ कहीं दूर खोय जाय, जेना बसन्त के बाते नै सुनले रहै ।

[१२]

आखिर वहू दिन आबी गेलै कि बसन्त बाप बनी गेलै ।

बसन्त माय के ऐंगन ते गीत नाद से गनगन करे लागलै ।

झुनकी माय ऐंगना में ढोल पर ताल दै रहलौ छेलै आरो मधुरिया माय के कंठ सें शहद फूटी पड़लौ छेलै।

धन्य-धन्य राज अयोध्या कि धन्य राजा दशरथ हे
ललना रे, धन्य रे कौशल्या जी के भाग कि रामजी
जनम लेल हे
ऐला जे पंडित पुरहित बैठला पलंग चढ़ी हे
ललना रे गुनि दियौ नुनुआ के दिन कि कोन तिथि
जनमल हे

अभी एक गीत खतम होवो नै करलौ छेलै कि सुरेखा माय दूसरो गीत शुरू करलकै,

नवमी तिथि नुनुआ जनम लेल चैत मास बीतै हे
ललना रे बारहे बरष जब होयतै वनहि चलि जायत हे
एतना वचन जब सुनलनि अहो राजा दशरथ हे
ललना रे धरती खसल मुरूछाइ कि अब केना जीवत हे
सोइरी सें बोलली कौशल्या रानी सुनु राजा दशरथ हे
ललना रे, कहौं जिए मोरा बेटा बांझी पन छूटल हे
“अगे माय, खाली गीते नाद चलतै कि आरो कुछू ?”

“आरो कुछू की होतै, की चाहै छैं तोरासिनी—बसन्ता घोर-
द्वार बेची के सोना-जेवर लुटावै ?”

“ई कहाँ कहै छियै, मजकि तोरासिनी भाँड़-भाड़िन के काम पूरा
करी देभौ तेँ भाँड़-भाड़िन की करतै ?”

खूब हँसी ठिठोली होलै ऊ दिन।

मजकि आबे ई बात डगरिन सें लै के घोर-दुआरी के लोग तक के अनटेटलो बुझावे लागलो छै कि गुलाबो के आपनो गुलाब हेनो बच्चा के खुशी केनहें नी होय रहलो छै ?

हेनो बेरुखी ते कोय जनानी के दुसरो बच्चा लेली भी नै होय छै, ई ते आपनो बच्चा छेकै। आपने कोखी के लाल।

फेनू ई बेरुखी केनहें ? आखिर की बात छै एकरो पीछू ?

की मधुरिया माय के रहलो नै गेलै। आखिर की बात हुए सके एकरो पीछू।

कोय आन बात सोचलो नै जाबे सकै छै। बच्चा के मूठैन एकदम बसन्ते पर गेलो छै। जबे काहीं कोय शंका नै छै ते गुलाबो के मोन-मिजाज आखिर हेनो केनहें ?

नै रहलो गेलै ते मधुरिमा एकदम देर दिन तक गुलबिये के पास बैठलो रहलै आरो बाते बात में पूछी बैठलकै, “हे कनियैन, एकठो बात बतावो कि तोरा माय बनला के बादो बच्चा के प्रति कोय ममता नै देखै छियौ, से केनहें ?”

मधुरिया माय के बातों के गुलबिया पहिले ते गौर सें सुनैलकै, फेनू खिलखिलाय के हाँसी पड़लै आरो हाँसते-हाँसते कहलकै, “थै में ममता-खुशी के की बात छै काकी माय। खेत में फसल होय छै ते खेत के मालिक के खुशी होय छै—खेत के की होतै ?”

आरो एकरो कुच्छू देर बाद गुलाबो जे बात मधुरिया माय के सुनलकै—ऊ बात सें ते एकदम सिहरी उठलै।

“हे कनियैन, हेनो हुए छै कि ? हे कनियैन, हेनो कुलच्छन बात केकरा सें तोहें सुनलो छौ। फेनू हेनो बात बोली के मूँ नै खराब करियो।”

मधुरिया माय के हालत देखी के गुलाबो के हाँसी आबी गेलै। हाँसी रुकलै ते कहलकै, “नै पतियाबो काकी, मजकि है सब

छेकै एकदम सही बात ।”

“जों सहिये छेकै कनियैन तेँ तोरा है सब सुनावै के की जरूरत । जेकरोँ साथें ई बात होलै, तेँ होलै ।”

आरो फेनु ऊ सब बात वांही पर रुकी गेलै ।

[१४]

मधुरिया मांय सें नै रहलौँ गेलै तेँ एक दिन आपनौँ मरद केँ सब बात एक-एक करी केँ सुनाय देलकै, “सुनै छौँ, बसन्ता कनियैनी हमरा सें की कहलकै, कहलकै कि बड़ौँ-बड़ौँ शहरोँ में जनानी किराया पर कोख दै छै । कोय्यो जनानी तीस हजार, पचास हजार, लाखो टका में कोय मरद के साथ रहै छै आरो दू जीवियोँ बनी जाय छै आरो जबेँ सोरी घरोँ के काम पूरा होय जाय छै, तबेँ ऊ जनानी ऊ मरद केँ छोड़ी केँ आपनौँ मरद लुग चल्लौँ जाय ।” कहतें-कहतें ऊ रुकली आरो पूछलकी, “तोहीं बतावौँ—हेनौँ भी होय छै की ?”

“तिरिया चरित्त देवो नै जानै, हम्में की बतैयौँ ।” मधुरिया बापें कही केँ पिण्ड छुड़ैलकै ।

मजकि आभी मधुरिया माय के बात कहाँ खतम होलौँ छेलै । लगें कहैलकै, “एतने बात नै नी छै । जानै छौँ, बसन्ता कनियैन की कहैलकै ? कहैलकै—हम्मू तेँ वहा रँ ई मरद के बच्चा पेटोँ में पाललें छियै । हमरा की लेना-देना ई बच्चा सें, आरो हमरा की मोह । जेकरोँ बच्चा छेकै, वैँ जानौक । हमरोँ मरद तेँ परदेश में रहै छै—मजूरी करै लें गेलौँ छेलै । हमरा मालूम होलै कि दस महीना बाद घोर लौटतियै । आबेँ हम्में दस महीना कहाँ जैतियै । पेट तेँ पालनै छेलै, से ई मरद बसन्त के बच्चा केँ पेटोँ में पालना शुरू करी देलियै । आरो दुसरोँ

चारहै की छेलै। हम्मं तेँ जल्दिये आपनोँ मरद के नगीच चल्लोँ जैबै। वहीं जेना राखतै, रहबै। आखिर ऊ हमरोँ मरद छेकै।”

कहतें-कहतें मधुरिया पत्थल नाँखी कुछ क्षण लेली बनी गेलै। होश ऐलै तेँ पूछलकै, “की लागै छों, ई ठिक्के भागी-उगी जैतै की ?”

“यहू कहीं होय छै। कोय जनानी कोय्यो मरदों संगें कुँआरा में कत्तोँ नगीची रहें, बीहा होला के बाद सब सरोकार खतम होय जाय छै। ओकरोँ वास्तें तेँ बस ओकरोँ पतिये परमेश्वर होय छै। बसन्ता कनियैनी जे भी तोरा बोललकौ, है केकरो सें नै कहियौ।”

मधुरिया माय तेँ केकरौ सें नै कहलकै, मजकि दसमे दिन गाँव भरी में जे कुकहारोँ मचलै, ओकरोँ तेँ कोय्यो थाहे पता नै रहलै।

रात केँ दिशा-मैदान के नामों पर गुलाबो जे बहियार गेलै तेँ घुमी केँ नै ऐलै।

एक घंटा, दू घंटा, आखिर की भेलै। कांही सांपे-बिच्छे तेँ नै काटी लेलकै। बसन्ता के करेजोँ धड़की उठलै। माय केँ जाय केँ कहलकै।

माय धड़फड़ैली सीधे बहियार दिश झटकली। “अगे माय, बहियारी में तेँ कांही नै छै।” एक-एक झाड़-पतार खोजी लेलकी बसन्ता माय, तेँ थक्की केँ घोँर आवी गेलै।

घोँर भरी में सन्नाटा। मजकि कहिया तांय बात दबलोँ रहें पारै छेलै। गाँव के सब जोँर-जनानी जुटेँ लागलै। मरद के उप-सुप अलगे।

ऐंगन में सौ-पचास जनानी के झुण्ड। सबके चेहरा पर एक्के सवाल—आखिर की होलै बसन्ता कनियैनी के ? कहाँ जाबेँ पारें ?

तखनिये मधुरिया माय खाड़ी होय केँ मुखिया नाँखी फैसला सुनैलकी, “सुनोँ बसन्ता माय, आबेँ तोहें आपनी कनियैनी के मोह छोड़ी दा। ऊ तोरोँ कनियैन छेवो नै करलौं, नै बसन्ता के जनानी। ऊ तेँ आरो के जनानी छेलै, जेकरोँ पास ऊ रातो-रात पहुँची गेलोँ छै। ओकरोँ खोज-खबर लेवोँ भारी बदनामी के सिवा आरो कुछ नै। आबेँ

ई बच्चा के पालन-पोषण लेली यहें अच्छा होतौं कि बसन्ता के बीहा करी दौ।”

बसन्ता आरो बसन्ता माय के मुँहों पर तेँ जेना ताला जड़ी गेलै आरो दुसरोँ जनानी सिनी काना-फूसी करतें ऐंगनोँ सें बाहर निकली गेलै।



आभा पूर्व : एक संक्षिप्त परिचय

- जन्म तिथि : २३ अक्टूबर १९६४ ई.
जन्म स्थान : भागलपुर
माता का नाम : जीवनलता पूर्वे
पिता का नाम : रुद्रदत्त पूर्वे
शिक्षा : एम.ए.(गोल्ड मेडल), पी-एचडी
प्रकाशन : देश भर की विभिन्न पत्र-पत्रिकाओं में रचनाएँ प्रकाशित
संकलनों में रचनाएँ : चम्पा फूलै डारे डार, आधुनिक अंगिका काव्य कोश, हे दशरथ के राम आदि दर्जनाधिक संकलनों में रचनाएँ प्रकाशित
सम्पादन : 'नया हस्तक्षेप' (अनियमितकालीन पत्रिका) के अलावा १. गीत-गंगा (अंगिका गीत संग्रह), २. नवगीतकार मधुसूदन साहा, ३. अर्द्धनारीश्वर (हिन्दी कहानियों का पंजाबी अनुवाद), ४. जीवनलता पूर्वे : शांत नदी की अनंत यात्रा (अंग महिला साहित्यकार संसद, भागलपुर) ५. अंगिका लोकसाहित्य : एक अध्ययन (अंगिका संसद, भागलपुर), ६. केकरोँ चाँद केन्हों चाँद (अंगिका संसद, भागलपुर), ७. खोई हुई लड़की का खत (अंगिका संसद, भागलपुर), ८. डॉ. अमरेन्द्र : व्यक्तित्व और वागर्थ (कामायनी, भागलपुर), ९. डॉ. अमरेन्द्र : संदर्भ और साहित्य (समीक्षा प्रकाशन, दिल्ली)
प्रकाशित पुस्तकें : १. अंतहीन वैतरणी (अंगिका उपन्यास), २. गुलबिया (अंगिका उपन्यास), ३. चन्दन जल न जाए (कहानी-संग्रह), ४. शरीष की सुधा (कहानी-संग्रह), ५. जब-जब झरे शृंगार (दोहा-संग्रह), ६. गुलमोहर का गाँव (कविता-संग्रह), ७. नागफनी के फूल (गजल-संग्रह), ८. शिशिर की धूप (कविता संग्रह), ९. नमामि गंगे (कविता-संग्रह), १०. ताँका शतक, ११. कुँवर विजयमल (हिन्दी उपन्यास)
सम्पर्क : शरतचंद पथ, मशाकचक, भागलपुर (बिहार)
८६ □ गुलबिया